




Holines Long Bikpela



Robert Merrill Brock

Mama karim mi long Ogas 13, 1941, long Kolambas, Ohio, U.S.A. Papa mama dediketim mi long lotu long Hiltop Komyuiti Sios, Na mi bin askim Jisas long kam insait long bel long taim mi liklik manki nating. Bihain mi greduet long Wes Hai Skul long 1959. Mi bin join long U.S. Air Fos long 1961, na pinis long dispela, mi go long God's Baibel Skul long 1965. Long 1960 God I givim klia singaut long mi long mi mas go mekim wok misineri. Na long Baibel Skul, God I bin kapsaitim Holi Spirit tru tumas na pulapim bel bilong mi. Long 1967 Barbara Hopkins na mitupela marit. Na Baibel Skul pinis, orait mitupela lusim as ples bilong go wok misineri long Papua Nugini. Long Krismas 1970 Mitupela pundaun long ples balus long Tambul Stesen W.H.P. Long 1992 mipela putim ol wok long han bilong ol nesonal, na go bek long as ples.

Yia bilong Bikpela 2021.

Tok Save Pastaim

Sampela wanwan i bin askim mi long wokim dispela Holines buk gen. Olsem nau mi laik traim long mekim, sapos God I orait. Dispela buk i no bilong bringim glori long wanpela man long graun, nogat. Sapos God Wanpela tasol I kisim glori, em laik bilong mi. As tru bilong raitim buk em bilong man i ken kamap holi bilong go long heven. Dispela buk i no bilong kisim profet mani. Kos bilong printim em kos bilong baim.

Dispela buk i no bilong sindaun na ritim olsem stori buk. Em autlain bilong tisa ken yusim long klas rum. Em bilong studen stadi pastaim long kam long klas. Na bihain Ol ken yusim klas rum taim bilong diskas samting ol bin stadi long en.

Ol Baibel ves i gat krungutim prin olsem: *God I sori moa yet.*

Dispela kain rait hia:*save givim bel...* em bilong soim klia dispela i no pul ves. Em hap ves tasol bilong mekim poin. I gutpela sapos ol lukap long pul sapta na ves bilong kisim pul mining.

Testimoni Bilong Mi Yet

Taim mi liklik manki nating, mi save pilim strong bilong Holi Spirit long go long alta na beten. Mi bilip tru Jisas i harim prea bilong mi na kam insait long bel bilong mi. Tasol i no long taim na dispela i lus pinis. Yangpela laip bilong mi, mi save “Kristen” long lotu, tasol mi sinman long skul. Dispela i go i go olsem inap mi pilim God I singautim mi long wok misinari. Long dispela taim mi senisim planti samting long laip bilong mi, tasol yet mi kalabus long sin. Na taim mi go long God’s Baibel Skul, na misinari trening hom, Holi Spirit I save katim liwa bilong mi no gut tru. Long wanem klas mi save go long en, ol save tok long sanktifaikesin, long sapol ol save autim tok long sanktifaikesin. Long kem miting ol tok “mi nitim sanktifaikesin bilong go insait long heven.” Mi pret nogut tru na go long alta na beten long kisim sanktifaikesin. Tasol nating nating. Na wanpela ivanselis, i kam na askim olsem: “Ating yu klia long namba wan wok o nogat.” Orait mi no givim ansa kwik, na em i tok moa: “Yu mas klia long namba wan wok pastaim, na bihain beten long kisim sanktifaikesin.” Orait long dispela taim mi beten tru tru na God I fogivim mi long ol sin mi bin mekim. Na nekis mi beten long kisim sanktifaikesin na mi kisim dispela namba tu wok Jisas i bin beten long ol kristen mas kisim. Jon 17.

Robert M. Brock

Tebol Bilong Ol Sabsek

Buk Wan - Tok Save Long Holines

- Sapta 1 - Bihainim Holiness
- Sapta 2 - Holines Em Spesol
- Sapta 3 - Namba Tu Wok
- Sapta 4 - Komanmen Bilong God
- Sapta 5 - Husat Bai Go Long Heven?
- Sapta 6 - God Wanpela Tasol Holi
- Sapta 7 - Holines: Fri long Olpela Bel
- Sapta 8 - Holines na Sin i no save Mikis
- Sapta 9 - "Sanktifaikesin" long KJV
- Sapta 10 - Dua Liklik, Rot Liklik
- Sapta 11 - Tupela Kain Kristen
- Sapta 12 - Kamap Klin
- Sapta 13 - Stap Yet Long Probesen
- Sapta 14 - Sapos Kristen I Mekim Sin
- Sapta 15 - Mekim Mistek
- Sapta 16 - Sin I Save Stap Long Bel Tasol
- Sapta 17 - Pulap long Holi Spirit
- Sapta 18 - Inap Tru, Pafeksin [KJV]
- Sapta 19 - God I Mekim Wok Kwiktaim
- Sapta 20 - Hangri long Holines
- Sapta 21 - Olpela Bel I Birua Long God
- Sapta 22 - Tupela Malolo
- Sapta 23 - Kisim Holi Spirit
- Sapta 24 - Kamap Nupela Gen
- Sapta 25 - Holines Na Nupela Kristen
- Sapta 26 - Holines Namba Wan Nit
- Sapta 27 - Dai Long Sin
- Sapta 28 - Ol Promis Bilong Kisim Namba Tu Wok
- Sapta 29 - Pro-vis-nol Sanktifaikesin
- Sapta 30 - Man I Mas Bilip Long Bel
- Sapta 31 - Primitiv Holines
- Sapta 32 - Kain samting Sanktifaikesin I No Save Mekim

Buk Tu - N. T. Piksa long Holines

- Sapta 1 - Waitpela Klos
- Sapta 2 - Wara
- Sapta 3 - Diwai Wain
- Sapta 4 - Malolo Long Buk Hibru

Sapta 5 - De Bilong Pentikos
Sapta 6 - Ol Disaipel Kisim Namba Tu Wok
Sapta 7 - 1 Korin 12
Sapta 8 - 1 Korin 14
Sapta 9 - 1 Korin 13
Sapta 10 - Bret I No Gat Yis
Sapta 11 - Aipas Man
Sapta 12 - Sik Lepa
Sapta 13 - Lasaras I Kirap Bek Gen
Sapta 14 - Lapun Man I Dai
Sapta 15 - Pikinini Wit
Sapta 16 - Faivpela Save Meri
Sapta 17 - Foa Pela Kain Graun
Sapta 18 - Jisas I Klinim Tempel
Sapta 19 - Pasin Bilong Katim Skin
Sapta 20 - Graun I Paia Olgeta
Sapta 21 - Beten Long Getsemani
Sapta 22 - Kraist I Dai
Sapta 23 - Ol Lain Tesalonaika
Sapta 24 - Boi I Gat Bret Na Pis
Sapta 25 - Barabas Kalabus

Buk Tri - Namba Tu Wok Long Buk Aposel

Sapta 1 - Sameria
Sapta 2 - Aposel Pol
Sapta 3 - Ko-nil-i-as
Sapta 4 - Apolos
Sapta 5 - Sios Long Efesas

Buk Foa - Sampela Holines Man Long Olpela Testamen

Sapta 1 - Jop
Sapta 2 - Inok
Sapta 3 - Aisea
Sapta 4 - Ebrahim
Sapta 5 - Aisak
Sapta 6 - Jekop
Sapta 7 - Moses
Sapta 8 - King Devit
Sapta 9 - King Esa
Sapta 10 - King Heseakaia
Sapta 11 - Ilaisa
Sapta 12 - Kelep
Sapta 13 - Rut

Sapta 14 - Neman

Buk Faiv - Piksa Long Holines Long Olpela Testamen

Sapta 1 - Bun bilong ol Daiman

Sapta 2 - Isrel I Brukim Wara Jordan

Sapta 3 - Alta Bilong Ilaija

Sapta 4 - Sospen Pulap Long Wel

Sapta 5 - Ilaisa I Tromoi Sol

Sapta 6 - Profet Ilaisa Na Plaua

Sapta 7 - Putim Hul Long Ia Bilong Slev

Sapta 8 - Samyuel I Kilim Egak

Sapta 9 - Rausim Ismal

Sapta 10 - Kisim Bokis Kontrak

Sapta 11 - Haus Sel Moses I Wokim

Sapta 12 - 7 Spesol De Moses I Givim Long Isrel

Sapta 13 - Las Sans

Tok Bilong Pinisim

Buk Wan - Tok

Save Long Holines

Sapta 1 - Bihainim Holiness

Sampela i bin krungutim Baibel ves taim ol i tekaut mining bilong namba tu wok holines na senisim long “bihainim holines.” I olsem: “Bihainim, bihainim, tasol yu no inap kisim. Yes, i gat sampela ves long bihainim, tasol i gat ves tu long kisim holiness. Wokabaut holi em gutpela, tasol dispela em sot long samting God I laik mekim. Em i givim Pikinini bilong Em long dai long diwai kros bilong bel bilong ol Kristen ken kamap holi. Long namba wan wok bikpela senis i save kamap long laip na wokabaut bilong manmeri, tasol as bilong sin i save stap yet long bel na givim trabel long ol Kristen. Bilong Kristen ken winim pait na go insait long heven, dispela as bilong sin i mas pinis tru insait long bel.

Hibru 12:14 Bihainim bel isi wantaim olgeta man, na pasin holi, dispela samting sapos man i no gat em bai i no inap lukim Bikpela. [Pisin KJV]

Mining tru bilong dispela ves i olsem wanem?

1. Man i mas bihainim holines tasol bilong go long heven, (?)
2. Man i mas kamap holi bilong go long heven. (?)

Bihainim pasin holi em wanpela samting, tasol bel i kamap klin, em namba tu wok. Mining tru bilong ves hia em man i mas kisim namba tu wok holiness. Ves hia i poroman wantaim-

Matyu 5:8. Blesing i stap long ol husat bel bilong ol i klin. Long wanem, ol bai luikim God.

1 Pita 1:16 Rait i stap pinis, Yupela mas stap holi long olgeta kain pasin.

Hia tu, ol no tanim mining stret long sampela Baibel. Baibel hia i no tok long PASIN holi, nogat. Mining i olsem: “Yu mas stap holi.” Sampela i bungim tok i no stap long Baibel, olsem: “long olgeta kain pasin.” Ol bungim dispela tok bikos ol birua long dispela namba tu wok.

1 Tes 4:7 Em i singautim yumi bilong bihainim pasin holi.

Hia, gen, ol tanim ves kranki, na bungim tok moa long “bihainim pasin holi.” Dispela ves i gat mining bilong kisim namba tu wok, bel klin. Pasin holi, na KAMAP holi long bel, tupela i no wankain. Aposel i laik ol lain Tesalonaika ken kisim namba tu wok bel klin.

Na God I save givim kanda bilong ol Kristen ken KAMAP holi long bel.

Hib. 12:10God em i stretim yumi bilong helpim yumi tru, na bai yumi kisism pasin holi bilong em yet.

Gen, ol bin tekaut mining bilong namba tu wok. “Bihainim pasin holi” i no wankain olsem man i kisim bel klin. Pikinini bilong God Em I dai long diwai kros bilong sios ken kamap holi. Ol dispela brata i birua long holines, na pait agens namba tu wok.

Sampela arapela ves ol bin tanim stret:

Hibru 13:12 Olsem na Jisas tu, inap long Em i ken mekim ol manmeri kamap holi wantaim blut bilong Em Yet, I karim pen ausait long dua bilong banis.

Long dispel ves ol tanim stret, olsem “KAMAP holi.”

Holines em plen bilong God pastaim Em I kamapim graun.

Efesas 1:4 Em I bin makim yumi insait long Em bipo long stat bilong ol as ston bilong dispela graun, inap long yumi ken stap holi na i no gat asua long ai biong Em long laikim tru,

Ol tanim gutpela: yumi ken “stap holi.” Holines em i no bilong bihainim tasol, em bilong bihainim na kisim. Promis i save kam long yumi ol kristen.

2 Korin 7:1yumi mas rausim olgeta doti bilong bodi na bilong spirit, na i stap klin....

“Stap klin,” KJV pafek holines, bel klin 100%.

Matyu 5:8 Blesing i stap long ol husat bel bilong ol i klin. Long wanem, ol bai lukim God.

Bel klin -em bel i no gat as bilong sin. Dispela as bilong sin i no save fit insait long heven.

1 Tes 4:3 ...dispela em i laik bilong God, yes, long yupela i ken stap holi...

Stap holi -i no olsem bihainim, bihainim, bihainim. Em bilong Kamap holi tru, insait long bel bilong yumi, nau long dispela laip, pastaim long dai. God I no laik trikim yumi long dispela samting. Holines em i presen bilong God I laik givim.

Aposel 2:39 ...na yupela bai kisim presen bilong Holi Spirit,

Aposel 8:20 Tasol Pita i tokim em, Mani bilong yu i ken dai olgeta wantaim yu, bilong wanem, yu bin tingting olsem yu ken baim presen bilong God wantaim mani.

Baibel i strong long man i mas wokabaut holi, tasol i strong tu long man i mas kisim namba tu wok long kamap holi insait long bel bilong em. Dispela em as tru bilong Jisas i dai ausait long dua bilong banis.

Hibru 13:12 Olsem na Jisas tu, inap long Em i ken mekim ol manmeri kamap holi wantaim blut bilong Em Yet, i karim pen ausait long dua bilong banis.

Sapta 2 - Holines Em Spesol

Dispela em mak God Yet I bin putim antap tru, na nogut yumi bringim dispela tok daun long namba tu. Jisas I tokim Marta:

Luk 10:42 I gat nit long wanpela samting...

I no gat narapela tok i winim tok bilong Holines. Yes, tru olgeta i gat nit long namba wan wok long God I fogivim sin, tasol dispela namba wan wok em bilong manmeri i ken goan long kisim namba tu wok holines. Holines i karamapim olgeta hap Baibel O.T. na N.T. wantaim. Na husat i save daunim tok bilong holines, orait em i givim baksait long blut bilong Jisas husat i karim pen bilong mekim yumi kamap holi. Tok bilong holines em i olsem glas miro bilong man i ken save tru long as bilong sin i stap long bel bilong em. Tude ol man i gat trening long kain kain wok spesol. Na ol pasta tu i gat dipela nit long autim tok long holines. Sapos pasta i no autim, orait husat bai autim?

Sampela tok hia i kam long C.W. Ruth, wanpela evanselis bipo tru long Nasarin Sios: “Holiness em namba wan tok bilong Baibel. Nogut ol pasta i les long autim dispela tok long Holines. Sapos olsem, orait ol kongrigesen i no gat rot long kisim namba tu wok. Tok isi isi tasol i no inap bringim as bilong sin aut long ples klia. Paia bilong holines i mas hat tru long bel bilong ol pasta.” Jon Wesli i tok moa:

No ken les long autim holines oltaim, oltaim.

Yu mas autim wantaim strong pela tok.

Yu mas autim wantaim tok i klia olgeta.

Dispela tasol ken helpim ol kongrigesen kisim namba tu wok holines. Sapos ol pasta i les long autim tok bilong namba tu wok, orait pasta bai slip na ol kongrigesen bai slip tu wantaim as bilong sin. Paia bilong God bai dai long sios, wantaim wok bilong Holi Spirit. Wesli i tok moa: Sapos pasta i les long autim strong pela tok long Holines ol manmeri bai slip long lotu, na lotu bai drai olgeta. Sapos pasta i no strongim ol Kristen long bilip long kisim holines nau, orait yu no inap lukim strongpela wok bilong God. Pasta i no inap tok strong tumas, na klia tumas long holines. Tok isi isi, na tok i no klia olgeta -dispela i no inap putim nil long as bilong sin, na ol Kristen i no inap kisim namba tu wok. Na sapos yu autim strong pela tok, orait tru sampela bai kros, tasol arapela bai kisim namba tu blesing bilong God. Nau yumi laik lukim ves ol

God yet I save mekim holines em spesol. Holines em mak long ol rait bilong ol faivpela buk lo, na long ol prophet, na long ol Sam, na foa pela buk Gutnius, na long pas bilong ol aposel. God Yet Em I holi. Em I givim komanmen long mipela mas KAMAP holi tu.

Sapta 3 - Namba Tu Wok

Taim God I mekim bel bilong man i kamap holi, yumi ken kolim dispela “namba tu wok.” I tru, dispela nem i no stap long Baibel, tasol dispela mining i stap long Baibel. I olsem Trinititi. Dispela nem tu i no stap long Baibel tasol mining i stap. Tu pela wok i no wankain. Long namba wan wok God I save fogivim sin. Tasol long namba tu wok God I save klinim as bilong sin long bel bilong Kristen.

Namba wan wok em gat tok long Lo i bruk, go harim Jas long Kot i tok wanem.

Matyu 9:2 Na taim Jisas i lukim bilip tru bilong ol Em i tokim man i sik long sik palsi, Pikinini man, stap wantaim gutpela amamas. Mi lusim ol sin bilong yu.

Long namba wan wok man i save kisim nupela laip.

2 Korin 5:17sapos wanpela man i stap long Krai, orait God i mekim em i kamap nupela man tru

Long namba tu wok Kristen mas dai aut long ol pela bel.

Galesia 2:19 Mi hangamap pinis long diwai kros wantaim Krai

Tasol namba tu wok i no gat tok long fogivim sin. Dispela Kristen nau i kam long Het Pris. Em i no bin brukim lo no mekim sampela rong. Nogat. Em i kam long Het Pris ken oraitim sik i stap insait long bel bilong em. Levit. 13 i givim pul stori long dispela man i gat sik lepra na em i kam long Het Pris. Dispela taim i no gat sin bilong fogivim. Nogat. Tasol em i gat sin i stap insait long bel bilong em. Fogivnes i no inap stretim. Olsem God I mas mekim narapela kain wok, yumi ken kolim "Namba tu wok."

Wok bilong holiness i no stretpela pasin yumi save mekim. Em ol aksin Holi Spirit i save mekim insait long bel bilong yumi. Pasin givim bel. Pasin malolo. Pasin amamas.

Sapta 4 - Komanmen Bilong God

God I givim dispela komanmen long ol man mas kamap holi.

1 Pita 1: 16.rait i stap pinis, Yupela i mas stap holi, long wanem, Mi stap holi.

Pita i bin ritim dispela tok long Levit 11:44,45.

Levit 11:44yupela mas i stap holi, long wanem Mi stap holi...

God I putim dispela sem tok long olupela kontrak na long nupela kontrak wantaim. God I no bin senisim tingting bilong Em kam inap long tude. I no gat tupela rot bilong go long heven. Man i gat as bilong sin em i no fit man bilong go long heven. Tok i klia tumas. I no gat wanpela man i ken givim baksait long dispela tok na go long heven tu. Kristen i gat as bilong sin, i mas kisim namba tu wok bel klin bilong lukim Bikpela. Maski long ekskus bilong man, na tingting bilong man, ol bai givim ansa long dispela long bikpela de bilong kot.

...Yupela....mas...

Matyu 5:17,18 No ken ting long Mi kam bilong bagarapim lo ...Inap long taim heven na dispela graun i pinis, wanpela liklik hap tru o wanpela liklik hap mak bai i no inap long pinis long lo, ...

Rev. 22:19 ...sapos wanpela man bai tekewe long ol toktok bilong bukGod bai tekewe hap bilong em ausait long buk bilong laip....

Lo 4:2 Yupela i no ken skruim wanpela nupela lo long dispela lo bilong God, bikpela bilong yumi, nau mi givim long yupela. Na yupela i no ken rausim wanpela long en.

Sapta 5 - Husat Bai Go Long Heven?

Sam 24:3,4 Husat bai i go antap long liklik maunten bilong BIKPELA, O husat bai i sanap long ples holi bilong Em? Em man i gat (1) klinpela han na (2) bel i klin olgeta....

Bilong man i go insait long heven i mas i gat tupela wok: Han klin, na bel klin. Han makim ausait laip, na bel i makim insait laip. I no gat wanpela man inap go insait long heven wantaim olupela bel o as bilong sin.

Matyu 7:21 I no olgeta wan wan husat i tokim Mi, Bikpela, Bikpela, bai go insait long kingdom bilong heven. Tasol em husat i mekim laik bilong Papa bilong Mi husat i stap long heven.

1 Tes 4:3 ...dispela em i laik bilong God, yes, long yupela i ken stap holi...

Ating sampela bai kam klostu long get bilong heven, tasol yumi mas stap holi bilong go insait long get, na kamap long siti. Em dispela holines i save fitim yumi bilong go insait long get bilong siti. Baibel i klia yu mas stap holi bilong go long heven.

1 Pita 1:16 “Mi stap holi. Olsem na yupela tu i mas i stap holi.”

Hibru 12:14 Man i no gat pasin holi, bai em i no lukim Bikpela.

Nogat sin i stap long heven,
Gutpela samting tasol.
- Pes 80 Buk song bilong lotu.

OI tanim Tok Pisin: pasin holi, tasol mining long Grik: “sanktifaikesin.” (bel klin).

Sapta 6 - God Wanpela Tasol Holi

God Em I holi, na Em I ken mekim man kamap holi.

Rev. 15:4 ,,,,O Bikpela...Yu tasol i stap holi.

As bilong dispela tok i olsem: God wanpela tasol I gat holines bilong Em Yet. Tasol Kristen i mas kamap holi. Orait, dispela holines Kristen i save kisim i no bilong em yet. God Yet I as bilong olgeta holines. Wanem Kristen i bin kamap holi, orait dispela holines i bin kamap long God Yet. Na God I no gat wanpela husat i bin givim holines long Em. Long dispela we God wanpela tasol I holi. Na Em I no givim yumi narapela kain holines. Em i givim yumi sem kain holines olsem Em Yet.

Matyu 5:48 Olsem na yupela i mas stap inap tru, yes, olsem Papa bilong yupela husat i stap long heaven em inap tru.

1 Jon 3:3 Na olgeta wanwan man husat i gat dispela hop insait long em i klinim em yet, yes, olsem Em i stap klin.

Dispela holines i no bilong yumi yet. Em Jisas Krais I stap laip insait long yumi, na givim strong inap wokabaut holi.

Sapta 7 - Holines: Fri long Olpela Bel

Rom 6:7 Long wanem, em husat i dai pinis i stap fri long pawa bilong sin.

Dai pinis - mining:

Galesia 2: 19, 20 Mi hangamap pinis long diwai kros wantaim Krai. Olsem na nau mi stap laip, em i no laip bilong mi yet, Nogat. Krai em i stap laip insait long mi. Na nau olgeta wokabaut bilong mi long graun, em mi wokabaut long bilip tasol.

Dispela pen bilong dai i no bilong yu beten na givim sampela pen long bodi. Dispela Jisas inapim pinis. Tasol dispela pen bilong dai em i olsem strongpela laik bilong yu yet i mas dai pinis olgeta. Em “dai aut” yu mas mekim, tasol dispela i no save kilim as bilong sin. God wanpela tasol ken kilim as bilong sin long sem taim yu bilip Em long mekim.

Rom 6:18 Nau taim yupela i kamap fri long sin.

Rom 6:22 Tasol nau taim God i mekim yupela i kamap fri long sin.

Tok bilong tripela ves hia, i tok long fri long dispela as bilong sin i stap insait long bel. Em i as bilong sin i save kamapim ol kain sin man i save mekim long wokabaut bilong em. Wanem sin king Devit i mekim insait long bel bilong mama? Nogat. Em i no mekim wanpela sin insait long bel bilong mama, tasol bel bilong em i gat kros long laik bilong God, na mama i no bin karim yet. Em dispela sin tu, yumi mas kamap fri long en. Prea bilong king Devit:

Sam 51:5 Mi stap yet long bel bilong mama, na mi man bilong sin.

Planti arapela ves i gat tok long fri long pasin bilong mekim sin. Tasol ol dispela tripela ves hia long Rom 6 i gat strong pela tok long kamap fri long dispela olpela bel, o as bilong sin.

Aposel Pol tu i bin testifai long dispela ol pela bel bilong em, i dai pinis.

Galesia 2:20 God i bin nilim mi pinis long diwai kros wantaim Kraist. Tasol mi stap laip. Tasol i no mi, tasol Kraist i stap laip insait long mi....

Galesia 6:14 Long diwai kros bilong Krai, pasin bilong dispela graun em i dai pinis long tingting blong mi, na mi yet mi olsem daiman long ai ol man bilong graun.

Taim man i bruk wantaim pasin bilong graun, orait ol save bruk wantaim yumi tu. Long namba wan wok i olsem dai man i kisim nupela laip, tasol long namba tu wok kristen i save dai aut long laik bilong em yet, na larim God i kilim dispela ol pela bel. I gat siat bilong man, na i gat sait bilong God. Sait bilong man, God I no inap mekim, na

sait bilong God, man i no inap mekim. Man i gat hevi long kilim strongpela laik bilong em yet, na God wanpela tasol, I gat pawa long klinim as bilong sin long taim man i bilip.

Kraist I no inap bel gut wantaim as bilong sin hia long dispela graun na long heven tu. Na bilong wanem man i save tok blut bilong Kraist i no inap rausim olgeta sin? Nogat. Dispela pen Jisas i karim, em i pul ansa bilong olgeta sin. Jisas I dai bilong piksim trabel long sin. Dai i no gat pawa bilong rausim sin. Tok long kainkain tangs i no inap rausim as bilong sin. Jisas i laik piksim yumi hia, nau, long taim yu wokabaut long dispela graun, na mekim yumi piksa long Em.

Husat i tanim bel na kamap Kristen, orait em i no save mekim sin moa. 1 Jon 3. Tasol dispela “tanim bel” i no save mekim man fri long olupela bel. Nogat.

Bilong kisim bel klin, Jisas i beten long ol disaipol bilong Em ken kisim Holi Spirit. 1 Jon 17. Na Aposel Pol i beten long ol kongrigesen bilong Tesalonaika ken mekim olsem tu. 1 Tes 4,

Sapta 8 - Holines na Sin i no save Mikis

Iv em pikim prut, na Adam i kaikai, em sin bilong em, dispela i no sin bilong yumi. Tasol as bilong sin i save kamap long dispela. Yumi no bin pikim dispela prut bilong gaden. Sin bilong Adam, em sin bilong Adam. Yumi no inap kisim punishmin long sin arapela man i mekim. (Esikiel 18) Dai long matmat em no panismin bilong sin, bodi bilong man i save dai bikos em lain Adam. Dai long hel paia em panismin long man i brukim komanmin.

1 Korin 15:22 Olgeta man bilong lain bilong Adam ol i save dai.

Liklik bebi tu i save dai i no bin mekim wanpela rong, tasol i gat dispela siknes bilong soul i kam long ol lain Adam. Yes, Kristen tu i gat namba tu wok, em mas i dai bikos em lain bilong Adam. As bilong sin i no gat punishment long hel bikos yumi no bin kisim long laik bilong yumi yet. I no wanpela rong yumi bin mekim insait long bel bilong mama. I gat wanpela rot long kisim punishment -em taim man i sakim wanpela komanmen.

Jisas i no save mikis wantaim sin.

Jisas em tu lain bilong Adam, tasol I no bin mekim wanpela rong. Papa God I tok olsem, Judas i tok olsem, Pailat i tok olsem, meri bilong Pilat i tok olsem, Herot i salim em i go bek long Pilat, na stilman long hap sait i tok olsem. Jisas I no bin kisim as bilong sin, bikos Holi Spirit Yet I putim em long bel bilong Maria.

Matyu 1:20 Dispela pikinini em i kisim pinis long bel bilong en, em Holi Spirit i bin givim long em.

Na i gat sampela lotu ol paul tru long buk Baibel. Ol mikisim sin na fitim wantaim Kristen laip. Ol tok: "Ol Kristen i save sanap baksait long Kraits, na God I no save kaunim wanem sin ol i mekim, bikos ol hait baksait long Kraist." Sampela i ting ol hait baksait long Jisas, na God I no inap kaunim sin bilong ol. Dispela kain tising i no save stap long Baibel. God I no aipas, na Em I no inap giamanim Em Yet.

Jer. 17:10 Mi Bikpela, mi save glasim tingting na bel bilong olgeta man. Na mi save skelim pasin bilong olgeta wanwan man....

God I makim Abraham stretpela man [impute KJV]

Rom 4:22-25 God i makim dispela long em bilong stretpela pasin....God i makim dispela long em...God bai makim dispela...

God i makim Abraham stretpela bikos em i stretpela. Em i no save kolim sinman stretpela man. Sinman i no inap hait baksait long Jisas, na God I kolim em stretpela man.

Efesas 5:18Yu pela i mas larim Spirit bilong God i pulap long yupela.

Sapos man i pulap wantaim Spirit biong God, orait i no gat spes long sin. Taim man i kisim pulap long Spirit biong God em i no kisim 50% no 98% Nogat tru. Em i kisim pulap tru na i no gat spes moa long narapela samting.

Gal 5:17Yumi save, olupela bel em i laik daunim Holi Spirit, na Holi Spirit em i laik daunim olupela bel. Dispela tupela i birua wantaim.

Hia Aposel Pol i givim spesol nem long dispela olupela bel [KJV "FLESH."] aigris bilong bodi. Tasol em i no mining sin i stap insait long skin, bun samting. Nogat. Taim Kristen i kisim namba tu wok, orait Holi Spirit I pulap long bel, na dispela pait agens God i dai pinis.

Jisas i no dai nating,
I laik helpim yumi,
I dai long rausim nogut,
Na mekim yumi klin.

Jisas I no dai bilong kisim bek yumi long hel tasol. Nogat. Em I dai bilong kisim bek yumi long olgeta sin. Sin tasol i save salim man i go long hel. Em i no dai long diwai kros bilong karamapim sin tasol. Nogat. Em I dai bilong rausim, klinim na tekewe sin olgeta.

1 Jon 1:9 sapos yumi autim sin bilong yumi, orait bai God i no lusim yumi. Nogat. Bai em i mekim stretpela pasin na lusim sin bilong yumi, na em i tekewe olgeta pasin nogut na bai yumi kamap klin.

Heb 13:12 Olsem na Jisas tu i bin karim pen ausait long dua bilong banis, bilong mekim ol manmeri i kamap holi long blut bilong en.

God I no save karamapim sin long waitpela laplap tasol na kolim man i "klin." Em i no save makim sinman em holi. Man i no inap haitim sin baksait long diwai kros na trikim God long sin bilong em. Blut bilong Kraist I no save karamapim yumi tasol. Nogat. Blut I save wasim yumi klin, na mekim yumi kamap holi tru. Man i ken tromoi waitpekla laplap antap long pik, tasol dispela i no save senisim bel bilong em. Yet em save go bak long graun malumalu. Na waitpela laplap i no inap senisim bel bilong yumi tu.

Sapta 9 - “Sanktifaikesin” long KJV

Ol diksenari i save givim tupela mining long sanktitaikesin:

- 1. Makim samting i holi biong God Wanpela tasol.
- 2. Mekim bel i kamap klin. In-tai-a (Entire) Santifaikesin.

Dispela tupela mining i stap long Buk Baibel tu.

1. Makim samting i bilong God tasol. Ol man yet ken mekim dispela.
 - God i makim maunten Sainai i holi
 - God i makim de 7 i holi.
 - Moses i makim haus sel holi.
 - Yumi i save makim haus lotu em holi.
 - Rom 12:1 Givim bodi long God olsem ofa.
 - Alta gol, alta bras
 - Moses yet i sanktifaim Eron bilong mekim wok pris
 - Haus lotu: paiano, ol sia, tebol, buk song...
 - Man yet ken sanktifaim God [makim Em Namba Wan] 1 Pita 3:15

2. Mekim bel klin. God Wanpela tasol ken mekim dispela.
 - *Matyu 5:8 Blesing i stap long ol husat bel bilong ol i klin.*
 - *1 Tes. 5:23 God...i ken mekim yupela kamap holi olgeta...*
 - *Hib. 13:12 Jisas...i ken mekim ol manmeri kamap holi...*

Olsem diksenari, na Baibel i wanbel long sanktifaikesin i gat tupela mining. Trabel i save kamap taim sampela lotu i tok sanktifaikesin i gat wanpela mining tasol: makim samting bilong God Wanpela tasol. Planti taim Pisin Baibel i no klia long brukim dispela tupela mining.

Yu ken lukim dispela tupela mining bilong sanktifaikesin insait long wanpela ves tasol: *Jon 17:19 Na mi givim laip bilong mi yet [sanktifaim mi yet #1] bilong helpim ol, bai tok tru i ken mekim ol i kamap [sanktifaid #2] man tru bilong yu.*

Jisas I no gat nit long Em Yet kamap holi. Em I stap holi pinis. Tasol Em I “sanktifaim” laip bilong Em long go hangamap long diwai kros.

Em i sanktifaim Em Yet #1, bilong Em I ken sanktifaim #2 ol Kristen long kamap holi.

Bilong wanem ol no yusim dispela tupela mining ol dictionary i givim long sanctification? Em bikos ol no bilip long namba tu wok sanktifaikesin.

Long KJV Baibel:

Sanctify: 70 pela taim long 65 veses

Sanctified: 62 pela taim long 58 veses

Sanctification: 5 pela taim long 5 veses

137 pela taim dispela tok i stap insait long Baibel, tasol ating i gat sampela pasto i no bin pris wanpela taim long dispela sabsek !

Baibel i gat tok moa long sanktifaikesin. Ol lain Korin i bin kisim sanktifaikesin long namba wan wok:

1 Korin 1:2 Krais Jisas i bin mekim yupela holi..... [sanktifaed]

1 Korin 3:3 yupela i stap yet long pasin bilong olupela bel...

Sanktifaikesin: #1 Makim samting holi #2 Mekim kamap holi

I olsem: Sanktifaikesin em [English: INSTANTANEOUS] mining God I save mekim 1,2 tasol olsem lightning. OK, i gat sampela tising “God I save mekim sanktifaikesin i go, i go, sampela taim, na bihain em gro, na kamap 100% holi olgeta.” [Ves 2, na 3]

I gat sanktifaikesin long namba wan wok i save makim man em nau bilong God. Dispela wok **God I save mekim wantu tasol, na i pinis.** Tasol dispela sanktifaikesin i no save rausim as bilong sin. I olsem, liklik bebi i gat as bilong sin, tasol taim pikinini i gro dispela as bilong sin i save gro wantaim. Na long namba wan wok God i save klinim dispela i bin gro long en, tasol dispela i no save rausim as bilong sin mama i karim long en.

Na i gat narapela sanktifaikesin (namba 2 long dik-sin-ari), dispela i save rausim as bilong sin. Na dispela wok tu, **God I save mekim wantu tasol, na i pinis.** Yumi mas holim pas dispela tok “instantaneous,” -mining wantu tasol olsem laitning. Yumi nitim blut bilong Krais long klinim de bai de, tasol yumi no nitim sanktifaikesin de bai de.

Hibru 12:10 Tasol God em i stretim yumi bilong helpim yumi tru, na bai yumi kisim pasin holi bilong em yet.

Hia long Hibru, God I no save stretim ol sinman, Em I save stretim ol Kristen pikinini bilong Em Yet, bilong ol i ken goan kisim namba tu wok.

I gat wok man tasol ken mekim:

2 Korin 7:1yumi mas rausim olgeta doti bilong bodi na bilong spirit, na i stap klin.

Rom 12:1 Yupela mas givim bodi bilong yupela long God olsem ofa. Bodi i gat laip yet na yupela givim long God, na i bilong God wanpela tasol, na bai yupela i mekim pasin God i laikim.

Na i gat narapela sait God wanpela tasol ken mekim:

1 Tesalonaika 5:23 God em i as bilong bel isis, em yet i ken mekim yupela i holi olgeta. Na em i ken lukautim spirit na tewel na bodi bilong yupela, bai yupela i stap gutpela olgeta, na i no gat asua.....

Sait bilong man i no bilong hariapim. Man i nitim sampela taim bilong tingim laik bilong God, na “daiaut” long laik bilong em yet.

Tasol sait bilong God long komplitim sanktifaikesin em 1-2, olsem laitning bilong klaut i paiap. Na God I save mekim dispela long sem sekon man i bilip.

God I no wetim man long kam insait long heaven bilong mekim dispela wok. Dispela wok God i laik mekim nau bilong redim man long kambek bilong Jisas. Yu no ken ting long wetim dai, o pagatri samting. Nogat tru. Yu ken kamap bel klin nau long bilip.

Sapta 10 - Dua Liklik, Rot Liklik

Nau, ol pasin bilong graun i birua long holines, na olupela bel i birua long holines, na Seten yet em birua bilong holines. Na sampela lotu i birua long holiness, na sampela pasta, na misinari tu ol birua long holines. Na olupela bel tu i no laik dai-aut.

Efesas 6:12 Yumi pait wantaim olgeta spirit nogut i stap antap. Yumi pait wantaim ol hetman, na ol pesman, na ol strongpela het spirit bilong graun ol i save bosim dispela tudak.

Harim tok bilong Baibel yet long rot bilong go long heven:

Matyu 7:14 ...dua bilong banis em i liklik, na rot em i liklik, dispela i go long laip, na i no gat planti husat i painim dispela pinis.

Matyu 7:21 I no olgeta wan wan husat i tokim Mi, Bikpela, Bikpela, bai go insait long kingdom bilong heven. Tasol em husat i mekim laik bilong Papa bilong Mi husat i stap long heven.

Luk 12:32 No ken pret, liklik lain sipsip....

Luk 13:23 Bikpela, ating God bai i kisim bek wan wan man tasol, a ?

Luk 14:27 ...husat man i no karim diwai kros bilong em, na kam bihainim Mi, em i no inap stap disaipol bilong Mi.

Jon 6:66 Long dispela taim planti bilong ol disaipol bilong Em i go bek, na ol i no wokabaut moa wantiam Em.

Bilong wanem ol lusim Jisas na go bek ?

Jon 3:19 Lait i kamap pinis long graun, tasol ol man i laikim tudak. Ol i no laikim lait...

Moses tasol i strong long go insait long liklik dua, na liklik rot bilong Holines:

Hibru 11:25 Em yet i laik kisim hevi wantaim lain bilong God. Em i no laik bihainim pasin bilong sin na painim amamas bilong sotpela taim tasol. V. 26. Em i ting, sapos em i kisim sem long nem bilong Krai, dispela i winim tru olgeta mani na bilas samting bilong Isip. Em i ting long dispela gutpela pe bambai God i givim em.

V.27. Moses i bilip long God, olsem na em i kirap na i lusim Isip....

Bikpela lain het gavman, na planti het lotu, ol save hetim Jisas.

Tasol Kraist bai kam na sanapim Kingdom bilong Em yet long dispela graun.

Sekaraia 14:4 Long dispela taim bilong trabel Bikpela bai i sanap long mountain Oliv klostu long Jerusalem long hap sankamap....

Apostle 1:11Dispela Jisas, nau God i kisim em na em i lusim yupela na i go antap long heaven, em bai i kam bek gen long wankain pasin olsem nau yupela i lukim em i go long heven.

Holines em liklik lain hia long dispela graun, tasol bihain, wanpela de, Holines bai tekova olgeta hap graun.

Aisaia 35:8 Bikpela haiwe bilong Holines, na kamap long Jerusalem.

Matyu 6:10 Kingdom bilong Yu i mas kam.

Rev. 20:2Em i holim pas dispela dregon, dispela snek bilong bipo, husat em dispela Spirit Nogut, na Seten, na pasim em wan tausen yia.

Sek. 14:20,21. Long dispela de bai i gat antap long ol belo bilong ol hos, PASIN HOLI I GO LONG BIKPELA. Na ol sospen long haus bilong BIKPELA bai stap olsem ol dis long ai bilong alta.

v.21. Yes, olgeta wan wan sospen long Jerusalem na Juda bai stap pasin holi i go long BIKPELA.

Sapta 11 - Tupela Kain Kristen

<u>Kristen</u>	<u>Sanktifaid Kristen</u>
Em i gat laip	Em i gat laip i pulap tru John 10:10
Em i givim bel	Em i givim bel gutpela tru 1 Jon 4:17
Em i daunim olupela bel	Olpela bel i dai pinis Rom 6:6
Em i wanbel wantaim God	Em i gat bel isi bilong God Filipai 4:7
Em i katim han bilong sin	As bilong sin i pinis Efesas 4:22
Em i gat amamas	Em i gat amamas pulap tru Jon 15:11
Jas i bin fogivim em	Pris i bin klinim em. Hib 7
Em i bin tanim bel	Em givim bodi olsem ofa Rom 12:1
Em i winim kot na stap fri	Em i fri long olupela bel Rom 6:18
Em i pikinini bilong God	Em i king na pris Rev 1:6
Em olsem man ol kisim bek long wara	Em olsem man ol kisim bek na rausim wara long bel
Em i bin konfesim ol sin	Em i wokabaut long lait bilong holines 1 Jon 1:7
Em i lusim ol pasin bilong mekim sin	Olpela bel i pinis olgeta Rom 6:6
Em i kamap nupela gen	Em i kisim baptais long Spirit Matyu 3:11
Em i wanbel wantaim God	Em i stap holi olsem God

	1 Pita 1:16
Em i kamap nupela gen	Olpela man i bin dai pinis Rom 6:6
Em i bin lusim ol pasin bilong graun	Pasin bilong graun i no stap moa long bel bilong em. Aposel 15:9
Em i fri long pasin bilong bel i mekim sin	Em i fri long pret, bikhet, na belhat Kolosi 3:8
Em i olsem han bilong diwai wain	Em han bilong diwai ol katim sotpela Jon 15:2
Isi tru long pundaun long taim traim	Em strongpela kristen Rom 15:1
Em i olsem hul wara	Em i olsem riva. Jon 7:38
Em i gat malolo long ol hat wok	Em i gat malolo long bel Matyu 11:29
Em i no save lukim ol samting klia tumas	Em lukim klia Mak 8:25
Em i no save wanbel gut long ol arapela kristen	Em wanbel wantaim ol brata 1 Jon 1:7
Em i no redi long mekim wok bilong God	Em i redi long mekim wok. 2 Timoti 2:21

Dispela lista hia i kam long wanpela holines man -C.W. Ruth.

Na i soim klia ol kristen i no stap wankain. Ol kristen i mas goan long kisim nambatu wok bilong pinisim olpela bel, na go long heven. Holines i no save litimapim wanpela Kristen i winim arapela Kristen. Nogat. Tupela kain i stap brata-brata ananit long Kraist.

Filipai 2:3 Yupela i no ken tingting long yupela yet tasol, na wok long kamapim biknem bilong yupela. Nogat. Yupela i mas daunim yupela yet na yupela i mas ting pasin bilong ol arapela i winim pasin bilong yupela.

Sapta 12 - Kamap Klin

Tupela wok bilong kisim bek man.

1. Forgiveness.
2. Bel klin long as bilong sin.

Nau yumi mas klia long i gat wanpela kain klinim i stap insait long namba wan wok.

Baibel i klia tru long ol man i bin kisim as bilong sin.

Buk Song 51:5

....mi stap yet long bel bilong mama, mi man bilong mekim sin.

KJV I was shapen in iniquity; and in sin did my mother conceive me.

Bebi i no gat rot long “MEKIM SIN” insait long bel bilong mama. Tasol bel bilong dispela liklik bebi i no stret wantaim God. Dispela yumi save kolim as bilong sin, o dipreviti. Em i no stap holi.

Taim Adam i pundaun long sin, orait em i kisim ol lain bilong en i go wantaim.

Mama i save karim olsem, tasol long laip-taim ol save mekim moa na moa sin. Na taim ol mekim sin i go, i go, orait em save bungim moa na moa dipreviti antap long as bilong sin. Orait na taim man i tanim na kamap Kristen orait God I save KLINIM dispela dipreviti man i bin pikap o bungim antap long dispela sin mama i bin karim long en. I olsem liklik boi i gat sno-ball, na tanim tanim i kamap sno-man. Dispela kain sin man i save bungim, ol Baibel tisa i save kolim [acquired] a-kwaid dipreviti.

Em dispela KLINIM Jisas i save mekim long namba wan wok, sem taim i fogivim man. Tasol as bilong sin mama i bin karim long en i stap yet. Olsem Kristen i nitim namba tu wok bilong klinim bel long dispela sin mama bin karim long en.

Sapta 13 - Stap Yet Long Probesen

Kristen i save kamap holi long namba tu wok, tasol yet i save stap long probesen o taim bilong traim. I olsem. sapos Kristen i no beten oltaim, na ritim Baibel na was gut, orait em bai pundaun long traim, na bekslaid. Tru, wanem Kristen i gat nambatu wok i klostu moa long Bikpela, tasol yu no ken tingim em no gat rot long givap na lus. Nogat. Em tu inap bekslaid. Na long taim yumi stap long dispela graun, orait yumi stap long traim no probesen. (Jems, Sapta 1 i tok long Kristen i gat dispela traim).

2 Samuel 11:4 Batseba... i kam long Devit na Devit I slip wantaim em.

Matyu 26:74 Orait, nau Pita i tok strong tumas, i spik, "Tru antap, mi no save long dispela man. Nogat tru."

Kainkain man i gat kainkain wiknes, na Setan i save tru long wiknes bilong yumi. Wiknes bilong Devit, em i no wiknes bilong Pita.

Neson bilong Isrel em bekslaid. King Devid em bekslaid, na King Solomon i bekslaid, Pita tu bekslaid, na Dimas. Lista i save go longpela tru. Na ol husat bekslaid i mas tanim bel gen olsem king Devit na Pita bilong go long heven. Long taim yumi stap hia long probesen, yumi stap fri long makim laik bilong yumi yet. God I no save fosim yumi long wanpela samting. Na em i olsem long olgeta kristen -ol stap fri long makim rot bilong ol yet. Na namba tu wok tu i no save rausim dispela fri aksien bilong manmeri. Yumi save mekim long laik bilong yumi 24 aua long seven de bilong wik.

Na sapos Kristen i gat namba tu wok em bekslaid, em sin tasol i mekim man baksalaid, na em i mas tanim bel gen long dispela sin i bin pundaun long en. Sapos nogat, orait em i no stap Kristen moa. Man i givim beksait long Bikpela em i no redi nau long beten long kisim presen long Holi Spirit. Nogat. Pastaim em i mas stat ova gen, na tanim bel. Sapos nogat, orait dispela man, bipo em Kristen, tasol nau em bai lus long hel paia. I olsem: Ol Kristen husat i gat namba tu wok i stap yet long probesen wankain olsem bipo God I putim diwai long gadin bilong Adam ken makim rot long laik bilong en yet. Na nau yumi mas winim dispela probesen bilong go long heven. Yumi mas yusim laik bilong yumi bilong kamap pikinini bilong God. Na olsem tasol yumi mas yusim laik bilong yumi bilong stap pikinini bilong God.

Rom 8:39 ... i no gat wanpela samting em inap long tekewe yumi long sori bilong God

Jon 10:29Olsem na i no gat wanpela man i ken rausim ol long han bilong em.

Tru tumas i no gat wanpela arapela samting inap rausim yumi long han bilong God. Long laik bilong man yet tasol em i ken givim beksait na wokaut lusim han bilong God. Yes, God I gat olgeta pawa, na long dispela pawa Em I bin givim man fri laik bilong em yet.

I tru tumas, sapos king Devit, na Pita, na Jona, tripela i no tanim bel gen, orait tripela bai stap long hel paia tude.

Rom 6:23 ...Sin i save givim pe long ol wokboi bilong en. Disela pe em dai tasol.
[dai bilong itaniti]

1 Jon 3:7 Ol likik pikinini bilong mi, yupela lukaut ! Nogut wanpela man i gaimanim yupela. V. 8 Bipo tru Seten i mekim sin, olsem na man i mekim sin, em i man bilong Seten.

Ol bai lus long famili bilong God, na go bung wantaim famili bilong Seten.

Bilong pinisim dispela tok, long taim God i wokim Adam i no gat sin o asua. Em save amamasim God tasol em i no gat narapela rot. Olsem God I putin diwai bilong Adam i gat sans long yusim laik bilong en yet. Bihainim tok, o sakim tok. Na dispela sem kain probesin i save stap long yumi tude tu.

Sapta 14 - Sapos Kristen I Mekim Sin

Sapos Kristen i mekim sin, i gat rot bilong pikisim gen. I no mas givap long Kristen laip na stat ova gen.

1 Jon 2:1 Ol liklik pikinini bilong mi, mi raitim dispela tok long yupela, bai yupela i no ken mekim sin. Na sapos wanpela man i mekim sin, yumi gat Helpim bilong yumi em i stap wantaim Papa...

Nau ating dispela 1 Jon 2:1 em no bilong Kristen i bruk wantaim God na go stilim benk, mekim pasin pamuk, no kilim man i dai. Nogat. Kain olsem, i bruk pinis wantaim God, na em mas stretim na goan long Kristen laip.

Jisas Krai i no hariap long kikim man aut, em i redi long fogivim Kristen husat i bin brukim lo. Na em givim spes long man i ken tanim bel na stretim sin bilong en.

Sam 86:5 God Em redi long fogivim man [lukim KJV]

Ating em kain samting olsem. Kristen i no bin ritim Baibel olgeta de, no i no gat taim bilong mekim prea tru, o kain samting olsem. Sapos balus i paul long rot, ol no mas putim daun long biksi. Nogat. Ol mas stretim rong, na goan long ples tasol.

Hebrew 12 God i givim hevi long yumi bilong stretim yumi

Faivpela lotu long Revelation 2 na 3 i gat nit long tanim bel. Tasol Jisas i wokabaut yet namel long stik kandel bilong ol. I olsem: samting God I soim, ol mas mekim, sapos nogat, orait God bai rausim dispela stik kandel bilong ol. Ol bai bekslaid na lusim famili bilong God, na bihain lus long hel paia. Tasol God I givim olgeta spes long stretim rong, na ol i no gat nit long givap long Kristen laip.

Rev 2:5 Bipo yu bin mekim gutpela pasin, tasol yu lusim dispela pasin na yu pundaun pinis, Olsem na yu mas tingim gen dispela pasin yu bin mekim bipo, na yu mas tanim bel na mekim kain pasin olsem pastaim yu sav mekim. Sapos yu no mekim olsem, orait bai mi kam long yu na rausim dispela lam bilong yu.

Kristen i no save mekim sin, tasol sapos em mekim sin orait i hat Helpim. Dispela Helpim, em wanpela man Jisas Krai.

Sapta 15 - Mekim Mistek

God I no save mekim mistek, ol ensel i no save mekim mistek. Ol Kristen long heaven ol no save mekim mistek. Tasol ol manmeri i stap yet long dispela bodi ol save mekim planti mistek olgeta de. Mistek, i no gat asua, tasol sin i gat asua wantaim. Sin em pasin bilong sakim Lo bilong God.

1 Jon 3:4 Sin em i pasin bilong skim lo.

Rom 8:26 ...Spirit tu i helpim ol hap i no gat strong bilong yumi.

[God i no sot long wanpela samting, tasol ol man i gat kainkain sot bilong en]

Spirit I no save rausim hap i no gat strong, tasol Em I save helpim. Yumi sot long tingting, toktok, na wokabaut. God I kisim das na wokim Adam, na long dai yumi save tanim das gen. Adam i pundaun long sin na dispela das i gat ol kain sot bilong en. Hia mipela no gat tok long sin, tasol mipela i no gat strong olsem God. Pulap long Holi Spirit tu i no save fikisim dispela trabel. Ol kristen i save mekim mistek, pasta tu i save makim mistek, evansleis tu i save makim mistek. Pop bilong ol Katolik tu i save mekim mistek. Long kainkain we yumi sipsip i save paul long rot.

Sapos man i paul long tingting, orait em bai paul tu long aksin. Man i mistek long pikap long mani bilong mi. Em i tingim bilong em, tasol nogat, em bilong mi. Mi kolim polis, na ol putim man long kalabus, tasol bel bilong em i no gat asua long ai bilong God. Aksin bilong em rong, tasol bel bilong em i stret wantaim God. Yumi lukim aksen bilong dispela man, na tok “em mekim sin,” tasol God I kolim em stretpela man. Olsem yumi no ken jasim ol Kristen brata. Sin i no stap long han bilong man, ia, nus, maus, ai, no blut bilong man. Nogat. Sin em sickness bilong spirit, na i stap insait long bel, o soul bilong man. God Wanpela tasol inap skelim bel na aksin bilong man.

Sampela taim Kristen i mekim rong, tasol long dispela rong ol i no save gut long en.

Olsem Jisas I skulim ol disaipel long mekim beten olsem:

Luk 11:4 Lusim sin bilong mipela....

Dispela prea bilong ol Kristen, yu ken mekim olgeta de wanwan.

Hia Jisas i no opim dua long Kristen i fri long mekim sin. Nogat. Bel bilong Kristen i klin, tasol tingting o aksen i no pafek, em i gat nit long askim God long fogivnes. Ten pela komanmen i no bin bruk insait long bel bilong Kristen. I olsem taim Moses putim namba tu ston i no bruk insait long bokis kontrak. Long bel Kristen inapim, tasol long aksin em save kamap sot long kainkain samting.

Lo i lukim aksin, na bringim yu long kot, maski bel bilong yu stret o nogat.

Baibel i save klia long tu-pela kain sin man i save mekim:

1. *Levitikas 4:2 Sapos wanpela man o meri i no tingting gut na i brukim wanpela lo bilong bikpela, orait em i mekim sin.* (lukim pul sapta 4 na 5, na Namba 15).
2. *Hibru 10:26 Harim. Sapos yumi kisim save pinis long tok tru bilong Krai, na bihain, long laik bilong yumi yet yumi wokabaut long pasin bilong sin....*

I luk olsem long Nupela Kontrak wanem Kristen i mekim mistek, orait ol no save kolim “sin.” Baibel i putim strong pela mak bilong skelim sin na mistek. Sin em bai salim manmeri lus long hel, tasol mistek nogat. Tasol tupela wantaim em nitim blut bilong Jisas bilong wasim. Olsem yumi save askim fogivnes long ol mistek yumi save mekim.

1 Jon 3:6 Man i stap wantaim Krai, em i no bihainim pasin bilong sin.

V. 8 Man i save mekim sin, em i man bilong Seten

1 Jon 5:18 ...olgeta man i stap pikinini bilong God ol i no save bihainim pasin bilong sin. Nogat.

Sampela taim tu, Kristen i gat nit long askim arapela brata-susa long fogivim em. Sampela taim insait long famili yet, i gat nit long askim arapela long fogivim. I no bikos yumi sinman. Nogat. Em bikos yumi yet stap long bodi bilong sospen graun.

2 Korin 4:7 Tasol mipela i gat dispela gutpela samting, em i olsem i stap insait long sospan graun.

Em hia, narapela prea bilong ol Kristen:

Buk Song 139:23 God, skelim mi gut na bai yu save long olgeta tingting i stap long bel bilong mi. Traim mi, na bai yu save gut long olgeta tingting bilong mi. Skelim mi gut, nougat sampela tok giaman i stap long tingting bilong mi.....

Sampela bilipman long O.T. tu ol askim God long fogivim.
Daniel 9, na profet Joel tu.

John Wesli i tok “Yu ken kolim mistek em sin, sapos yu laik, tasol mi nogat.”
I olsem, mekim sin i mas samting insait long bel bilong sakim God.

Sapta 16 - Sin I Save Stap Long Bel Tasol

Rom 6:7 ...man i dai pinis, em i no pas moa long sin. [fri long sin KJV]

Rom 6:18 ...God i bin tekewe yupela long wok kalabus binlog sin. [fri long sin KJV]

Rom 6:22 ...God i tekewe yupela pinis long kalabus bilong sin. [fri long sin KJV]

*1 Jon 3:4 ...**sin em i pasin bilong sakim lo.***

Sapos sin i stap insait long skin o blut bilong man, orait i no gat rot long kamap fri long sin.

Bikos sin i no stap insait long skin bilong man, orait em ken kamap FRI LONG SIN.

Matyu 15:18 ...dispela i kam ausait long maus i save kam ausait long bel.

Katim han, lek, kamautim ai, kapsaitim blut, i no inap pinisim sin, bikos sin i stap dip tru insait long bel bilong man.

Hibru 10:26 ...sapos yumi mekim sin long laik bilong yumi...

Man i mas yusim laik bilong em bilong mekim sin. Sapos man i no yusim laik bilong em long wanpela aksen, orait dispela em i no wanpela sin. Bikos man mas yusim laik bilong em long mekim sin, orait i gat rot long kamap fri long sin.

Man husat i mikisim sin wantaim mistek, em bai paul tru. Tupela i no wankain. Planti ol testifai “Mi man bilong graun, mi man bilong sin.” Ol testifai olsem bikos ol ting sin i stap insait long skin, o blut bilong ol. Sapos yu testifai olsem “Mi man bilong sin,” olsem wanem dispela ken litimapim nem bilong God ? Nogat tru. Husat i save testifai olsem “God I brukim pawa bilong sin long laip bilong mi,” orait dispela i save litimapim nem bilong Bikpela. Tasol wanem tising save kolim mistek em sin, na sin em mistek, orait dispela i opim dua bilong tingim Kristen ken mekim sin na go long heven tu.

Pasin bilong mekim sin i save kamaut long bel bilong man. Mistek em save kamaut long kru o tingting bilong man. I no gat wanpela Baibel ves i save sapotim dispela tising long Kristen ken mekim sin olgeta de long tingting, toktok, na aksen o wokabaut. Sapos tru, sin i stap long bodi, orait i no gat rot long kamap fri long sin long dispela laip. Olsem na blut bilong Jisas tu i no gat pawa bilong rausim sin. Yumi mas sindaun na wetim taim bilong dai bilong kamap fri long sin. Kamap fri long sin em bilong dispela laip, bilong redim yu long go long heven.

1 Tes 5:23 God em i as bilong bel isi, em yet i ken mekim yupela i holi olgeta. Na em i ken lukautim spirit na tewel na bodi bilong yupela, bai yupela i stap gutpela olgeta, na i no gat asua long taim Bikpela bilong yumi Jisas Krai em i kam bek

“Bodi i stap holi.” Yu mas klia, dispela i no gat mining long bodi i gat sin bilong rausim. Tingim tok bilong Sapta 9 :

Sanktifaikesen 1. Makim samting bilong God tasol. [olsem bodi]

Sanktifaikesen 2. Mekim bel i kamap klin no holi.

I olsem: YU YET ken sanktifaim bodi bilong yu -makim bilong God tasol.
Tasol bodi bilong man, skin na blut, i no gat sin bilong rausim.

Rom 12:1 Yupela mas givim bodi bilong yupela long God olsem ofa....

1 Korin 6:19 ...bodi blong yupela em i tempel bilong Holi Spirit.

Matyua 15:17 samting i stap insait long maus na i kam ausait, dispela em i kamap long tingting [KJV heart] Na dispela samting tasol em i mekim man i doti

Baibel i no tok long sin i stap long bodi, tasol mining i olsem makim bodi i holi bilong God tasol. Yumi mas klia tru sin em i no samting bilong bodi, em samting bilong bel tasol. Sapos tru, sin i stap long bodi, orait i no gat rot long rausim long dispela laip. Tasol bikos sin i stap long bel, orait i gat rot long rausim olgeta long blut bilong Kraist.

1 Jon 1:7,9 ...blut bilong Jisas, Pikinini Bilong God, emi save tekewe olgeta sin bilong yumi na yumi kamap klin....na em i tekewe olgeta pasin nogut na bai yumi kamap klin.

Narapela samting:

Ves 23 i klia tumas, yumi mas kamap holi pastaim Jisas i kam bek. Holines bai mekim yumi redi long kambek bilong Em. Em bilong hia, nau, long taim yu wokabaut long dispela graun.

Taitas 2:12 Dispela marimari bilong God em i save skulim yumi long lusim pasin bilong givim baksait long God, na lusim olgeta laik nogut bilong pasin bilong graun, na yumi tingting gut na wokabaut stret na bihainim pasin bilong God nau long dispela taim.

Tupela samting i no inap stretim sin:

1/ Bodi bilong man i no mas dai long matmat bilong rausim sin. Nogat. Rausim sin em bilong bilip long taim yu stap laip tasol. Man i no mas wetim heven bilong kamap holi.
2/ Pagatri bilong ol Katolik tu, i no stap long buk Baibel. Na pagatri tu i no inap klinim bodi no spirit bilong man. Baibel i no save givim ekskus long Kristen ken mekim sin.

1 Jon 3:7Nogut wanpela man i giamanim yupela. Man i mekim stretpela pasin, em i stretpela man, olsem Krai i stret pelaman.

V.8 Man i save mekim sin, em i man bilong Seten

Jon 8:44 papa bilong yupela, Seten.

Ol kain sin em pasin bilong sakim God. Na i no gat rot long man i sakim God ken go insait long heven.

Sin i rausim Lusifa long heven.
Sin i rausim Adam long gaden.
Sin i rausim king Sol long sia king.
Sin i rausim Devit long wanbel wantaim God.
Sin i rausim Pita long bihainim Kraist
Sin i rausim Judas long kisim namba wantaim ol Aposel.
Sin i rausim Dimas long wok wantaim aposel Pol.
Na sin bai rausim man long famili bilong God.

Rom 6:23 ...pe bilong sin em dai

Tripela kain dai long Baibel

1. Sinman i Bruk wantaim God. *Efesus 2:1 sin, i kilim yupela i dai*
2. Man i bruk wantaim dispela laip. *Hebrew 9:27 Olgeta man i mas i dai wanpela taim tasol.*
3. Bruk wantaim God long itaniti. *Mak 9:43 long hel, long paia i no save dai.*

Sapta 17 - Pulap long Holi Spirit

Yumi bin lukim pinis mining bilong holines: God i rausim olgeta sin. Tasol Baibel i soim tu holines em bilong kisim pulap long Holi Spirit. Dispela em promis i stap long buk baibel.

Aposel 2:38 ...na yupela bai kisim presen bilong Holi Spirit.

Matyu 3:11 ...Em bai givim baptais long yupela wantaim Holi Spirit, na wantaim paia.

Jon 16:7 ...sapos Mi no go, Poroman bai i no inap kam long yupela. tasol sapos Mi go, Mi bai salim Em long yupela.

Efesas 5:18 ...stap pulap wantaim Spirit.

Aposel 2:4 Na olgeta bilong ol i pulap wantaim Holi Spirit.

Tasol, promis long presen bilong Holi Spirit i no bilong olgeta manmeri.

Jon 14:17 Yes, Spirit bilong tok tru. Husat ol manmeri bilong dispela graun i no inap kisim...

Holi Spirit Em I presen bilong ol Kristen. Em I no bilong ol sinman.

Long Jon 17 Bikpela i save beten long ol lain Kristen bilong Em.

Jon 17:9 Mi beten long ol. Mi no beten long ol manmeri bilong dispela graun, tasol long ol husat Yu bin givim Mi. Long wanem , ol i bilong Yu.

Long Jon 17 yumi lukim prea bilong Jisas long ol disaipol. Em i no mekim dispela prea long ol sinman bilong graun. Nogat. Em i beten long ol disaipol ken kisim pulap long Holi Spirit I bin promisim pinis long Sapta 14, 15, na 16.

Namba wan wok, kamap nupela gen, em tu i wok bilong Holi Spirit. Jisas i tokim Nikodimas:

Jon 3:8 Win i save ran we em i laik, na yu harim nois bilong en, tasol yu no inap save long em i kam we, na em i go we. Olsem tasol em olgeta wanwan husat i kamap nupela long Spirit.

Man i kamap nupela gen, em yet tasol i no inap mekim, i mas kisim helpim bilong Holi Spirit. Tasol dispela wok bilong forgiveness i no gat KAPSAIT o PULAP wantaim. Dispela tok “pulap long Spirit” i wankain olsem “kisim Holi Spirit.” Sinman ken kamap nupela gen long Holi Spirit, tasol em i no redi long “kisim” Holi Spirit. Kisim Holi Spirit em i namba tu samting. Olsem aposel Pol i askim ol lain Efesas:

Aposel 19:2Yupela i bin kisim Holi Spirit inap long taim yupela i bilip?

KJV [Kam inap long nau, ating yupela i bin kisim Holi Spirit]

V. 3 ...Yupela i kisim baptais nau long wanem samting? Na ol i tok, Long baptais bilong Jon.

Jon i no save baptaisim man husat i no bin tanim bel, olsem dispela 12 pela man long Efesas ol mas bin tanim bel pinis. Jon tu i save autim tok long baptais bilong Holi Spirit. Olsem i no klia bilong wanem ol dispela lain man i tok "Mipela no save long Holi Spirit." Nzn i no save kisim hap long Holi Spirit long namba wan wok, na narapela hap long namba tu wok. Holi Spirit em wanpela person, na i no inap bruk bruk long tu pela hap. Tasol Em I save mekim tupela kain wok.

Em wok bilong Holi Spirit long mekim man i kamap nupela gen, tasol long dispela, ol no save kisim pulap long Holi Spirit. I gat wok moa gen bilong kapsait na pulapim bel bilong man long Holi Spirit Yet. Jisas I promis long Em Yet bai kapsaitim Holi Spirit.

Long namba wan wok God I save fogivim sin.
Long namba tu wok man i save kisim pulap long Holi Spirit.

God I no save hap hapim wok bilong Em. Em i save pinisim tru. Wok bilong Em I save komplitim pinis. Long namba wan wok fogivim em komplit, long namba tu wok klinim em komplit.

Taim man i tanim bel na kamap Kristen, orait em i save karim nain pela prut bilong Holi Spirit.

Galesia 5:22,23 Tasol kaikai bilong Spirit em lakim tru, amamas tru, bel isi, pasin bilong karim pen longpela taim, pasin isi, gutpela pasin, bilip tru, Pasin bilong stap isi, pasin bilong bosim bodi gut.

Tasol ol dispela prut em save mikis wantaim as bilong sin. Dispela Kristen i no redi long mekim wok bilong God. Prut em gutpela, tasol smel bilong olupela bel i stap wantaim.

Galesia 5:17 „bodi i aigris i birua long Spirit, na Spirit i aigris i birua long bodi. Na dispela tupela i birua wanpela i go long arapela, inap long yupela i no inap mekim ol dispela samting yupela i gat laik long mekim.

Ol sinman i no gat dispela kain trabel. Dispela kain tu-bel, em trabel bilong Kristen i no gat namba tu wok, pulap long Holi Spirit. Na dispela pait bai go, i go, inap wanpela bai win. Ol pela bel bai win na Holi Spirit I lus, no Holi Spirit bai win na ol pela bel i dai pinis.

Ol Aposel 1:8 Tasol yupela bai kisim pawa, bihain long taim Holi Spirit i kam antap long yupela.

Nau ol dispela prut bilong Holi Spirit i ken karim kaikai moa yet bikos i no mikis moa wantaim as bilong sin.

Jon 15:2olgeta han i save karim kaikai, em Papa i save katim sotpela na klinim,
bai em i ken karim planti kaikai.

Sapta 18 - Inap Tru, Pafeksin [KJV]

Matyu 5:48 Yupela i mas i stap stret tru, olsem Papa bilong yupela i stap long heaven em i stap stret tru.

Planti lotu ol no laikim dispela ves i stap long Buk Baibel. Sampela i tok dispela tok i go long ol lain Juda tasol, i no bilong mipela tude. Arapela i ting dispela tok em i go long ol manmeri i stap bihain, long 1,000 yia Ma-lin-i-am tasol. Ol gat kain kain ekskus long krungutim dispela ves, na mekim malumalum nating. Olsem wanem yumi ken kamap inap tru wankain olsem Papa long heven i stap inap tru?

Bipo yumi tok pinis long aksen o wokabaut bilong Kristen i no pafek, o street tru. Yumi mas klia, olgeta lain Adam i save mekim mistek -Jisas wanpela tasol, nogat. Olsem, wanem mining bilong dispela “*inap tru*,” o “*stret tru*?” [pafeksin KJV]

Sampela Baibel ves i givim mining bilong “inap tru.”

1 Jon 4:12 ...Sapos yumi givim bel bilong yumi long ol brata, orait God i stap wantaim yumi, na yumi save tru long givim bel bilong yumi long God.

1 Jon 4:17,18 ...Pasin bilong laikim ol brata em i kamap gutpela tru long yumi olsem: Yumi stap long graun wankain olsem Krai yet,

Man i save laikim ol brata, em i no save pret. Sapos pasin bilong laikim ol brata i kamap gutpela tru, orait emsave rausim pret.

I olsem: Laikim ol brata i mas kamap 100%. Na sapos 100% orait i no gat spes moa long narapela kain nogut i stap wantaim. Dispela Jon Wesli i save kolim “Holines.” Pafeksin, o “stret tru” em dispela. Tasol tru Holines em i no save mekim man “stret tru” long aksen, o tingting. Dispela 100% em samting i stap insait long bel bilong man.

Holines, em i pasin bilong laikim arapela olsem God Yet I laikim arapela. Baibel i no save tis long narapela kain pafeksen. Wesli tu, i givim nem long dispela na kolim “Kristen pafeksin,” o “I-van-sel-i-kol Pafeksin.” Yumi no inap kamap inap tru wankain ol ensel. Na yumi mo inap kamap inap inap tru olsem God I krietim Adam. Na yumi no inap kamap inap tru long olgeta we God I stap inap tru. Dispela wanpela we tasol man ken kamap inap tru olsem God -em pasin bilong givim bel.

Efesas 1: 4God i no wokim graun yet, na em i makim yumi pinis long Krai, bai yumi ken i stap holi, na i no gat asua long ai bilong em.

Yumi i man bilong mekim planti mistek, tasol ol Kristen i gat namba tu wok, em i no gat asua long pasin bilong givim bel. Na dispela i no bilong wetim heven. Ol Kristen i mas inapim dispela mak hia nau long dispela graun.

Hibru 10:14 .. Ol manmeri em i mekim i kamap holi, em i mekim o i kamap gutpela olgeta.....

I gat kain kain givim bel long Baibel.

Ol kain pasin pamuk

Man wantaim meri, tupela marit

Brata-brata insait long famili.

Pasin bilong God na ol Kristen. Long Dispela kain “givim bel” man i mas usim laik bilong em yet long mekim.

Sapta 19 - God I Mekim Wok Kwiktaim

Bilong God i sanktifaim man, man i mas putim olgeta samting antap long alta olsem Ebraham i mekim long Olpela Testamen. Long dispela samting, man i no ken hariap tumas. Em i mas tingim gut na mekim. Tru tumas, yu mas daiout long strongpela laik bilong yu yet. Ol saveman bilong Baibel ol kolim “in-tai-a kon-si-kre-sin,” o, mekim ofa kompli. Olsem, na alta yet i save sanktifaim dispela ofa. [namba wan mining long diksinari].

Matyu 23:19 alta i mekim ofa i kamap holi. [Makim samting i bilong God.]

Tasol paia i no pundaun yet na as bilong sin i stap yet. [Bel Klin, Namba tu mining long sanktifaikesini].

Tasol **dispela wok God i givim long man bilong mekim, i no save kilim, o rausim olupela bel**. Man yet i no gat strong long kilim as bilong sin. Tru, kon-si-kre-sin kompli, tasol, olupela bel i stap laip yet. Yu no ken ting long rausim han, lek, fut, het samting bilong ol pela bel. Nogat. God I no save hap hapim na kilim. I no gat we long laik bilong man yet ken kilim dispela olupela bel. Dispela wok bilong kilim as bilong sin em wok God wanpela tasol ken mekim long taim man i bilip.

Taim God I lukim man i putim olgeta samting long alta olsem ofa, orait Em I save mekim wok bilong Em wantu tasol. Jon Baptais i promisim paia blong heven bai kamdaun na kukim as bilong sin.

Wok Aposel 2:2 Na kwik tumas wanpela nois i kam long heaven, em i olsem krai bilong strongpela win.....

Matyu 3:11Em bai i baptaisim yupela long Holi Spirit na long paia.

I gat sait bilong man mas mekim, na i gat sait bilong God tasol ken mekim.

Dispela promis em bilong olgeta Kristen ken kisim nau long dispela laip. Yu no mas stap Kristen longpela taim. Nupela bebi Kristen ken kisim namba tu wok. Yu no mas Baibel Skul pastaim long kisim dispela wok bilong holines. Ol vilis pipol long bus ken kisim dispela namba tu tok. Yu no mas ritim planti buk pastaim bilong kisim holines. Na yu no mas wetim taim bilong dai bilong kamap holi. Nogat tru.

Aisea 35:8 ...Rot bilong holines em bilong ol manmeri i klin ken go long en. Na em tambu long husat ol i no klin. Rot bilong holines em bilong olgeta man maski sampela i long long, o, tingting sot, ol i no inap popaia long dispela rot.

Husat i save bilip em save kisim holines. Man i no bilip em no save kisim.

➤ *Aposel 15:9 Em i klinim ol bel bilong ol long bilip tru.*

➤ *Aposel 26:18.... ol i ken kisim samting papa i givim pikinini namel long ol husat i kamap holi long dispela bilip tru...*

God I save mekim wantu, olsem laitning tasol, long sem sekon man i bilip.

Malakai 3:1 ...Na Bikpela, husat yupela i painim, bai kam wantu insait long tempel bilong Em.

1 Korin 3:16yupela i stap tempel bilong God...

Mi no harim wanpela man i testifai “De bai de God I wok long mekim bel klin.” Nogat. Ol save testifai “Mi bilip tasol na God I bin sanktifaim mi.

Yumi glasim gen dispela tok Aposel Pol i salim long Korin.

Long 1 Korin 1: 2 Krais Jisas i bin mekim yupela holi. [KJV Sanctified]. Tasol long 1 Korin 3: 3 yupela i stap yet long pasin bilong olupela bel.

Yu no ken ting ol i gat namba tu wok, na as bilong sin wantaim. Nogat.

1. 1 Korin 1:2 Namba wan wok i got sanktifaikesin i save klinim sin man i bin bungim antap long as bilong sin. [acquired depravity].
2. Tasol dispela sanktifaikesin bilong namba wan wok i no save klinim as bilong sin yet.
3. Sanktifaikesin long 1:2 i no save gro na kamap namba tu wok.
4. Sanktifaikesin long 1:2 God I mekim wantu tasol na i pinis.

Sampela tisa i ting sanktifaikesin i stat long namba wan wok na i gro i gro na kompli long namba tu wok. Dispela tising i paul tru bikos oltaim **sanktifaikesin em wok bilong God, wantu tasol na i pinis**. Man i no mas wetim taim mau bilong go kisim namba tu wok. Sanktifaikesin em wok bilong God, na oltaim em i save mekim kwik wantu tasol. I no gat gro taim. I no save gro 25% na bihain 50%, 75% na las tru em 100%. Sampela holines tisa ol save tis olsem. Tingting bilong ol i no klia long sanctification [is instantaneous,]--mining kwik wantu.

Sapta 20 - Hangri long Holines

Kirap long monin taim, na kaikai, kaikai gen na slip. Kaikai long olgeta de wanwan. Em olsem wanem? Man em hangri na mekim. Tasol man em sik, i no laik kaikai. Tasol man i gat gutpela helt em i save kaikai olgeta de. Liklik bebi em save hangri, na krai long susu. Bilong wanem Kristen i go planti taim tumas na i no laik prea long kisim namba tu wok. Kristen laip i no gat strong bikos em i no krai hangri long kisim holines.

Sam 42:2 God..... mi laikim yu tumas, olsem man, nek bilong en i drai na i laik dringim wara.

Dispela kain man i kirap long moning taim em hangri long God. Slip long nait, em hangri long God. De bai de em hangri long God.

Jon 7:37 Jisas i sanap na i singaut, i spik, Sapos wanpela man i dai long wara, orait em i ken i kam long mi na i dring.

Matyu 5:6 Ol man i laikim tumas long kisim stretpela pasin, olsem man i hangry long kaikai na i dai long wara, em ol i ken amamas. Bai God inapim ol tru.

Sapos man i no save hetim as bilong sin, na i orait long wokabaut wantaim, em i no inap kisim namba tu wok. Bilong kisim namba tu wok, dispela i mas kamap spesol namba wan samting long laip bilong yu. Tupela tingting mas pinis. Tubel i mas pinis. Man husat trutru tanim bel, dispela i save tanim pes bilong en long Holines. Mining bilong tanim bel em man i tanim, lusim sin, na nau pes i poin long holines. Sapos pes bilong man i no poin long holines, i no bin tanim bel tru tru. Olsem Goroka i stap long rot i lusim Lae i go antap long Hagen, olsem tasol Holines i stap long rot i lusim sin na go antap long heven. Olsem tasol yu no ken kalapim holines na go long heven.

Hibru 12:14 Man i no gat pasin holi, bai em i no lukim Bikpela.

Mining-- Man i no gat [sanktifaikesin], bai em i no lukim Bikpela.

**[Luk save long pes 41]*

Hibru 12:14 Long Pisin Baibel = pasin holi

Hibru 12:14 Long Greek Bible = hagasmon

Hibru 12:14 long KJV ol tanim dispela tok "Holiness"

Na long planti arapela ves long KJV ol tanim hagasmon "sanctification"

Matyu 5:8 I save givim klia mining: Ol man bel bilong ol i klin,.....bai ol i lukim God.

Revelesen 20:12 Na mi lukim ol daiman i stap, ol man i gat nem na ol man nating, ol i sanap long long pes bilong sia king,

Ating bilong fitim ol ves wantaim: 'em i no lukim Bikpela' wantaim bel isi.

Kainkain we ol tanim long Inglis

NASB 1995

Pursue peace with all men, and the sanctification without which no one will see the Lord.

NASB 1977

Pursue peace with all men, and the sanctification without which no one will see the Lord.

Legacy Standard Bible

Pursue peace with all men, and the sanctification without which no one will see the Lord,

Amplified Bible

Continually pursue peace with everyone, and the sanctification without which no one will [ever] see the Lord.

American Standard Version

Follow after peace with all men, and the sanctification without which no man shall see the Lord:

English Revised Version

Follow after peace with all men, and the sanctification without which no man shall see the Lord:

New Heart English Bible

Pursue peace with everyone, and the sanctification without which no one will see the Lord.

World English Bible

Follow after peace with all men, and the sanctification without which no man will see the Lord,

Sapta 21 - Olpela Bel I Birua Long God

Rom 8:7Sapos tingting bilong man i bihainim pasin bilong olpela bel, dispela man i save birua long God. [bihainim tingting bilong olpela bel --the carnal mind KJV]

Galesia 5:17 ..olpela bel em i laik daunim Holi Spirit, na Holi Spirit em i laik daunim olpela bel. Dispela tupela i birua wantaim

Dispela pait i no save stap long bel bilong sinman. Dispela pait i kamap taim man i tanim bel na kamap Kristen. Nau olsem Jekop na Isau tupela i pait long bel bilong Rebeka, olsem tasol Spirit na olpela bel tupela pait insait long bel bilong Kristen. Dispela kain Kristen laip i no gat strong. I gat tupela tingting, tupela laik, na tupela bel.

*Jems 4:8 Yupela **man bilong sin**, bel bilong yupela i mas kamap klin, olsem man i wasim han bilong en na i kamap klin. Yupela **man i gat tupela tingting**, yupela i mas rausim dispela tingting nogut bilong bel bilong yupela.*

Husat dispela man i gat tupela tingting. Em dispela Kristen i gat olpela bel. Sande em laik gohet long bihainim Bikpela, tasol Mande em senis, na i gat narapela tingting long go bek. Dispela Kristen, em yet i no birua long God, -em dispela ol pela bel i stap yet insait long en i birua long God. [Pol i tok long dispela long Rom 7] As bilong sin i no inap kamapim wanpela gut pela aksin. Man yet inap mekim sampela gutpela pasin. Tasol as bilong sin nogat.

Sampela hap Baibel i soim klia man i gat As bilong sin

Genesis 6:5 Bikpela i lukim pasin bilong ol manmeri long olgeta hap i nogut tru. Ol manmeri i tingting tasol long ol samting nogut.

Jenisis 11:6 I no long taim na bai ol i wokim olgeta kain samting long laik bilong ol yet.

Jeremiah 17:9 Bel bilong olgeta man i save tingting oltaim long mekim pasin giaman. Tingting bilong man em i nogut tru

Luk 15:28 namba wan pikinini em i belhat, na i no laik i go insait....

Jona 4:9 Jona i bekim tok olsem, "Yes, kros bilong mi em i stret. Mi belhat nougat tru"

1 Sam 25:3 Nabal em i man bilong kros na pasin bilong en i no gutpela.

Rom 8:6 Sapos tingting bilong man i bihainim laik bilong olpela bel tasol, orait dispela man bai i dai.

I olsem, man husat i gat olpela bel em bai dai, bikos i no save fit insait long heaven.. Seten em poroman tru wantaim dispela olpela bel i stap insait long Kristen. Dispela as bilong sin i stap yet long bel bilong Kristen em givim trabel moa yet. Em i no gat malolo tru, o bel isi tru.

Long kamap nupela gen, dispela i olsem putim hankap long olpela bel. I olsem Barabas i pas long hul prison. Tasol sapos em i brukim hankap bilong em, orait dispela Kristen nau bai mekim sampela aksen i no stret. Em save bel hat, no sampela kain bikhet pasin. Na dispela Kristen i mas rives gia, na bakap bilong stretim rong em i bin mekim. Em i mas mekim olsem bilong goan long Kristen laip bilong em. Dispela kain Kristen i no gat dispela namba tu malolo bilong tewel Jisas I tok long en.

Dispela olupela bel, no as bilong sin i no inap senis na kamap gutpela. Ol kain skul i no inap piksim em, no ol kain trening i no inap helpim em. Pasta i no inap piksim em, ol gavman tu, na ol kain sios, i no inap. Pasim long sen no inap. God Yet I tok tru antap long dispela Barabas, na dispela Egak bilong sin, Samuel mas kilim i dai.

Rom 6:6 Yumi save long dispela long God i nilim olpela man bilong yumi long diwai kros pinis wantaim Em, inap long dispela bodi bilong sin i ken bagarap olgeta...
Galesia 2:20 God i bin nilim mi pinis long diwai kros wantaim Kraist.

Asua i save kamap olsem: Kristen i harim prising long holines, tasol ol i les long goan long namba tu wok. Na long dispela aksin, em i mekim sin, na kisim asua.

Tru tumas, ol sinman i no redi long kisim dispela namba tu wok. Dispela as bilong sin i no wanpela rong man i bin mekim. Nogat. Em wanpela siknes bilong tewel God I mas rausim. Na sapos man i no larim God i kilim dispela as bilong sin, orait i no long taim dispela as bilong sin bai bagarapim Kristen laip bilong yu. Jon Baptais i makim tupela kain paia, na man i mas makim wanpela long laik bilong en yet.

1. *Matyu 3:11 Em bai givim baptais long yupela wantaim Holi Spirit, na wantaim paia.*
2. *Matyu 3:12 Tasol pipia em bai i kukim long paia i no save dai.*

Sapta 22 - Tupela Malolo

Hibru 4:10 ...man i go insait long ples malolo bilong God, em i pinisim wok bilong en na i malolo,

Pren, dispela ples malolo em bilong go insait nau long taim bilong dispela laip. Sapta foa hia i no gat mining long pinisim wok hia, na go long heven. *Dispela “pinisim wok,”* i gat mining olsem,

Rom 12:1 Yupela mas givim bodi bilong yupela long God olsem ofa. Bodi i gat laip yet na yupela givim long God, na i bilong God wanpela tasol....

Matyu 26:39 ...i no olsem Mi laik, tasol olsem Yu laik.

Jisas I gat wanpela malolo I laik givim long ol sinman, na i gat narapela malolo I laik givim long ol Kristen:

Matyu 11:28.29 Yupela ol man i mekim hatwok na i karim bikpela hevi, yupela olgeta i kam long mi, bai mi givim yupela malolo. [Namba 1 malolo]

Yupela kisim dispela diwai mi givim long yupela, na karim long sol bilong yuela. Na yupela kisim save long mi. Long wanem mi save mekim pasin isi long ol man, na mi save daunim mi yet. Na bai bel bilong yupela i painim malolo. [Namba 2 malolo]

Olgeta tu-bel Kristen i gat pait insait long bel bilong ol, na long dispela ol i no gat malolo Jisas i tok long en.

Galesia 5:17 ..Yumi save, olupela bel em i laik daunim Holi Spirit, na Holi Spirit em i laik daunim olupela bel. Dispela tupela i birua wantaim

Taim man i larim Spirit i winim pait wantaim dispela aigris bilong ol pela bel, orait tewel bilong em i ken slip malolo.

Sapta 23 - Kisim Holi Spirit

Olgeta Kristen i gat Holi Spirit, tasl yumi mas klia long tok “KISIM” Holi Spirit.

Baibel i klia long olgeta Kristen i gat Holi Spirit.

Galesia 5:17 ..Yumi save, olupela bel em i laik daunim Holi Spirit,

Rom 8:9Sapos wanpela man i no gat Spirit bilong Krai, em i no man bilong Krai.

Jon 3:8 ...Olgeta man i kamap nupela long Holi Spirit, ol i olsem [win] tasol.

Nau sampela tok bilas, “Olsem wanem yupela i save skulim ol Kristen long beten long kisim Holi Spirit? Ol bin kisim Holi Spirit pinis.”

Bikos tok i klia long Buk Baibel, olgeta Kristen i no gat pulap long Holi Spirit. I gat planti ves bilong soim Baibel i tok long Kristen mas KISIM Holi Spirit.

Aposel 8:14 ol Sameria i kisim tok bilong God. [Pita wantaim Jon] i beten long God i helpim ol, na bai ol i kisim Holi Spirit. [mining pulap long Holi Spirit]

Aposel 19:1,2 Long Efesas em i painim sampela Kristen....V. 2. Em i askim ol, “Bipo yupela i bilip, na ating yupela i kisim Holi Spirit ? Na ol i tok, “Nogat.” V.6 Na Pol i putin han antap long ol, na Holi Spirit i kam long ol...

Aposel 2:38 Yupela olgeta wan wan i mas tanim bel na kisim baptais..... Na bai God i givim Holi Spirit long yupela.

Papa God, Jon Baptais, Apostle Pol, Pita, Matyu, Mak, Luk, Jon, na Jisas tu, olgeta i bin givim promis long ol Kristen ken kisim Holi Spirit.

Jisas tu i promisim ol disaipel Em bai salim Poroman:

Jon 14:16-18

Joel 2:29

Jon 14:26

Matyu 3:11

Jon 15:26

Aposel 2:38

Jon 16:7-13

Mak 1:8

Jon 17:17-19

Luk 3:16

Aposel 1:8 ...yupela [Kristen] bai kisim pawa, bihain long taim Holi Spirit i kam antap long yupela

Olsem i no gat rong sapos Aposel Pol i askim sapela Kristen long ol bin kisim Holi Spirit no nogat? Na em i stret tru, sapos ol Kristen i beten long kisim Holi Spirit.

Sampela i tok: “Yupea katim Holi Spirit hap hap.” Tasol nogat. Mipela i no save tok long namba wan wok man i save kisim hap Holi Spirit, na long namba tu wok man i kisim narapela hap bilong Holi Spirit. Mipela i no save lainim ol manmeri olsem.

Holi Spirit I save kam olsem WIN long sinman bilong em i ken kamap nupela gen. Em namba wan wok. Tasol Holi Spirit I save kam gen nau long Kristen, na Em I save KAPSAIT olsem wara. Holi Spirit I no hap-hap, tasol I save mekim tupela kain wok,

Aposel 2:17,18 Klostu long las de bai mi kapsaitim strong bilong Spirit bilong mi long olgeta manmeri v.18 Yes, long dispela taim bambai mi kapsaitim strong bilong Spirit bilong mi long ol wokboi na ol wokmeri bilong mi.

Dispela KAPSAIT i wankain olsem “baptais long Spirit.” Brata na Susa, harim. Jisas I no save kapsaitim Holi Spirit antap long ol sinman. Nogat tru.

*Jon 14:17....Spirit bilong tok tru. Husat ol manmeri bilong dispela graun i no inap kisim.
Jon 7:39dispela Em i tok long Spirit, husat ol husat i bilip long Em bai kisim.
Matyu 3:11 Em bai givim baptais long yupela wantaim Holi Spirit, na wantaim paia.
Matyu 3:14 ...Jon i tok.... Mi gat nid long kisim baptais long Yu...*

Jon i no askim Jisas long baptaisim em long wara. Nogat. Em i askim Em long dispela baptais long Holi Spirit na paia. Jon i no save baptaisim man long Holi Spirit. Em i save baptaisim man long wara, long husat i bin tanim bel. Jisas I no save baptaisim man long wara, Em i save baptaisim Kristen long Holi Spirit na paia tasol.

Lukim gut long tupela ves hia i gat tupela kain paia. Na yu yet mas makim wanem kain paia yu laik kisim:

Matyu 3:11 Baptais long....Holi Spirit, na wantaim paia.

Matyu 3:12 Em bai kukim ol skin bilong wit wantaim paia i no inap long dai.

Tok piksa i olsem:

Wit i makim ol Kristen

Plua i save makim Sios bilong Em

Baptais long paia i makim namba tu wok

Bakstua i makim heven

Skin wit i makim olupela bel

Paia i no save dai i makim ples hel

Sapta 24 - Kamap Nupela Gen

Sampela i les long harim prising bilong Holiness. Na tok “yupela save kalapim namba wan wok.” Tasol bilong strongim namba tu wok, mipela i no save daunim namba wan wok.

I no gat man inap kalapim namba wan wok, na kisim namba tu wok. Nogat. Namba tu wok i save sapotim namba wan wok. Nogut man i kisim namba wan wok na stap sot long namba tu wok. Namba wan wok em bilong man kin goan kisim namba tu wok.

Long namba wan wok God I save fogivim olgeta sin man i bin mekim pinis. Sapos man i lus tingting long sampela sin i bin mekim, em inap, God I lukim man i tanim bel bilong em, na Em I save fogivim olgeta sin wan taim. Fogivnes i no haphap, em God i mekim 100% komplit. Ol dispela sin i pinis na pinis olgeta.

Sam 103:12 Olsem hap sankamap i stap longwe long hap san i go daun, olsem tasol Em i bin rausim i go longwe long yumi ol pasin bilong yumi long kalapim lo.

Maika 7:19 Na Yu bai tromoi olgeta sin bilong ol i go long daunbilo tru bilong solwara.

Olsem dispela namba wan wok i no haphap wok God I save mekim. Em komplit na pinis, tok bilong kot i pinis.

Rom 5:1 Orait, yumi bilip pinis na God i bin kolim yumi stretpela manmeri.

Long ol Baibel ves i no gat wanpela tok we God bai fogivim ol sin man i laik mekim bihain long laip taim bilong em. God i save fogim ol sin man i bin mekim pinis tasol. Na long namba tu wok, em i no gat tok moa long fogivnes. Namba tu wok em i narapela kain wok olgeta. Em i wok bilong pinisim as bilong sin i stap yet long bel bilong Kristen.

Sapta 25 - Holines Na Nupela Kristen

Sampela i tok “Tru, i gat dispela Nambatu Wok long Baibel, tasol nogut yu autim tok long dispela, bikos em bai paulim tingting bilong ol pipel.” Tasol yumi ken opim Buk Baibel na lukim pasin long ol aposel mekim wanem.

1. Ol aposel i no haitim Nambatu Wok long ol Sameria.
Pul stori long Aposel 8.
2. Pita i no haitim Nambatu Wok long Konilias. Aposel 10
3. Ananias i no haitim Nambatu wok long Saul.
Aposel 9.
4. Prisila i no haitim Nambatu Wok long Apolos.
Aposel 18:26
5. Pol i no haitim Nambatu Wok long ol lain Efesas.
Aposel 19:6
6. Pol i no haitim Nambatu Wok long ol Tesalonaika.
Tesalonaika 4:3

Yes, ol i save autim tok long Holines long ol nupela Kristen. Olsem nogut pasta ekskus na tok: “Nogut mi pris long holines na paulim tingting bilong ol pipel. Moabeta mipela skul gen long kisim namba wan wok tasol.” Brata bilong mi, sapos yu yet no autim tok long holines, orait husat bai autim? Katikis bilong ol Katolik? Ol baptais? Lutern? Arapela i ting dispela tok Holines i no fit long ples maket. Tasol yumi mas autim tok inap ol hangri long kisim holines, na rot bilong kisim holines em sem rot bilong kisim namba wan wok. pastaim.

Wanpela ivanselis i laik go longwe insait long wanpela draipela bus. Tasol ol gavman i tok “Maski long go long dispela hap, ol dispela lain i olsem wel abus tasol.” Tasol dispela ivanselis i go na autim tok Holines long ol. Ol harim dispela prising na tingting bilong ol i lait tru long mining long tok em i save autim. Nem bilong dispela ivanselis em R.G. Flexon.

Sapta 26 - Holines Namba Wan Nit

Holines em i namba wan tok bilong Buk baibel. Tanim bel na kamap nupela gen, dispela i no senta bilong Baibel. Tanim bel na kamap Kristen, em bilong man i ken goan long kisim holines tasol. Sapos pasta i autim tok olgeta wik long holines, orait dispela i no inap bagarapim wok bilong God, no daunim namba wan wok. Nogat tru. Prising long holines i save helpim na strongim namba wan wok. Tru tumas Seten i save hetim na pait agens strongpela prising long holines, tasol dispela holines prising bai bagarapim wok bilong Seten. Holines em namba wan nit bilong sios:

Efesas 5:25-27 ...Kraist i sori long sios na i lusim laip bilong em yet bilong helpim sios. Em i mekim olsem bilong wasim sios na i kamap klin long waswas bilong wara wantaim tok.... Em i laik mekim sios i kamap naispela tru long ai bilong em, na bai sios i no gat doti na grile na kain samting olsem.

Efesas 4:11 Long sampela em i givim wok evanselis. Na long sampela em i givim wok pasto na tisa. V.12 Kraist i givim presen olsem bilong helpim yumi. [KJV for the perfecting of the saints]. Bilong ol Kristen ken kamap holi tru.

Jisas wantim Pol tupela i bin beten long ol Kristen ken kisim namba tu wok. Jon 17 Jisas I beten long Papa ken sanktifaim ol disaipel. 1 Tes 5:23 Pol i beten long God ken sanktifaim ol Tesalonaika, na Efesas, (3:14-21), Pol i beten long ol lain Efesas ken kisim strong bilong Holi Spirit.

Namba wan nit i no bilong ol haiden ken tanim bel na kamap Kristen. Pol i ting namba wan nit bilong ol kongrigesen bilong en -em bilong ol ken kisim nambatu wok. Jisas tu i gat sem kain tingting tasol.

Jon 17:9 Mi no beten long ol manmeri bilong dispela graun...

Em save, bilong ol sinman i tanim bel, ol Kristen i mas kamap holi pastaim. Pol i save autim tok long ol Kristen ken kamap holi. Aposel 19:1 Pol i save salim pas long ol Kristen ken kamap holi. 1 Tes. Pol i save beten long ol Kristen ken kamap holi. 1 Tes 5:23 Na Jisas i kapsaitim blut bilong ol yumi Kristen ken kamap holi.

Hibru 13:12 Olsem na Jisas tu i bin karim pen ausait long dua bilong banis, bilong mekim ol manmeri i kambp holi long blut bilong en.

Olsem nogut wanpela Kristen i stap sot long samting God I laik givim long en. Ol 66 buk bilong Baibel i poin long dispela senta wok God i laik mekim long ol Kristen.

Sapta 27 - Dai Long Sin

1. Strongpela laik bilong man i mas dai.
2. I no man yet i dai, tasol strongpela laik bilong en mas bruk.
3. Tasol man yet i mas stap laip insait long Krai.
4. Ol dispela kain "dai" man mas mekim, i no save kilim as bilong sin.
5. God wanpela tasol ken kilim as bilong sin taim man i bilip.

Rom 6:11 ...Olsem tasol yupela tu i mas tingim yupela yet i bin i dai na i no aninit long strong bilong sin moa.

Galesia 2:19 Mi hangamap pinis long diwai kros wantaim Krai.

Rom 6:6olpela bel bilong yumi em i dai pinis long diwai kros wantaim Krai...

I no olsem yu yet yu dai, tasol yu mas givap long strongpela laik bilong yu yet.

Rom 6:11 ...Yupela i bin pas wantaim Krai Jisas na yupela i stap laip wantaim God.

Galesia 2:20 ...Na nau mi stap laip, em i no laip bilong mi yet. Nogat. Krai em i stap laip insait long mi....

Tingting bilong yu i mas klia. I gat tupela dai Baibel i tok long en:

1. Em wok bilong man i mas givap long laik bilong en yet.
2. God Yet I mas pinisim as bilong sin. Man i no gat we long kilim dispela.

Man i mas dai tu sin, em olsem i mas daiaut long laik bilong em yet. Daiaut long nem bilong em yet. Daiaut long lain bilong em yet. Daiaut long we bilong em yet. Long Getsemani Jisas em piksa long yumi mas givap long laik bilong yumi yet. Em I swet blut bilong Em long gaden Getsemani.

Luk 22:42 yu no bihainim laik bilong mi. Nogat. Yu bihainim laik bilong yu tasol.

Dispela laik bilong man yet, i stap insait long man i strong tumas, na i mas bruk daun olgeta. Man i mas nilim laik bilong en long diwai kros. Em mas givap. Dispela, man i no save mekim long namba wan wok. Long namba wan wok man i save krai long fogivnes. Tasol nau, man i mas putim olgeta samting i dia tumas antap long alta, olsem Abraham bipo i mekim long Aisak. Dispela samting i no bilong mekim hariap. Man i mas tingim gut, na givap long olgeta poin wanwan God I laik soim long en. Em dispela mipela save kolim "dai tu sin." Man yet i mas mekim, dispela i no wok bilong God. Dispela wok God I givim long man bilong mekim. Man i mas givap long laip bilong em yet olsem ofa long God.

Yu mas sakrifaisim laip bilong yu -i no bilong yu moa. Aposel i tok long ol BRATA Kristen long mekim. I tru tumas, ol haiden i no inap mekim dispela kain ofa.

Rom 12:1 ...Yupela mas givim bodi bilong yupela long God olsem ofa. Bodi i gat laip yet na yupela givim long God.

Oi dispela man i save mekim pinis, long dai long laik bilong en yet -tasol dispela i no save kilim as bilong sin. Konsikresin, em komplit, tasol as bilong sin i stap yet. I no gat we man yet ken kilim dispela as bilong sin. Em i spesol wok bilong God I no save givim long narapela.

*1 Tesalonaika 5:23 God em i as bilong bel isi, **em yet i ken** mekim yupela i holi olgeta.V. 24 **Em bai i mekim** olsem.*

*Matyu 3:11 **Em bai i baptaisim** yupela long Holi Spirit na long paia.*

Dispela wok bilong sanktifaikesin God I save mekim olsem lait bilong klaut i pairap. Wantu tasol long taim man i bilip. Em no nitim 6-pela wik bilong kilim as bilong sin.

Rom 6:6 Yumi save, olupela bel bilong yumi em i dai pinis long diwai kros wantaim Krai bilong pinisim strong bilong sin i save wok long bodi bilong yumi

Yu mas klia long tupela samting long V.6

1. Dispela olupela bel bilong yumi (em laik bilong yumi yet) i mas hangamap long diwai kros.
2. Tasol dispela “bodi bilong sin” God yet mas kilim i dai wantaim paia bilong Holi Spirit.

Sapta 28 - Ol Promis Bilong Kisim Namba Tu Wok

Promis bilong Profet Joel

Joel 2:28 Bihain bai mi kapsaitim spirit bilong mi long olgeta manmeri....

Joel 2:29 Na long dispela taim bai mi kapsaitim spirit bilong mi tu long ol wokboi na ol wokmeri nating.

Promis bilong Jon Baptis

Matyu 3:11 [Jon i tok] Em bai baptaisim yupela long holi Spirit na long paia.

Promis bilong Papa God

Joel 2:28 Bihain bai mi kapsaitim spirit bilong mi long olgeta manmeri....

Promis bilong Jisas Kraist

Jon 14:16 Na bai mi askim Papa, na em bai i givim yupela narapela Helpim bilong strongim yupela.

Promis bilong Pita

Aposel 2:38 Na pita i tokim ol,na bai God i givim Holi Spirit long yupela

Promis bilong Aposel Pol

1 Tesalonaika 5:23 God...Yet I ken mekim yupela i holi olgeta.....V.24. ...Em bai i mekim olsem.

2 Pita 1:4 KJV Whereby are given unto us exceeding great and precious promises: that by these ye might be partakers of the divine nature.

[Mi ken tanim olsem: Olsem mipela save kisim ol draipela promis i dia tumas. Na long ol dispela promis bel bilong yumi ken stap wankain olsem God I stap.]

1 Korin 7:1 Ol brata tru bilong mi, yumi kisim pinis ol dispela promis bilong God. Olsem na yumi mas rausim olgeta doti bilong bodi na bilong spirit, na i stap klin. Na yumi mas pret long God na bihainim tru pasin holi oltaim.

Ol dispela promis em rot bilong kisim namba tu wok sanktifaikesin.

Sapta 29 - Pro-vis-nol Sanktifaikesin

I gat sampela kain man husat i no kisim namba tu wok sanktifaikesin, tasol yet blut bilong Kraist klinim na ol inap go long heven.

1. Ol bilip man long O.T. (lukim Hibru 11) i stap pastaim Jisas I bin go bek long heven bilong kapsaitim Holi Spirit.
2. Liklik bebi i no gat sans long prea na kisim namba tu wok.
3. Mama i karim man tingting longlong.
4. Planti Kristen i no gat sans long kisim save bilong namba tu wok.
5. Ol husat i hangr tru long painim holines, tasol ol no kisim yet.

Jisas I no inap salim ol disela lain long hel. Marimari bilong God I save sanktifaim ol dispela lain na ol go stret long heven.

Dispela sem kwestin i save kamap olgeta taim “Ating Kristen i no gat namba tu wok sanktifaikesin em bai go long heven?”

1. Wanpela pikinini bilong God i no inap go long hel paia.
2. Sapos wanpela Kristen i givim baksait long singaut bilong God, 1 Thesalonaika 4:7, orait em bruk wantaim God na i no stap Kristen moa.
3. As bilong sin, ol pela bel i no save fit long heven em ples holi.
4. Hibru 12:14 KJV Without holiness no man shall see the LORD.
Man i no gat [sanktifaikesin: Greek Baibel] bai em i no lukim Bikpela.
5. **1 Pita 1:16 “Mi stap holi, Olsem na yupela tu i mas i stap holi.”**
6. Ol dispela lista antap long pes, Jisas i save klinim long blut bilong em, na ol Baibel tisa i save kolim pro-vis-nol sanktifaikesin. God Em I stret olgeta na i no inap paulim kot long wanpela man. Em save wokim rot inap kingdom bilong em i no bruk daun.
7. God yet Em Jas bilong husat i fit long heven, na husat i fit long hel paia.

Sapta 30 - Man I Mas Bilip Long Bel

Man i bilip em save kisim pulap long Holi Spirit. Man i no bilip em i no save kisim pulap long Holi Spirit. Bikos dispela wok i antap tumas, na bikpela tumas, na draipela tumas,

orait i gat wanpela rot tasol long man i ken kisim -em long bilip tasol. Yumi lukim Baibel i tok wanem:

Aposel 26:18 ...Ol i ken kisim namba wantaim ol manmeri i bilip long mi na i kamap holi pinis...

Aposel 15:9 ...long bilip tasol em i mekim bel bilong ol i klin

Gal 3:14 ...Yumi ken bilip long gutnius na kisim Holi Spirit

Efesas 3:17 Na long bilip bilong yupela, Krai i ken i stap long bel bilong yupela.

Galesia 3:14 yumi ken bilip long gutnius na kisim IHoli Spirit

Rom 10:10 Long bel yumi save bilip na God i kolim yumi stretpela manmeri.

Sampela i givim testimoni olsem wanem ol kisim namba tu wok:

1. William Cowper: Long bilip tasol mi lukim blut i ran, i kam long ol sua i op.
2. Louisa M. R. Stead: Em swit tumas long bilip long Jisas, na bilipim Tok bilong Em tasol, na kisim mololo long promis bilong Em. Na bilip long blut i gat pawa bilong klinim bel, na long bilip tasol, kalap insait long dispela blut tais bilong Em.
3. C. H. Morris: Mi bilipim long Tok bilong God i tok "olgeta man husat i laik," dispela promis em bilong mi tu. Mi bilipim dispela gutpela tok, na Em I brukim kalabus bilong sin.
4. Haldor Lillenas: Bilong wanem yu laik raun raun long ples nating? Long bilip tasol brukim wara Jordan, maski ol wara tais bilong en.
5. Minnie A. Steele: Mi wok tru long painim Bikpela, na mi bilipim tok bilong Em, na wantu tasol ol hevi bilong mi i rolawe pinis.
6. Charles P. Jones: Wankain olsem Jekop bipo tru, mi pait pait wantaim Bikpela, na wantu tasol mi strongim bel bilong mi, na sanap antap long Tok bilong Em.
7. H. L. Cox: Olsem mi save beten strong tru, maski ol arapela i ting wanem. Mi hangri tru long kisim dispela blesing, na mi mas painim kaikai bilong soul bilong mi. Na las tru, long bilip tasol mi holim Em long han bilong mi, na wantu tasol God I kisim bek mi. Pres God em samting tru tru.
8. D. W. Whittle: Mi yet mi no save olsem wanem God I bin givim dispela bilip long mi. Na mi no save olsem wanem taim mi bilipim Tok bilong Em, Em i givim bel isi long mi.
9. James Nicholson: Bikpela Jisas mi wet long lek bilong yu, na krai tru bilong kisim. Long bilip tru bilong mi, mi lukim blut bilong yu ran daun... Dispela blesing bilong antap mi kisim nau long bilip.
10. J.H. Stockton: Ol husat sin i bagarapim yu, yu kam. Bikpela Em marimari tru. Na em bai givim malolo long ol husat i bilipim Tok bilong Em.

11. Ralph E. Hudson: Long diwai kros, long diwai kros, hia mi lukim lait namba wan taim. Long hia, long bilip tasol ai bilong mi op.

Yes, God I save sanktifaim man long BILIP, tasol dispela bilip i mas i gat as bilong sanapim. Jisas i soim sampela i no gat we bilong bilip.

Jon 5:44 Yupela i ken bilip olsem wanem, husat i kisim ona wanpela i kam long narapela....

Olsem i gat kainkain risen long wanem man i no inap bilip tru. Dispela bilip tru i no wankain olsem man i mekim insait long kru bilong en. Nogat. I no olsem $2 + 2 = 4$. Dispela bilip i save kamap dip insait long bel long taim man i save putim pul ofa antap long alta. 99% tasol em bai pasim rot long bilip tru. Man i mas mekim pul 100% ofa antap long alta bipo em i ken bilip tru.

Jon Wesli i givim faiv pela poin long bilip tru:

1. Yu mas bilip tru tru God I bin promisim dispela insait long Baibel.
2. Yu mas bilip tru tru samting God i promisim Em inap mekim.
3. Yu mas bilip tru tru God Em inap mekim dispela wok nau tasol.
4. Yu mas bilip tru tru God Em i mekim nau tasol.

Sapos yu got dispela tingting “God BAI mekim,” dispela kain tingting i save subim bihain, bihain, bihain. Setan tu i orait long dispela. Na dispela man i no inap kisim namba tu wok. Bilip i mas kamap inap long NAU tasol. Dispela em laik bilong God, Em Yet I redi long mekim nau tasol, na wetim bilip bilong yu.

5. Na long taim man i bilip pinis, na bel bilong em i klin PINIS, orait Holi Spirit i save witnis long dispela wok i tru.

Hibru 10:14,15. Ol manmeri em i mekim i kamap holi, V.15. Holi Spirit tu i autim tok long yumi....

Dispela witnes i no inap kam nating, nating. Holi Spirit i no save witnes long samting i no kamap yet. Witnes bilong Holi Spirit i no save klinim bel. Long bilip tru tasol God I save klinim bel. Bel i kamap klin pinis, orait nau Holi Spirit ken witnes long dispela. Olgeta witnes i no wankain olsem. God I save givim witnes i save fitim man stret.

Jon Wesli i tok “ God Em bai givim dispela witnes stret spirit to spirit. “ Em i no save kam raun long wanpela ensel, o ivanselis, o pasta, o misineri, maski husat. Em save kam stret long God.

Sapta 31 - Primitiv Holines

Primitiv, mining: ol kain samting bilong bipo bipo tru. Long Baibel tisa “primitiv holines,” i gat mining olsem: God i kamapim Adam holi. God I no bin krietim em wantaim sin.

Jenisis 1: 27 God i wokim ol manmeri na ol i kamap olsem God yet.

Jenisis 2: 7 God, Bikpela i kisim graun na em i wokim man long en. Na em i winim win bilong laip i go insait long nus bilong man, na man i kisism laip.

Sin i no save stap insait long Das bilong graun, bodi bilong man, win bilong en, o blut bilong en. Sin em samting bilong bel bilong man taim em sakim komanmen bilong God.

Olsem, God i save kamap Adam holi, tasol dispela holines i no bin winim traim bilong Setan. Na tu, Adam i no yusim laik bilong en yet long kisim dispela holines.

Long dispela, God I save putim diwai tambu namel long gadin, em bilong Adam ken winim dispela traim na goan long holines. Tasol nogat. Adam i sakim tok, na lusim dispela “primitiv holines” God I bin kamapim long en.

Tude i no gat wanpela husat i gat “primitiv holines.” Em bikos mama i no save karim yumi wantaim holines. Em save karim yumi insait long sin.
Sam 51: 5 Mi stap yet long bel bilong mama, na mi man bilong sin.

Holines man i save kisim i narakain olgeta. Adam i no save bilip na kamap holi, tasol yumi mas bilip na kamap holi. Dispela holines i no bilong yumi. Adam i save kisim holines nating nating, i no gat sans long yusim laik bilong en yet, na tok “Mi laik.”

Tude, long laik bilong yumi yet, mas winim ol traim bilong Setan, na wokabaut long haiwe bilong holines.
Yumi mas kisim holines bilong God insait long bel bilong yumi. I nogut man i sanap na testifai “Mi stap holi.” Bikos dispela holines i no bilong yumi yet, em bilong God. Na i gat wanpela rot long kisim dispela holines bilong God, em long bilip tasol.
Kainkain Samting Namba Tu Wok i no inap mekim,,,

Sapta 32 - Kain samting Sanktifaikesin I No Save Mekim

Baibel wanpela samting tasol inap putim stretpela mak bilong Holines. Sapos mak i antap tumas, orait ol man i no inap kisim. Na sapos mak i daun bilo tumas ol man bai paul long dispela tu. Mak stret bilong Holines i olsem:

1 Tim 1:5 As bilong komanmen em pasin bilong givim bel i kam aut long bel klin.

Wanem samting i sot long dispela mak em i no Holines tru
Wanem samting i moa na winim dispela Baibel i no save sapotim

1 Rom 8: 26 ...Spirit tu i helpim ol hap i no gat strong bilong yumi.

Mipela i gat planti kain samting yumi sot long en long bodi sait na long tingting tu, tasol Holi Spirit i no save rausim dispela, Em i save helpim.
Yumi no gat gutpela tingting long beten, tasol Holi Spirit I save helpim.
Man i gat namba tu wok, dispela trabel i save stap yet.

Jenesis 3: 19 ...yu stap das

Man i no gat namba tu wok em das, tasol Kristen i gat namba tu wok, em das tu.

Tripela, Jop, Elijah na Paul olgeta i no laik stap moa long dispela graun.

Jop 3

1 King 19: 4

2 Korin 1: 9

Olsem “namba tu blessing holines” i save fit wantaim ol kain kain hevi bilong dispela graun.

2 Jon Wesli i no save yusim dispela tok “sinless perfection.” Em bikos sampela taim Kristen inap brukim lo em i no gat save, o em i no gat laik brukim long bel bilong en. I gat tupela kain brukim lo. 1. Man i laik mekim. 2. Man i mistek na mekim. Na dispela tupela kain i nitim blut bilong Jisas bilong klinim.

Ol ensel i gat pafeksen bilong ol yet. God I bin kamapim Adam pafek. Na God I gat pafeksen bilong Em Yet i save winim ol arapela pafeksen. (absolute perfection). Na ol Kristen i gat kain pafeksen bilong ol yet. Jon Wesli i save kolim “Kristen pafeksen.”

Ol Kristen i no save brukim lo long laik bilong em yet. (Willful sinning).

Na sapos man i mistek long tingting, orait em mekim mistek tu long wokabaut tu. Ol Krsten i stap long bodi yet i save mekim planti mistek. Namba tu wok i no save pikisim dispela.

Jisas i lainim ol disaipel long mekim dispela prea:

Luk 11: 4 Lusim ol sin bilong mipela.

Em i no mining long “willful sinning,” tasol em mining man i brukim lo, tasol i no gat laik long brukim. Yet em nitim God I fogivim em.

Pol yet i brukim lo i no gat mining long mekim: Aposel 23: 1 - 5

Pita em pulap long Holi Spirit, tasol Pol i krosim nogut tru. Galesia 2

1 Jon 2:1 ...sapos wanpela man i mekim sin, yumi gat wanpela namelman wantim Papa, stretpela Jisas Kraist

Em olsem, sapos wanpela Kristen i paul long samting, em i no mas givap long Kristen laip na stat ova gen. Em i ken konfes, askim fogivnes na goan long Kristen laip.

Olsem 5-pela kongrigesen long Esia, i gat nit long stretim sampela trabel long sios bilong ol.

Tasol Jisas i save givim spes long tanim bel, na em i wokabaut yet namel long lam bilong ol.

Na Jisas i no save stretim ol pikinini bilong Setan, Em i stretim ol pikinini bilong em yet. Lukim Hibru 12. Sapos aiaplen i arawe long skai, orait em no ken givap, paillet i mas stretim wing tasol, na stretim we bilong en. Em i olsem long Kristen laip. Sapos wanpela Kristen i arere, orait em i mas stretim na goan. Long dispela trabel mipela gat rivaival lotu bilong Kristen i ken kam na stretim wanem trabel long laip bilong en.

Sampela ol giaman na ting ol no save mekim mistek. Foa-pela i no bin mekim mistek.

1. Ol man i dai pinis. 2. Ol nupela bebi mama i no karim yet. 3. Ol man husat i no bin mekim wanpela samting. Na 4. Sampela i ting Pop i no bin mekim wanpela mistek.

3. Namba tu wok i no givim ol man wankain tingting.

I gat kainkain bilip long we bilong baptaisim man.

I gat kainkain aidia long mining bilong profesi.

Aposel 15: 36 na Galesia 2, Pol na Banabas i gat narapela narapela tingting, tasol tupela i pulap long Holi Spirit.

Aposel 21: 17 Jems i strong olgeta long Pol i mas lotu insait long Tempol long Jerusalem.

4. Ol Kristen i gat narapela narapela tingting long ol samting Baibel i no gat tok long en.

Ol kain Skul inap putim kainkain lo long ol studen, na dispela lo i no save stap insait long Baibel.

I olsem: dispela lo i stap ausait long Baibel.

Tasol ol tok i stap insait long Baibel em bilong ol Kantri, na bosim ol kain pasin bilong ol pipel.

Na tok i stap ausait long Baibel, yumi gat narapela narapela kain tingting.

Long kulta (Culture) o pasin bilong ol pipel, Timoti em hapkas, Titas em Gentail. Pol i katim skin bilong Timoti, taso em i no katim skin bilong Titas. Dispela em ausait long Baibel na i no tok save long dispela. Namba tu wok i no save mekim wankain pasin long tupela.(Ac 16 ; Gal 2: 3)

Long namba wan kibung bilong sios, ol putim wanpela kain mak bilong ol lain Juda, na narapela kain mak long ol Jential. Stori long Aposel 15.

Ol Kristen long ples ais i gat kainkain pasin bilong ol, na ol Kristen long ples hat tumas i gat narapela kain pasin. Tupela wantaim save bihainim tok bilong Baibel, tasol ol kain pasin ausait long Baibel i go kainkain we bilong ol yet.

5. Namba tu wok i no save givim yumi wankain pasin.

I olsem taim God I save kapsaitim Spirit bilong Em long wanpela lotu bung, orait kainkain man i gat kainkain pasin. Wanpela man em ai wara, narapela man em lap, narapela man olsem man i spak, narapela i putim han antap, narapela man i go kalap kalap nabaut. Kainkain man i gat kain kain pasin bilong en yet. Nogut wanpela man i daunim kain pasin bilong narapela man. Man husat em kalap nabaut em i no ken daunim man i sindaun nating. God I no save kam long sem we long olgeta lotu bung. Larim Em I kam long laik bilong Em Yet. Maski long traim long fosim Em long kam long laik bilong yu yet. Nogut yu kalap nating nating na Holi Spirit I no save mekim.

Tupela evanselis i sindaun antap long lotu. Na wanpela i strongim Dokta Flexon, kaman, kirap na wokabaut wantaim mi. Tasol Dokta Flexon i bekim tok “Fridom bilong mi long sindaun hia, i winim fridom bilong yu long wokabaut. Em bikos man i save fosim em yet long go wokabaut.

Wanpela taim mipela stap long wanpela klas long Baibel Skul, na Holi Spirit I kapsait strong long dispela klas rum. Taim bilong klas pinis, tasol nogat, Holi Spirit I brukim taim tebol na kam daun strong moa yet insait long dispela klas rum. Ol arapela studen i wet long kam insait long nekis klas tasol, nogat. Spirit Em strong yet. Orait, bihain tisa i tok “Ol studen harim, dispela pasin bilong Holi Spirit em inap long olgeta de bilong yu, bilong pinisim laip bilong yu.” Na mi ting dispela tok em tru tumas. Tasol bihain, mi save lukim, Holi Spirit I no save kam long sem we olgeta taim. Yes. sampela taim yumi amamas na hepi tru, tasol narapela taim nogat. Dispea em i no mak Holi Spirit I bin lusim mipela pinis.

6. Namba tu wok em no save bagarapim (personality)

I olsem: Yu bai stap yu yet. Baibel i save givim stori long kain pasin bilong ol pipol, Moses em pasin bilong isi
Pita em pasin bilong toktok
Pol em pasin bilong save
King Devit i no save pret
Jon em pasin bilong givim bel
Jems, brata bilong Jisas, em lida bilong sios
Namba tu wok i no save senisim ol dispela. Kisim namba tu wok yu bai stap yu yet.

7. Namba tu wok i no save pinisim taim bilong gro long Kristen laip.

Nogat. Namba tu wok i save pinisim tu-bel tingting, na nau Kristen inap gro gutpela tru. Ol man i no save kamap soldia long wanpela de. I gat planti mun bilong trening, trening, na moa trening bilong kamap soldia. Na i wankain olsem long Kristen laip. Moses i brukim Ret Si, na Josua, i brukim wara Jodan, tasol planti graun i stap yet. Namba tu wok i no save pinisim Kristen laip bilong man. I gat planti wok bilong gohet moa yet.

8. Dispela namba tu wok i no save kisim yumi aut long taim bilong traim.

Setan i gat olkain trik bilong bagarapim Kristen laip. Na namba tu wok i no save kisim yumi aut long ol dispela kain traim.

Tingim, Setan yusim meri bilong Potifa bilong traim Joseph. Sampela i ting long namba tu wok i no gat moa dispela kain traim. Ol paul tru.

Meri bilong Yuraia i traim king Devit, na Devit i pundaun

Setan i yusim Iv bilong traim Adam, na Adam i pundaun

Setan i yusim bodi bilong man bilong traim bel bilong em.

Jisas em hangri, na Setan tok “yu tanim ston long kamap bret.”

Ol dispela i save soim Namba tu blesing Kristen i no kamap fri long traim.

Bilong pinisim dispela laip yumi gat traim, tasol God i givim promis --

1 Korin 10: 13 ... wantaim traim tu Em bai wokim wanpela rot bilong ranawe

9. Namba tu blesing i no save sevim man long ol traim bilong graun.

Trak i bagarap long maunten na Kristen i dai pinis long dispela.

Paia inap kukim haus bilong Kristen i gat namba tu wok.

Ol inap brukim haus na stilim mani bilong Kristen.

Sampela Kristen i stap rabis tru, na nogat sampela mani bilong givim long ofa.

Sampela Kristen ol sik na marasin i no save helpim

1 Tim 5: 23 yusim liklik wain bilong tingim bel bilong yu na ol sik yu save gat planti taim

2 Tim 4:20 Trofimas mi bin lusim long Militam taim em sik yet.

10. Kristen husat i bin kisim namba 2 wok i no ken ting nau mi no nitim blut bilong Jisas moa.

Sam 130: 3 Sapos yu kaunim olgeta sin bilong mipela bai husat inap long winim kot bilong yu ?

I no gat man long graun em inap sanap long pes bilong God sapos em i no gat wanpela “namel man.”

1 Timoti 2: 5 ...wanpela God tasol i stap. Na i gat wanpela namelman tasol i sanap namel long God na ol manmeri, em dispela man Krai Jisas.

Jisas em Hai Pris bilong mipela bilong go toktok wantaim Papa God. Mipela mas hait ananit long blut bilong Em bikos mipela sot long inapim olgeta lo bilong Em. Kainkain samting yumi nit long mekim yumi no mekim. Kainkain samting yumi mekim em mistek na i kamap sot long inapim holi lo bilong Kraist. Yumi man olgeta i save mekim mistek long tingting, toktok, na wokabaut. Long ol dispela mipela no save opim dua long “willful sinning,” tasol mipela tok long mipela stap yet olsem Pol i tok “sos pen graun.”

2 Korin 4: 7. Bikos yumi save stap olsem, orait yumi no inap sanap wanpis long pes bilong God. Ol dispela kain sot i save brukim pafek lo bilong God. Husat Kristen i save stap klostu moa long God, yet em nitim blut bilong Kraist long karamapim.

1 Jon 3: 4 Sin em pasin bilong sakim lo.

Bilong fitim dispela ves wantaim olgeta arapela ves, em olsem: Sin em trabel bilong bel. Em samting man i laik long mekim [willful sinning] insait long bel bilong en. Dispela yu no ken kolim mistek.

Rom 10: 3 ...ol i laik kamap stretpela man long strong bilong ol yet. Olsem na ol i no bin aninit long God na larim em i mekim ol i kamap stretpela man.

“Not our own righteousness, but Christ within, living and reigning and saving from sin,”

Rev 14: 4 Bikpela, yu wanpela tasol yu stap holi

....mining God I gat holines BILONG Em Yet. Yumi no gat holiness BILONG yumi yet. Holines mipela save kisim em Jisas insait long bel bilong yumi. Na yumi yet i no gat namba long wanpela samting.

11. Intaia sanktifaikesen i no save rausim laik bilong manmeri i slip wantaim. Dispela strongpela laik God Yet I save putim insait long tupela wantaim. Tasol God I putim strong pela lo bilong ol mas kontrolim dispela laik. Na husat i kisim namba tu wok, orait dispela laik i save stap yet.

Hibru 13: 4 Marit em i gutpela samting tru, na yupela ol marat i mas lukautim gut marat bilong yupela, bai em i stap klin tru long ai bilong God. Yupela i save, God bai i bekim pe nogut long ol manmeri i mekim ol kainkain pasin pamuk.

Em sin bilong man i kamapim pasin bilong meri. Na em sin bilong meri i kamapim pasin bilong man. God I wokim man man, na meri meri. Na husat i senisim dispela nabaut i save sakim lo bilong God. God I laikim man i maritim meri, na ol pikinini em plan bilong Em Yet.

12. Intaia sanktifaikesen i no save rausim olgeta pret. Mi harim wanpela man em pris long

1 Jon 4: 18 man i save laikim ol arapela, em i no save pret.

I gat tupela kain pret:

1. Pret i save kalabusim man, i kam long as bilong sin. Em man em save pret long ol pipel i ting wanem long Kristen laip bilong em. O man i gat wanpela kain pret long dai, na go lukim pes bilong God.

2. Tasol i gat narapela kain pret long pasin bilong man tasol [natural fear]. Olsem pret long ol kain wel animal, o klaut i paiap.

Sampela taim tu i gat man i tok “Mi no pret long wanpela samting,” na dispela i save kamap long bikhet bilong em.

Testifai bilong aposel Pol:

2 Kor 7: 5bel bilong mipela i pret.

1 Kor 2:3Mi save pret

Buk Tu - N. T.

Piksa long Holines

Sapta 1 - Waitpela Klos

Revelesen 19:8 Na God i givim em waitpela klos, em i naispela tru na i lait moa, na i kilin tru, na em i putim dispela long bodi bilong en.

I gat kainkain laplap bilong ol ples:

1. silk ol save kisim long wanpela kain wom.
2. wol ol save kisim long gras bilong ol sipsip
3. kotan ol save kisim long wanpela kain gras.
4. linin ol i save kisim long narapela kain gras

Ol dispela kain waitpela klos long Baibel em linen. Moses i bin givim tripela lo long ol Isrel i gat strong pela mining.

(1) Livai 19:19 Yu no ken larim ol bulmakau samting bilong yu i givim bel long narapela kain bulmakau samting. (2) Yu no ken tromoi kain kain pikinini kaikai long gaden bilong yu. (3) Na tu yu no ken putim long yu wanpela klos i abusim naispela waitpela rop na ol gras bilong sip sip.

Lo 22:11 Yu no ken putim klos ol i wokim long kain kain samting bilong wokim olsem long gras bilong sipsip wantaim tret bilong linen.

Dispela gavman bilong Moses mipela no save bihainim tude, tasol i gat tising na mining long yumi.

Dispela wol ol save kisim long sipsip yu no ken putim long skin bilong yu. Em bai skrapim skin bilong yu nogut tru. Dispela wol (olsem sweta) i makim tru as bilong sin i save skrapim laip bilong Kristen. Trabel, trabel, trabel long pulim yu nabaut nabaut long Kristen laip. Dispela kain wol [sin] i no inap go insait long heven.

Galesia 5:17Olpela bel em i laik daunim Holi Spirit, na Holi Spirit em i laik daunim olpela bel.

Long ples nating planti taim em save hat tru, na ol putim dispela linen klos, em save naisim skin na mekim kol liklik. Dispela naispela, waitpela linen i piksa tru long holines. I no gat skrapim olsem gras bilong sipsip long laip bilong man. Prut bilong Spirit i kamap gutpela tru.

Galesia 5:22.pasin bilong sori, na amamas, na bel isi, na pasin bilong larim ol i rongim yumi, na pasin bilong helpim ol man, na wokabaut stret

God I no laik ol dispela samting i save mikis, mikis. Lait wantaim tudak, sin wantaim holines, gavman i bosim sios, sinman mikis wantaim ol kristen, gutpela pis, na pis nogut, wit wantaim pipia gras, haus masalai wantaim haus bilong God.

1 Korin 6:15-19.Bodi bilong yupela i hap hap bilong bodi bilong Krai,Bodi bilong yupela em i haus holi bilong Holi Spirit.

2 Koring 6 14-18,Ol haiden ol i narakain, olsem na yupela i no ken wokabaut wantaim ol na helpim ol long pasin bilong ol....Olsem wanem stretpela pasin na pasin bilong sakim lo tupela i ken pren wantaim ? Olsem wanem lait i ken bung wantaim tudak ? v 15 Ating Krai i save stap wanbel wantaim Seten, a ?... Olsem wanem bai yumi bungim haus holi bilong God wantaim Haus tambaran ?...Yupela i mas lusim ol, na i go i stap long narapela hap.

Waitpela linen i makim holines. Wol bilong sipsip i makim as bilong sin. Long dispela trabel tasol, planti Kristen i no save goan long kisim holines. Ol hat tru long brukaut long wantok bilong ol, lain bilong ol, famili bilong ol, graun bilong ol, na mani bilong ol. Ol hat tumas bilong pikap long diwai kros bilong sem na karim wantaim Kraist. Nogut yu sanap na testifai “holines, holines,” na yu no bin brukaut long ol pasin nogut bilong dispela graun. Sampela i no amamas we bilong holines, na ol laik painim wanpela isi kalapkalap lotu, -wanpela kain lotu we i no gat wok long karim sem bilong diwai kros. Ol laik holim han bilong Kraist na Seten wantaim. Tasol dispela linen i no ken mikis wantaim wol. Klinpela, waitpela linen i makim holines.

Rev 15:67-pela ensel...ol i bin pasim naispela laplap i klin tumas na i lait tru.
Mak 15:46Josep i baim waitpela laplap, na em i kisim bodi bilong Jisas i kam daun, Na em i kisim bodi bilong Jisas i kam daun. Na em i karamapim em long waitpela laplap,
Eksodas 28:6 Ol putim long klos bilong het pris.
Eksodas 26:1haus sel holi....Ol laplap i mas i stap rop i liklik tru i waitpela...
Revelesen 3:5,18Sapos man i winim pait, orait bai mi putim dispela kain waitpela klos long emMobeta yu baim waitpela klos bilong karamapim skin bilong yu, na bai ol man i no inap lukim yu stap skin nating na yu gat sem....

Sampela Kristen i ting ol ken putim kain klos long laik bilong ol yet. Ol tok “Baibel i no gat tok long wanem kain klos mi save putim.” Tasol ritim:
Matyu 22:11-13Na em i lukim wanpela man i no bin putim gutpela klos bilong de bilong marit. Na king i tokim em, ‘Pren olsem wanem na yu no putim klos bilong de bilong marit na yu kam insait hia?’ Tasol em i no gat tok. Olsem na king i tokim ol wokman olsem: ‘Yupela pasim lek han bilong em na tromoim em i go ausait na i stap long tudak...

Sampela ves moa i gat tok long wait-pela linin klos Rev. 19:4; Rev. 3:4; Rev. 7:9,13,14

Sapta 2 - Wara

Long Baibel wara bilong dring i save makim Holi Spirit.

Aisea 44:3 ...bai Mi kapsaitim wara long man i nek i drai na planti wara long graun i drai. Bai Mi kapsaitim spirit bilong Mi long tumbuna pikinini bilong yu, na blessing bilong Mi long pikinini bilong yu. Rev 21:6Sapos man i dai long wara, bai mi orait long em i ken dring long hul bilong wara bilong laip

Wara bilong Waswas i save makim Holi Spirit

Eksodas 40:30-33 putim dispela dis bilong waswas namel long haus sel....Na Moses na Eron na ol pikinini man bilong em ol i wasim ol hanna ol fut...taim ol i go insait long haus sel...taim ol i kam klostu long alta, ol i waswas, olsem BIKPELA i givim strongpela tok long Moses.

Maski klin o doti pris mas waswas pastaim long go insait long Haus Sel. I no olsem fut doti, na han doti. Nogat. Ol mekim tok piksa long man i mas kisim waswas bilong Holi Spirit bipo em i ken go insait long heven.

Jon 7:38, 39. Sapos man i bilip long mi, bambai planti wara i gat laip i kamap long bel bilong em na i ran i go. Em i tok long Holi Spirit ol man i bilip long em bambai ol i kisim Joel 2:28,29.Mi bai kapsaitim Spirit bilong Mi antap long olgeta man,Na tu antap long ol wokboi na antap long ol wokmeri long ol dispela de bai Mi kapsaitim Spirit bilong Mi.

Aposel 2:16 Profet Joel i tok long ol dispela samting

Olsem wara i makim tru taim man i kisim pulap long Holi Spirit. I no gat KAPSAIT long namba wan wok. Hia long dispela graun God I yusim wara bilong rausim ol rabis bilong man. Solwara i gat sol bilong klinim ol dispela rabis. Olsem na hatpela san i pulim klinpela wara i no gat sol, antap long klaut. Nekis dispela wara klin i pundaun antap long ol maunten, na ol manmeri i dring long en na stap laip. Nau ol riva i karim ol pipia rabis, posin, kain kain sik sua, i go daun long solwara. Na sol i save klinim ol dispela, na dispela wara i save go raun raun gen na gen. Long sem we Holi Spirit I save kapsait na kipim yumi fri long sin.

God tu i save putim wara i ran oltaim oltaim long ai bilong yumi. Dispela wara i olsem hap plang bilong pasim das bilong graun i no ken bagarapim ai bilong yumi. Dispela riva tais bilong Holi Spirit i mas ran oltaim oltaim long bel bilong yu, i olsem hap plang bilong kipim yumi fri long sin. Sanktifaikesin em kwik taim na pinis, tasol yumi nitim waswas bilong Spirit de bai de.

Wara i save makim blesing bilong God.

Namba 20:11 Na Moses i liptimapim han bilong em, na wantaim stik wokabaut bilong em em i paitim ston tupela taim. Na wara i kam ausait planti moa yet....

Lo 8:7 ...BIKPELA God bilong yu i bringim yu long wanpela gutpela graun, em graun bilong ol liklik wara riva na long ol hap wara i kamaut long graun na ol wara i go daunbilo tru i kamaut long ol ples daun na ol liklik maunten.

Rev 22:1 Dispela wara i kamap long sia king bilong God wantaim Pikinini Sipsip, na i ran i go namel tru long rot bilong taun.

V.17 Man i dai long wara, em i mas kam. Man i laik dring, em i mas kam na kisim wara bilong laip.

De bilong dring em nau, itaniti long hel paia i no gat wara.

Luk 16:24....salim Lasaras i kam putim poin bilong pinga bilong en long wara na mekim tang bilong mi i kol liklik. Mi pilim pen nogut tru long dispela paia.

Sapta 3 - Diwai Wain

Aposel 2:15Yupela i ting dispela ol man ol i spak. Tasol nogat. ...v.17 Klostu long las de bai mi kapsaitim strong bilong Spirit bilong mi long olgeta manmeri.

Ol man bilong graun i save spak na kamap ol kain pasin doti.

Tasol Kristen i pulap long Holi Spirit i save givim bel, amamas, na stap isi-isi.

“Kapsait” -em samting i stap antap, na kam daun olsem pasin bilong wara.

Matyu 3:11 ...Em bai givim baptais long yupela wantaim Holi Spirit, na wantaim paia.

Ol lain 120 i kamaut long rum antap na ol pipol ting ol i spak. Tasol ol i no bin spak, ol bin kisim kapsait bilong Holi Spirit, na ol hapi tru. Taim Holi Spirit i kam daun strongpela tru long wanpela lotu, orait dispela sem kain samting i save kamap.

Long Baibel diwai wain i save makim Isrel o Sios. Na tu em makim blut bilong Jisas.

Long Jon sapta 15 Jisas I givim stori long diwai wain.

1. Papa bilong gaden Em save makim Papa God.
2. Diwai wain i save makim Jisas Kraist
3. Han diwai i save makim ol Kristen.
4. Prut i makim laip bilong ol Kristen.

Jisas i soim ol diwai wain i gat tripela kain han.

1. Han i no gat kaikai, makim Kristen i bin go bek long sin.
2. Han i gat kaikai, makim Kristen
3. Han i gat kaikai moa yet, makim Kristen i bin kisim Kapsait bilong Holi Spirit.

Jon 15:1 Mi diwai wain tru....

Jisas I save tok olsem bikos i gat narapela diwai wain giaman.

Em Antikraist, wel abus bilong Rev. 13.

Han i no gat kaikai. Dispela em makim ol Kristen husat i stap insait long Krai tasol em i no save karim kaikai. Kristen laip bilong em i no save karim prut. Em i no save kisim gris bilong diwai wain, olsem i no karim prut. Bipo em Kristen tru, na stap long diwai wain, tasol nau Kristen laip bilong em i drai pinis. Papa bilong gaden wain bai mekim wanem? Jisas Yet I tok:

*Jon 15:6 Sapos wanpela man i no i stap long mi, orait **bai ol i rausim em olsem han bilong diwai**, na em bai i drai. Na ol i save bungim ol dispela han na tromoi long paia na kukim.*

Kristen i mas karim prut, sapos nogat em save bakslaid na lus long paia i no save dai.

Dispela namba tu han i gat kaikai i save makim Kristen laip bilong man i no gat namba tu wok. Prut i stap, tasol i no gutpela tumas. Na dispela han diwai i gat smel bilong olupela bel.

1 Korin 3:1 Mi save givim tok long yupela olsem mi save givim long ol man i gat olupela bel. Long dispela taim yupela i bin i stap olsem pikinini yet long pasin bilong Krai

Hibru 5:12 ...Yupela i no inap long kisim strongpela kaikai. Yupela inap long kisim susu tasol. V. 13 ...Olgeta man i save dring susu tasol, ol i stap liklik pikinini.

Planti Kristen i bebi yet. Em nau taim pinis bilong groap long Kristen laip na goan long kisim namba tu wok. Tasol nogat, ol save krai-krai nabaut long ol kain samting. Em nau taim bilong subim wok bilong God i gohet gut. tasol ol no save sindaun gut wantaim ol arapela Kristen. Ol les long go wok long gadin. Tru, prut i stap, tasol i no save gro gut tumas.

Nau namba tri han i makim kain Kristen i bin kisim pulap long Holi Spirit na prut i save kamap gutpela tru. Tasol prut i no save kamap nating. Nogat. Papa bilong gaden wain I gat wok long katim ol han sot pela, sot pela. Han diwai i longpela tumas, olsem bel bilong Kristen i gat kainkain samting God I no amamas long en. Pol i tok long ol Korin:

2 Korin 7:1 ...yumi kisim pinis ol dispela promis bilong God. Olsem na yumi mas rausim olgeta doti bilong bodi na bilong spirit, na i stap klin. Na yumi mas pret long God na bihainim tru pasin holi oltaim.

Orait dispela ves i no gat mining long ol Kristen i save mekim kain kain pasin bilong brukim lo. Em gat mining long dispela olupela bel, o as bilong sin i stap yet. Dispela i save givim posin long laip bilong Kristen: Kros long arapela, bel bikhet, bel hat, bel kol, bel strong tumas, na sampela Kristen i gat tu-bel i save pulim narapela narapela we. Jisas I bin krosim ol disaipol bilong Em long ol dispela kain bel kirap. Em ol dispela kain samting Papa bilong gaden I laik katim, na tromoi, na givim kapsait bilong Holy Spirit.

Long namba wan wok man i save kisim nupela samting bipo em i no bin kisim. Tasol long nambatu wok, God i save rausim samting i bin stap long taim mama i karim em.

Sapta 4 - Malolo Long Buk Hibru

Hibru 4:9 ... i gat malolo i stap yet. Em i olsem sabat na i wetim ol manmeri bilong God.

Ves 9 i no gat mining bilong go long heven na kisim malolo. Nogat tru. Dispela malolo em bilong ol Kristen i ken go insait long en nau tasol. Dispela malolo, i no bilong ol haiden.

Ol lain Isrel bipo, i les tumas long bilip, na go insait long malolo bilong Kenan.

Hibru 4:7Tude sapos yupela i harim maus bilong em, orait yupela i no ken pasim bel bilong yupela strong tumas.

Hibru 4:11 Orait yumi mas wok strong bilong go insait long dispela ples malolo. Nogut wanpela man i bihainim dispela pasin bilong sakim tok, olsem bipo ol i mekim, na em bai i pundaun na i lus.

[“Ples malolo” hia i tok long namba tu wok. Sapos man i sakim em bai lus]

Dispela malolo bilong ol manmeri bilong God i olsem wanem? Em i malolo bilong Ples Kenan, namba tu wok holiness.

Matyu 11:29 Na bai bel bilong yupela i painim malolo.

1. Isip -em kalabus bilong Fero, (Setan).
2. Red Si -em salvesin bilong God, ol kamaut fri long kalabus bilong sin.
3. Mauten Sainai -i save soim ol Isrel mas stap holi bikos God I stap holi.
4. Kedis -em dua bilong go insait long Kenan (holines), tasol ol i pret.
5. 40-yia long Ples Nating -ol bikhet long pes bilong God na Moses.
6. Wara Jodan -ples bilong katim skin, na tromoi (as bilong sin)
7. Kenan -planti tok dispela i makim malolo long heven, tasol NOGAT. Kenan em ples bilong ol bilipman i mas pait agens ol giant wokman bilong Setan.
8. Long gutpela graun bilong Kenan, ol makim wok bilong God. Tasol i no longtaim, na ol pikap long ol kain pasin nogut bilong ol as ples haiden.
9. God i les pinis wantaim ol, na Nebukadnesa i kam na kalabusim ol long Babilon.
10. Ol krai long God, na king Sairas i larim ol go bek na wokim nupela haus lotu.

Hibru 4:10man i go insait long ples malolo bilong God, em i pinisim wok bilong en na i malolo

Wanem kain wok ol pinisim?

Jems 1:8 Tingting bilong dispela man em i bruk nabaut, na long olgeta pasin em i mekim em i no save bihainim wanpela rot tasol.

Jems 4:8 Yupela man i gat tupela tingting, yupela i mas rausim dispela tingting nougut long bel bilong yupela.

Galesia 5:17 ...olpela bel em i laik daunim Holi Spirit, na Holi Spirit em i laik daunim olpela bel.

Kapsait na pulap long Holi Spirit bai pinisim dispela pait insait long bel, na Kristen i ken go insait long dispela namba tu malolo. Na tu, dispela tu-bel trabel bai pinis olgeta.

Dispela malolo i no malolo bilong drif long solwara. Nogat. Taim Kristen i stap laip yet, em i mas pait wantaim bodi bilong em yet, pasin bilong graun, na ol traим bilong Seten tu.

Aposel Pol yet i tok:

1Korin 9:27 Mi save paitim tru bodi bilong me na mekim em i bihainim laik bilong mi.

Em hia i save tok long bosim bodi-sait bilong em. Em i no tok long pait moa wantaim as bilong sin.

Tok bilong pinisim Kenan Malolo.

1. Ol lain i save kamaut long Isip, i gat tupela tasol i go insait long Kenan, Josua na Kelab.
2. Ol nupela lain mama i karim long ples nating ol i go insait pait long Kenan.

Olsem ol dispela bikhet lain i wokabaut long Ples Nating i no gutpela piksa long taim hevi bilong ol Kristen. Bikhet pasin bilong ol i piksa long Kristen husat i bin bekslaid.

Sapta 5 - De Bilong Pentikos

Stori i save kam long buk Aposel sapta 2.

Pentikos em wanpela holide bilong ol lain Juda, i save kamap 50 pela de bihain long Kaikai Bilong Bret I No Gat Yis.

7-pela Holide Moses i bin givim long ol Isrel i piksa long ol Kristen tude.

Mun Namba Wan: Nisan

1. Pasova: Blut bilong Krai i karamapim bel bilong man
2. Bret i no gat Yis: Bel bilong man i mas fri long yis bilong olpela bel.
3. Namba wan kaikai mau: Dispela i makim Kirap Bek bilong Jisas.

Mun Namba Tri: Sivan

4. Pentekos: 50 de bihain long Jisas Kirap Bek. Ol disaipol i kisim namba tu wok, bel klin. (Em stap wantaim ol disaipol inap 40 de, na bungim 10-pela moa= 50.

Mun Namba Seven: Tishri

5. Ol Biugel: Em makim Jisas i kambek bilong kisim ol sios.
6. Atonmin: Jisas i kam bek long Maunten Oliv, na Isrel i sori long Em.
7. Haus Sel: Ol Isrel i tingim gen long lusim Isip na stap long wanwan haus sel. Tasol long ol Kristen dispela i save makim Jisas em King long Ma-lin-i-am

Bihain long Jisas I kirap bek, ol disaipel i save nabaut, nabaut inap 40 pela de. Dispela 40 em namba bilong tes, na i save soim tru anap Jisas I winim dai na kirap bek gen, na stap laip. Long dispela de 40 Jisas I stap antap long Maunten Oliv na Em I lusim ol na go bek long heven. Em I tok:

Jon 16:7sapos Mi no go, Poroman bai i no inap kam long yupela. Tasol sapos Mi go, Mi bai salim Em long yupela.

Orait Em i lusim ol disaipel na go bek long heven, na ol lain i save go wetim 10 pela de long rum antap, na Jisas I save baptaisim ol wantaim Holi Spirit.

Matyu 3:11Em bai i baptaisim yupela long Holi Spirit na long paia.

Olsem bungim 40 de ol raun anabaut, na 10 pela de ol wetim Holi Spirit, em inap 50 pela de.

Aposel 1:3Long 40 de ol i lukim em.

Jisas i kirapbek long Sande.

Matyu 28:1 Sabat i go pinis, na klostu san i laik kamap long namba wan de bilong wik,

Tingim, long ol lain Juda, nekis de i stat long 6:00 P.M. Olsem 6:30 PM Sarere bilong mipela, em Sande kirap pinis bilong ol Juda. Jisas I bin kirap pinis any taim bihain long 6:00 PM..

Yumi ken kaunim 3 pela Sande long dispela stori:

Joh 20:19 San i go daun pinis long dispela namba wan de bilong wik, na Jisas i kam sanap namel long ol....Ves 24. Wanpela disaipel em i no stap wantaim ol. Em Tomas.

Jon 20:26 Bihain long 8-pela de ol disaipel bilong Jisas ol i stap insait gen, na Tomas i stap wantaim ol. [Sande]

Aposel 2:1 De bilong Pentikos i kam pinis, na ol i bung wantaim long wanpela haus.

Sapos yu wokim liklik kalenda long dispela yu bai lukim klia De Bilong Pentikos em tu Sande. Olsem wanem? Baibel i save soim klia ol disaipel i stat nau long bung lotu long Sande. Sande lotu em i no mak bilong Antikrais, 666, o Wel Abus.

Aposel 20:7 Long namba wan de bilong wik mipela i bung wantaim ol Kristen bilong kaikai na kisim komunion.

1 Koring 26:2 Long olgeta Sande yupela olgeta wan wan i mas ting long mani yupela i bin kisim long arapela wik, na hapim dispela na puitim hap i stap gut long ol haus bilong yupela yet.

Revelesen 1:10 Long de bilong Bikpela , Holi Spirit i kamap strong long mi.....

Planti yia pinis God Yet I bin blesim Sande Lotu, na Em Yet i bin stap klostu long ol lotu long Sande.

Sapta 6 - Ol Disaipel Kisim Namba Tu Wok

Tri pela kwesten- Ol disaipol i bin kamap nupela gen pastaim long De bilong Pentikos, o long De bilong Pentikos? Ol disaipel i gat wanem kain trabel pastaim long De bilong Penetikos? Na ol i stap olsem wanem long bihain? Yumi mas painim ansa insait long Buk Baibel.

1. Wanem taim ol disaipel i bin kamap nupela gen ?

Joh 1:35 - 51 Andru, Jon, Pita, Filip, Nathaniel.....ol i bihainim Jisas.

Ol dispela man hia, ol stap disaipel bilong Jon Baptais pastaim.

Jon 1:36 Long de bihain Jon i sanap gen na tupela disaipel bilong en i sanap wantaim em. V.37 tupela i go bihainim Jisas.

Mipela save, ol husat i stap disaipel bilong Jon Baptais, ol mas bin tanim bel tru tru. Na nau, lukim ol dispela man i bin lusim bisnis bilong ol kwik taim, na ol i bin go wok wantaim Jisas long kisim arapela disaipel moa.

Mak 1:16 - 20 Em i lukim Saimon wantaim brata bilong en Andru. Tupela i wok long tromoi umben long raunwara.... Na Jisas i tokim tupela, Yutupela i kam bihainim mi, ...Na kwiktaim tupela i lusim umben na i go bihainim em.

Em i lukim Jems, pikinini bilong Sebedi wantaim brata bilong en Jon. Tupela tu i stap long bot na i wok long stretim umben. Na em i singautim tupela, na tupela i lusim papa Sebedi i stap long bot wantaim ol wokman, na tupela i go bihainim Jisas.

Mak 2:14 Na em i wokabaut i go, na i lukim Livai, pikinini bilong Alfias, em i sindaun long haus takis. Na Jisasi tokim em, "Yu kam bihainim mi." Na em i kirap i go bihainim em.

Em bikpela samting tru, sapos man i lusim bisnes bilong em wantaim papa na wantu, na go bihainim Jisas.

Jisas i bin makim 12-pela disaipol ol i kolim Aposel

Luk 6: 12 -16

Pastaim long makim ol disaipol Jisas I beten taim san i go daun i go inap tulait i bruk. Na Em I no inap long makim sampela sinman long mekim wok Aposel. Planti moa yet i bin kamap nupela gen long Spirit, bipo long De Bilong Pentekos. Yu ken painim lista bilong sampela bilipman bilong Olpela Testamen long Hibru 11. Ol lain Nineva i no gat ofa, i no gat alta, i no gat tempel, tasol yet ol bin tanim bel na kamap nupela long Spirit. Olpela Testamen i tok save long Ebrahim:

Jenesis 15: 6 Na em i bilip long BIKPELA. Na Em i kaunim dispela bilong stap stretpela pasin long em.

De bilong Pentkos i no yet na Jisas I tokim man i gat sik palsi:

Matyu 9: 2 Jisas i tokim dispela sikman, "Pikinini. Bel bilong yu i ken isi. Mi tekewe pinis sin bilong yu."

Na Jisas I save krosim Nikodimas bikos em no save long "kamap nupela gen."

Jon 3:10 "Yu tisa bing Isrel na yu no klia long dispela samting ? "

Planti i bin kamap bilip man **pastaim** long Pentikos, tasol sampela tisa i tok "12-pela disaipel i bin kisim namba wan wok long De bilong Pentikos." Ol paul tru long dispela. I klia tumas, planti i bin kisim namba wan wok pastaim long De bilong Pentikos, olsem bilong wanem ol tok "disaipel nogat."

Ol disaipel i gat bilip, na God I kolim ol "stretpela," bipo long De Bilong Pentekos.

Luk 12:28yupela bilong liklik bilip....

Luk 12: 30-32Papa bilong yupela....

Luk 9:1-6 ...Em i salim ol long autim kingdom bilong God.

Mak 6: 7 12-pela disaipel....Em I givim strong long ol, bilong rausim ol spirit nogut.

Jon 6:69 [Saimon Pita] ...mipela i bilip na save tru long Yu dispela Kraist, Pikinini Man bilong God.....

Matyu 16:16 ...Saimon Pita i bekim na tok, Yu stap dispela Kraist, Pikinini Man bilong God i stap laip...Ves 17. bodi na blut i no bin mekim dispela kamap ples klia long yu, tasol Papa bilong Mi husat i stap long heven.

Luk 10:20 ...nem bilong yupela God i raitim long heven.

Jon 14:1 Yupela i bilip long God

Jon 14: 17 ...Spirit bilong tok tru....yupela save long Em. Long wanem, Em i stap wantaim yupela.

Jon 15:3 Nau yupela i stap klin...

Jon 15:19 ...yupela i no bilong dispela graun...

Jon 16:27 ...Papa Em Yet i laikim yupela tru, bilong wanem, yupela i bin laikim Mi tru...na yupela i bin bilip...

Jon 17:6 Ol i bilong Yu, na Yu givim ol long Mi. Na ol i bin bihainim tok bilong Yu.

Jon 17:8 Mi bin givim long ol ol dispela toktok Yu givim Mi. Na ol i bin kisim ol, na ol i bin save tru tumas long Mi kam ausait long Yu, na ol i bin bilipim long Yu bin salim Mi.

Jon 17: 9 Mi beten long ol. Mi no beten long ol manmeri bilong dispela graun, tasol long ol husat Yu bin givim Mi. Long wanem, ol i bilong Yu.

Jon 17:12 Ol dispela husat Yu givim long Mi Mi bin lukautim, na i no gat wanpela bilong ol i lus, pikinini man bilong bagarap olgeta long hel tasol, inap long em i ken inapim rait bilong God.

John 17:14 Ol i no bilong dispela graun....

John 17"16 Ol i no bilong dispela graun....

John 17: 18Mi tu i bin salim ol

Pita em mekim sin long haus bilong Kaiafas, tasol em tanim bel tru tru pastaim long De Bilong Pentikos.

Matyu 26:75 Pita i go ausait na i krai tumas. [Luk 22:62]

I tru, i no gat dispela nem “Kristen” bipo long Pentikos. Dispela nem ol givim bihain long buk Aposel.

Aposel 11:26 Na ol i kolim ol disaipel ol Kristen pastaim long Antiok.

Tasol “kisim bek” bilong Olpela Testamen i wankain olsem long Nupela Testamen.
Marimari i kam daun long hevin long O.T. pastaim Jisas i kam long bel bilong Maria.

Jenesis 6: 8 Noa i painim marimari pinis long ol ai bilong BIKPELA.

Ol bilip, na God I kisim bek ol. Tasol long Olpela Testamen ol i gat nem “bilip man,” na long Nupela Testamen ol kolim “Kristen.” Poin mipela laik mekim em i olsem: Ol bilip man i gat Namba Wan Wok bipo long De Bilong Pentikos. Na long De bilong Pentikos ol kisim pulap long Holi Spirit, -em Namba Tu Wok. Mipela lukim olsem long Baibel bikos sampela lotu i laik skulim olsem: Ol disaipol i kisim namba wan wok long De Bilong Pentekos.

2. Nau, namba tu kwesten bipo mipela tok long en. Ol disaipol i gat wanem kain trabel pastaim long De Bilong Pentekos?

Ol i gat trabel long olupela bel i stap yet.

Matyu 26:40 “Olsem wanem? Yupela i no inap was wantaim mi inap long wan aua, a ?

Matyu 26:56 Na olgeta disaipel ol i lusim Jisas na i ranawe.

Matyu 6:30 ...Olsem na yupela manmeri i gat liklik bilip tasol...

Matyu 16:23 Na Jisas i tanim na i tokim Pita, “Seten, yu go baksait long mi. Yu pasim rot bilong mi. Yu no bihainim tingting bilong God. Nogat, Yu bihainim tingting bilong man taso.”

Luk 22: 24Na ol disaipel ol i kirapim wanpela pait long toktok. Ol i tok, “Husat em i namba wan bilong yumi?”

Jon 13: 8 Pita i tokim em, “Yu no ken wasim lek bilong mi. I no ken tru.”

Luk 10: 41 Mata Mata, yu tingting planti na bel bilong yu i kirap nogut long planti samting....

Luk 9: 54,55 Jisas i tanim na i krosim tupela. [Jems na Jon]

Ol dispela kain pasin bilong disaipel, Jisas I no orait long en. Em save krosim ol gen na gen. Dispela samting Jisas I save tok kros long en, i save kamaut long olupela bel, -as bilong sin. Em i rong, na i no save fit long heven. Tasol long De Bilong Pentikos

paia bilong Holi Spirit i bin kukim dispela as bilong sin long bel bilong ol, na dispela kain trabel i pinis. Misteks i no pinis, paul tingting i no pinis, ol kain sot na trabel bilong bodi i no pinis, TASOL AS BILONG SIN I PINIS.

3. Ol disaipol i stap olsem wanem bihain long De Bilong Pentekos?

Aposel 1:8 Yupela bai kisim pawa,,,

Aposel 4:13 Ol i lukim strong bilong Pita na Jon....

Aposel 5:25 Ol man husat yupela i putim long kalabus i sanap insait long tempel, na ol i skulim ol manmeri.

Aposel 5: 42 Olgeta wan wan de long tempel, na long olgeta wan wan haus, ol i no lusim pasin bilong skulim ol man na autim tok long Jisas Kraist.

Aposel 8:25 ol i bin tokaut klia na autim tok bilong Bikipela,....

Aposel 10:39 Na mipela i stap witnes...

Apodel 6:5 ol i makim Stiven, man i pulap long bilip tru na bilong Holi Spirit...

Aposel 8:5 Filip i go daun long biktaun bilong Samaria, na autim tok long Kraist i go long ol.

Aposel 8:14 ol i salim long ol Pita na Jon, V. 15. i beten long ol, long ol i ken kisim Holi Spirit.

Aposel 9:17 Jisas Kraist....i bin salim mi, inap long yu ken luikluk gen, na stap pulap wantaim Holi Spirit.

Wanem taim stret ol disaipol i bin senis na kisim dispela pawa? Em long De Bilong Pentikos. Long dispela as mipela save tok ol Kristen tude tu ol nit long painim dispela De Bilong Pentekos bilong ol yet. Na paia bilong Holi Spirit i ken kukim ol dispela pret na sem bilong autim Gitnius bilong Jisas Kraist.

Aposel 2: 2 - 4 Na wantu wanpela nois i kam long heven olsem wanpela strongpela win i ran hariap tru, na em i pulimapim olgeta dispela haus we ol i sindaun. Na i kamap ples klia long ol ol tang i bruk olsem paia, na dispela i sindaun antap long olgeta wan wan bilong ol. Na olgeta bilong ol i pulap wantim Holi Spirit, na ol i stat long toktok wantiam ol arapela tok ples..

*Aposel 15: 8, 9 Em i givim Holi Spirit long ol, olsem em i givim long yumi V. 9. Em i no mekim wanpela pasin long yumi na narapela pasin long ol. Nogat. **Ol i bilip long em, na long bilip tasol em i mekim bel bilong ol i klin.***

Long De Bilong Pentikos-

Nois olsem win

Paia i bruk bruk

Kainkain tok ples

Bel klin

Long dispela Aposel 15 Pita i save givim ripot long ol hetman bilong sios, long wanem samting tru tru i bin kamap long De Bilong Pentikos. Em i no save givim ripot long bikpela nois bilong win ol harim. Em i no save givim ripot long paia ol save lukim. Em i no save givim ripot long ol kainkain tok ples ol mekim. Olsem, wanem repot Pita i givim? Em givim ripot long wanpela samting tasol, **-ol kisim bel klin.**

Olsem, mekim tok long kainkain tok ples i no namba wan samting, na man i no mas mekim bilong go long heven. Na em i no mak bilong soim tru antap Kristen i bin kisim Holi Spirit. Ol tangs lotu i no save bihainim ol Baibel ves long olkain lotu bilong ol. Baibel i klia, dispela kain toktok long De Bilong Pentikos em i toktok long kainkain tok ples. Dispela em wanpela miracle i no stap long ia bilong ol pipel. Nogat. Em miracle i stap long tang bilong ol disaipel, bilong ol pipel i ken save klia long tok ol autim.

Aposel 2:8 Olsem wanem yumi olgeta man wanwan yumi harim ol i tok long tok ples bilong yumi stret, olsem yumi bin harim long maus bilong papamama bilong yumi ?

*Aposel 2:11 Yumi Juda wantaim ol arapela man i kisim pasin bilong Juda, na yumi Krit na Arebia, yumi olgeta i harim ol i telimautim tok bilong ol strongpela wok bilong God long ol **tok ples bilong yumi.**"*

Olsem dispela kain toktok long De bilong Pentikos i no maus paiap nating, nating. Nogat. Dispela tok i klia, i gat mining, na ol pipel i save harim klia olgeta.

Aposel 2:9 i save givim lista long 16 -pela as ples ol lusim i kam long en. Na tu, ol disaipel i no bin skul, o save long narapela narapela kain tok ples. Em wanpela mirikel Holi Spirit I save mekim wantu tasol.

Aposel 2:7 ... Dispela olgeta man i mekim toktok hia, ol i man bilong Galili tasol....

Aposel 4:13 Ol i lukim Pita wantaim Jon tupela i tokaut strong na i no pret. Na ol i save, tupela i no bin skul. Tupela i man nating tasol.

Dispela sart i save soim wanem samting tru tru i bin kamap taim ol i save kisim Holi Spirit. Bel Klin i save namba wan samting i winim olgeta arapela kainkain samting.

	<u>Jerusalem-</u>	<u>Sameria-</u>	<u>AposelPol</u>	<u>-Konilias</u>	<u>-Apolos</u>	<u>-Ephesus</u>
--	-------------------	-----------------	------------------	------------------	----------------	-----------------

Autim

Tok	yes	-	nogat	-	nogat	-	yes
Ples							

Paia	yes	-	nogat	-	nogat	-	nogat
Bruk							

Bel Klin	yes	-	yes	-	yes	-	yes	-	yes	-	yes
Nois Win	yes	-	nogat	-	nogat	-	nogat	-	nogat	-	nogat
Tok Profet	yes	-	nogat	-	nogat	-	nogat	-	nogat	-	yes

Dispela sart hia i save soim wanem? Em i save soim bel klin em namba wan samting. Ol Kristen husat i bin kisim kapsait bilong Holi Spirit ol i save kisim bel klin. Tasol olgeta i no save harim nois olsem win, no lukim paia bruk bruk, no mekim tok long kainkain tok ples. Ol save mekim kainkain tok ples we i gat nit tasol. Holi spirit I no save mekim nating nating. Tri-pela ples tasol ol i gat nit long mekim tok long kain kain tok ples: Efesas, Sisaria, na Jerusalem. Ol dispela tri-pela ples i gat nit bikos em ples bilong planti arapela lain ol save bung long en. Olsem ol dispela “Tangs Lotu” i save paul tru long autim tok nating nating, i no gat mining. Ol i no save mekim wankain olsem De Bilong Pentikos. Tasol olgeta hap Baibel i save sapatim tising bilong bel i mas kamap klin bilong go long heven.

Sapta 7 - 1 Korin 12

Tok pastaim: Mipela i no gat kros long ol Kristen brata i save paulim lotu long tok i no gat mining. Tasol mipela mas sanap na sapatim Tok Tru Pol i givim long ol lain Korin.

1 Korin 12, i save soim 9-pela presen Holi Spirit I save givim.

1. *tok bilong save tru*
2. *tok bilong save, long dispela Spirit stret*
3. *bilip tru*
4. *presen bilong stretim sik*
5. *pawa bilong wokim mirakel*
6. *wok bilong autim tok prophet*
7. *bilong klia tru long ol spirit*
8. *ol kain kain **tok ples***
9. *save bilong tanim ol **tok ples***

Galesia 5, i save soim 9-pela kaikai Holi Spirit i save kamapim.

1. *Laikim tru*
2. *Amamas tru*
3. *Bel isi*
4. *karim pen long pela taim*
5. *pasin isi*
6. *gutpela pasin*
7. *bilip tru*
8. *pasin bilong stap isi*
9. *bosim bodi gut*

Sapos Holi Spirit I no save givim yu wanpela presen, maski, yet yu ken i go insait long heven. Spirit I save skelim presen long laik bilong Em Yet. Tasol yu mas karim olgeta 9-pela prut, o kaikai bilong Holi Spirit bilong go insait long heven.

Hibru 2:4 God ... i tilim presen bilong Holi Spirit long ol manmeri, inap long laik bilong em yet.

Long kaikai 9, bosim bodi gut, em bilong ol Kristen long mekim. Tasol Baibel i no save skulim Kristen long bosim, o kontrolim ol pela bel. I gat wanpela aksin tasol Baibel i skulim yumi long dispela as bilong sin, -EM I MAS DAI.

Efesus 4:22 Yupela i mas rausim dispela olupela man

Kolosi 3:9 long bel bilong yupela, yupela i rausim pinis olgeta pasin bilong olupela man.

Rom 6:6 Olpela bel bilong yumi em i dai pinis long diwai kros wantaim Krai.

I olsem, yu mas klia gut, “bosim bodi,” em wanpela prut, o kaikai bilong Spirit, tasol rausim olupela man em narapela kain samting. Bodi bilong sin, o as bilong sin i mas dai pinis olgeta, tasol ol Kristen i gat wok yet long kontrolim bodi -ai, lek, han, ia, maus bilong yumi.

1 Koring 9:27 Mi save paitim tru bodi bilong mi na mekim em i bihainim laik bilong mi.

Matyu 4:2 bihain Em i hangre....

Tasol Jisas I bosim hangre bilong Em Yet, na sakim Seten. Ol Kristen i gat hat wok long kamapim kaikai bilong prut namba 9, sapos as bilong sin i stap yet.

Long pas Aposel Pol i salim long ol Efesas 4:11, na long Rom 12:3-8, em i givim lista bilong ol presen bilong Holi Spirit, tasol em i no listim presen bilong kainkain tok ples. Em i no listim bikos dispela presen em i no namba wan samting.

Efesas 4:11

1. *aposel*
2. *profet*
3. *ivanselis*
4. *pasta*
5. *tisa*

Rom 12: 6 -8

1. *autim tok profet*
2. *wok bilong helpim*
3. *man bilong skulim*
4. *wok bilong strongim bel*
5. *husat i save givim*
6. *husat i bosim*
7. *soim sori*

Long 1 Korin 12 Pol i putim tok long kainkain **tok ples** daun long namba et presen long lista. Klostu long las ples bilong ol presen.

1 Korin 12:31 Tasol yupela i mas strong long laikim na kisim ol nambawan presen.

1 Korin 14:1 namba wan presen yupela i mas hatwok long kisim, em strong bilong autim tok bilong God.

Ol dispela ves em bilong soim presen bilong mekim tok long kainkain tok ples em i no antap namba wan samting, na man i no mas mekim bilong go insait long get bilong heven. I no gat wanpela pes long Holi Baibel, we i lainim yumi long autim tok long kainkain tok ples, em mak tru antap bilong soim man i bin kisim Holi Spirit. Mak tru long Kristen i bin kisim Holi Spirit em “witnes bilong Holi Spirit.”

Hibru 10:14,15 ...Ol manmeri em i mekim i kamap holi, v. 15. Holi Spirit tu i autim tok long yumi olsem....

Dispela witnes i save go stret long husat i bin kamap holi pinis long bilip. God Wanpela I save, na husat i kisim dispela witnes, em tu i save. Na dispela witnes em WANPELA we tasol man i ken save, em i bin kisim Holi Spirit.

Presen 8, kainkain tok ples i no namba wan samting. I gat narapela kain pasin i save winim ol presen 8, na 9.

1 Korin 12:31 Na nau mi laik soim yupela wanpela rot i namba wan tru.

1 Korin 13:1.2 Sapos mi save toktok long ol manmeri long kain kain tok ples bilong man, na long tok bilong ol ensel tu, tasol mi no givim bel bilong mi long ol, orait mi olsem belo i pairap, o garamut i krai nating. V.2. Na sapos mi inap long mekim tok profet, na mi save pinis long olgeta tingting hait bilong God, na mi gat olgeta arapela save tu, na sapos mi gat strongpela bilip tru, inap long surikim mountain i go long hap, taso mi no givim bel bilong mi long ol manmeri orait bai mi olsem samting nating.

I olsem: man i ken mekim tok long kainkain tok ples, tasol pasin bilong laikim tru brata na susa, i save winim olgeta 9-pela presen bilong Holi Spirit. Dispela 9-pela presen i no bilong oltaim oltaim. Em bilong sot pela taim tasol na bai pinis. I no gat nit long dispela presen antap long ples heven.

1 Korin 13:8 Na kainkain tok ples bai i pinis.

Ol kain tangs lotu i save putim tangs namba wan samting. Tasol Aposel Pol i save putim “Tok Ples” daun long las ples, na em i no wanpela mak bilong man bai go long heven. Bilong wanem Holi Spirit I save givim dispela presen bilong tok ples? Em bilong helpim ol kongregesen olsem long De Bilong Pentikos. De bilong Pentekos em stret pela piksa long we bilong yusim dispela presen.

1 Korin 12:7 Holi Spirit i save kamapim strong bilong en long olgeta man wan wan, bilong helpim olgeta.

Orait, sapos God I givim dispela presen long mi, na mi sanap long lotu bung na mekim wanpela kain tok ples mi yet no save long en, na ol pipel tu i no save long en, orait dispela kain pasin save **helpim** husat? Nogat. I no gat wanpela. Mi bin westim lotu bilong God na bilong ol pipel tu wantaim. Holi Spirit I no save kamapim dispela kain pasin long lotu. Holi Spirit i save mekim wankain pasin tasol, wankain olsem long De Bilong Pentikos -taim ol gat nit long dispela samting. Presen bilong Holi Spirit em i no olsem sho-taim, o ol gem pikinini i save ple long en. Na sapos long lotu bilong yu olgeta i save long sem tok ples, orait i no gat nit long wanpela sanap na yusim dispela presen namba 8, o namba 9. Ol mas sindaun tasol na harim tok bilong Baibel.

I mas gat risin bilong Holi Spirit I givim presen.

1. Na sapos i gat wanpela brata husat em inap tanim tok ples, orait i no gat nit long presen 8, o 9.
2. Na sapos i gat narapela tok ples i kam long lotu, na i no gat tanim tok, orait i gat nit long presen 8, tok ples, inap ol pipol ken kisim save. Em wankain olsem long Pentekos. O sapos wanpela i gat presen 9, orait em ken tanim tok man imekim.

3. I wankain olsem long De Bilong Pentikos -ol i no gat nit long presen 9, tanim tok, long sem lotu bung we man i gat presen namba 8, Tok ples.

Presen bilong mekim tok long kain kain tok ples **i no bilong olgeta Kristen**, na man i no mas mekim pastaim bilong go long heven. Spirit i save skelim long laik bilong Em Yet.

1 Korin 12:11 Long laik bilong em yet em i save tilim wanpela presen long wanpela man na narapela presen long narapela man.

1 Korin 12:18 God i bin putim olgeta hap wanwan i stap long bodi, olsem em yet i laikim.

Hibru 2:4 ..em i tilim presen bilong Holi Spirit long ol manmeri, inap long laik bilong em yet.

Pol i givim 2 pela lo bilong kontrolim dispela kain lotu:

1 Korin 14:27 Sapos sampela i laik mekim tok long narapela tok ples, tupela o tripela tasol i ken mekim. Em inap. Na ol i no ken mekim tok wantaim. Nogat. Wanpela i mas tok pastaim na narapela bihain long em. Na wanpela man i mas tanim tok.

V. 28. Na sapos i no gat man bilong tanim tok, orait man bilong mekim narapela tok ples em i mas pasim maus long bung bilong sios. Em wanpela i ken makim toktok wantaim God tasol.

Sapta 8 - 1 Korin 14

Long 1 Korin 14 Aposel Pol i save givim planti lo bilong bosim presen namba 8, na 9. Ol lain Korin i bin bagarapim tru dispela tupela presen bilong Holi Spirit, olsem Pol i raitim dispela sapta bilong stretim lotu bilong ol.

1 Korin 14:2 man i mekim tok long narapela tok ples, em i no givim tok long ol man. Nogat. Em i tokim God tasol. Long wanem i no gat man i save dispela tok.

I olsem: wanpela man i sanap na mekim toktok long narapela **tok ples** ol kongrigesen i no save long en. Tasol God Em I save long as ples bilong diapela man na tok ples bilong ol. Olsem tok i pundaun nating bikos ol pipol i no save harim dispela kain tok ples. Olsem Pol i tok wanem?

1 Korin 14:28 Na sapos i no gat man bilong tanim tok, orait man bilong mekim narapela tok ples em i mas pasim maus long bung bilong sios. Em wanpela i ken mekim toktok wantaim God tasol.

Em nau yumi mas bihainim ol dispela lo long olgeta lotu bilong yumi. Sapos man i autim tok long sem tok ples ol kongrigesen i save long en, orait ol i no gat nit long presen 8, o, 9. Nogut wan pela sanap na yusim presen bilong Holi Spirit long taim i no gat nit. Nogut yumi save ple-ple wantaim ol presen bilong Holi Spirit.

1 Korin 14:4 Man i mekim tok long narapela tok ples, em i strongtim bel bilong em yet.

Olsem wanem em ken strongim bilip bilong em yet sapos i no save long tok ples em yet i autim? Nogat. Bilong strongim bel bilong em yet, orait em i mas save long dispela tok ples em i mekim. Sapos tru, em yet i save long tok em i mekim, orait dispela i no inap strongim bilip bilong ol arapela husat i no save long dispela tok ples em i mekim. Sapos man i gat presen bilong autim tok long narapela **tok ples**, ol kongregesin i no save long en, orait em yet i mas tanim dispela **tok ples** bilong ol pipel ken kisim strong long en.

1 Korin 14:5 ...Man bilong autim tok bilong God em i namba wan.

Sapos yu go long narapela tok ples yu no save tok ples bilong ol, na i no gat presen bilong Spirit hia, orait yu mas sindaun tasol. Yu ken beten long God insait long bel long **tok ples** bilong yu yet, na kisim strong. Nogut yu bagarapim lotu bilong ol.

1 Korin 14:6Mi ken i go long yupela na mi mekim tok long sampela arapela tok ples. Tasol sapos mi no tokim yupela long sampela tok God i bin soim mi, o mi no givim gutpela save long yupela, o mi no autim tok bilong God, o mi no skulim yupela, olsem wanem bai mi helpim yupela?

Ol lain Korin i gat presen bilong Holi Spirit, tasol ol yusim kranki nabaut. Man hia i mekim tok long wanpela kain tok ples, tasol ol pipel i no save long en. Olsem dispela presen save helpim husat? Nogat. I no save helpim wanpela.

Sapos ol lotu i wanpela tok ples tasol, olsem wanem Holi Spirit i sanapim wanpela long tok long tangs ? Nogat. Dispela samting i no olsem gem bilong ple ple. Ol tok insait long lotu i mas klia bilong ol pipol ken kisim save.

1 Korin 14:9...Mi ken i go long yupela na mi mekim tok long sampela arapela tok ples. Tasol sapos mi no tokim yupela long sampela tok God i bin soim mi, o mi no givim gutpela save long yupela, o mi no autim tok bilong God, o mi no skulim yupela, olsem wanem bai mi helpim yupela ?

1 Korin 14:10Tru, i gat planti kain tok moa i stap long graun. Na i no gat wanpela tok nating.

Sapos man i tok long tangs, orait yumi no ken kolim em wanpela tok ples. Aposel Pol i laik tumas ol lain Korin ken yusim ol presen bilong Holi Spirit stret, inap ol kain kain tok i gat mining klia wantaim. Em i tambu long ol mekim ol kain nois long tangs i no gat mining long en.

1 Korin 14:11 Sapos mi no save as bilong tok wanpela man i mekim, bai em i tingim mi man bilong narapela lain

1 Korin 14:13 Olsem na man i mekim tok long narapela tok ples, em i mas prea long God i givim em strong bilong tanim dispela tok.

Em i mas beten long bel bilong en **pastaim**, na askim God long givim em tok ples bilong ol dispela lain i stap nau long en. God I givim pinis, orait, nau em ken sanap na autim tok long ol pipel. Sapos God I no givim long em, orait em mas sindaun na beten wantaim God tasol, o go painim wanpela tanim tok. Sapos man i gat presen bilong autim kain tok ples, orait i no gat nit long presen namba 9, long tanim tok ples. Na sapos man i gat presen namba 9, long tanim tok ples, orait i no gat nit long presen namba 8, presen bilong tok ples.

1 Korin 14:14 ...Sapos mi mekim prea long narapela tok ples, orait spirit bilong mi em i prea, tasol tingting bilong mi em i stap nating.

Dispela kain beten em i no stret. Em tok “SAPOS” mi beten olsem. Luk olsem sampela Korin i yusim dispela presen long taim ol beten, tasol man i no gat save long dispela tok ples em beten long en. Dispela pasin em kranki tru. Taim bilong prea, yu mas mekim long tok ples yu yet save long en. Korin em wanpela kongrigesen i trabel tru long kain kain samting. Na wanpela bikpela trabel em long presen 8 na 9. Sapos tingting bilong man i stap nating long lotu. Dispela i no wok bilong Holi Spirit.

1 Korin 14:15 ...Mi mas prea long spirit bilong mi na long tingting bilong mi wantaim.

Em nau, Aposel Pol em tok klia tru -em i no save beten long wanpela tok ples em no save long en. Em save beten stret long tok ples bilong en yet. Em save, na God tu Em save. Dispela em Baibel we bilong beten. Tasol sapos man i kam insait long lotu bilong yumi, na yumi no i save long dispela tok ples prea bilong em yet, orait dispela beten i no gat mining long tingting bilong yumi. Dispela man em kisim strong long prea bilong em yet, tasol yumi bai stap nating sapos em i no tanim.

1 Korin 14:16Sapos yu tenkyu long God...na wanpela man i stap em i no save long dispela tok, olsem wanem bai em i tok “tru” long dispela tenkyu bilong yu ?

Sapos yu yet sanap na tok “tenkyu” long narapela tok ples ol pipel i no save long en, olsem wanem ol dispela lain bai amamas long tok yu mekim? Nogat. Ol no inap. Na long taim man i gat presen long autim tok ples -em yet i mas save long wanem tok em i mekim. Man hia (V. 16) em tok “tenkyu,” na em i save tru wanem tok em mekim. Tasol husat ol sanap na mekim kain nois i no wanpela **tok ples**, orait i no gat man long graun inap save long dispela. Sampela i ting, Holi Spirit Yet i save kamapim dispela , tasol Holi Spirit i no save sakim dispea rait i stap long 1 Korin.

Long hia tu mi save lukim em pasin bilong ol N.T, kongrigesen long tok “amen,” o “tru,” long taim pasta i save autim gutpela tok. Na long wanem lotu ol sanap na mekim sampela nois long tangs i no gat mining long en, orait dispela lotu i no stret long ai bilong God. Man i autim tok em mas save long wanem tok em yet i bin mekim. Dispela presen namba 8, na 9, i no mak bilong soim man i bin kisim Holi Spirit, na tupela presen i no namba wan samting bilong lotu. Em stap las tru long lista Pol i givim.

Planti tude ol holim nem “Kristen,” ol strong long olkain wok bilong lotu, na helpim sios, tasol laip na wokabaut bilong ol i no klin. Dotipela pasin i save stap long bel, na long laip bilong ol. Ol i stap long pasin bilong sin yet. Blut bilong Kraist i no bin wasim bel bilong ol. Ol sin i stap hait na ol no bin konfesim. Ol laikim ol kain dotipela pasin bilong graun. Lotu bilong ol i no strong, pasta i no save autim tok kros agins sin. Tasol yet ol testifai “Mi gat Spirit,” na danis wantaim kundu insait long lotu bung.

*1 Jon 4:1 **planti** profet giaman ol i wokabaut nabaut long graun. Olsem na yupela i no ken bilip long olgeta man i tok, “Mi gat Spirit.”*

Buk Baibel em wanpela, tasol ol tising bilong ol lotu i save go kain kain we bilong ol yet. Em bikos ol no skelim ol Baibel ves stret. I gat tupela kain tising i stap:

1/ 1 Korin 2:13 Holi Spirit yet i bin skulim mipela....

2/ 1 Timoti 4:1 Bihain-taim bai sampela man ol i lusim biip. Bai ol i harim maus bilong ol spirit bilong giaman na bihainim tok bilong ol spirit nogut.

Tru, Buk Baibel em wanpela, tasol yumi gat wok bilong tilim ol Baibel ves stret. Wanem lotu i save opim dua long Kristen ken mekim sin -em wanpela giaman lotu.

2 Timoti 2:15autim stret tok tru

Mipela i bin stadi pinis long dispela presen namba 8 na 9, tasol i gat narapela kain samting mipela no tok long en yet, Em dispela kain tang i no gat kontrol long en, na em i no wanpela tok ples hia long dispela graun, no antap long heven. Na i no gat man inap tanim, no save long en. Na ol save testifai “dispela em mak ol bin kisim Holi Spirit pinis.” Aposel Pol i givim tok bilong kontrolim presen namba 8 na 9, tasol i no gat stia long Baibel long dispela “tangs.” Sampela i save autim kain kain tok long tangs, tasol yet ol bihainim pasin bilong mekim sin. Yu ken save tru antap -dispela i no wok bilong Holi Spirit. Ritim 1 Jon 3 i save klia tru long dispela.

Hibru 12:14 Man i no gat pasin holi, bai em i no lukim Bikpela.

Nogut yu westim taim bilong yu long traim traim long autim tok long tangs. Nogut wanpela spirit doti i kam paulim yu. Wanpela samting tasol yu mas hangri long en:

Matyu 5:6 Ol man i laikim tumas long kisim stretpela pasin, olsem man i hangre long kaikai na i dai long wara, em ol i ken amamas. Bai God inapim ol tru.

Seten i laik senisim namba tu blesing holines, na givim yu narapela kain samting bilong em yet. Sapos laip bilong man i stret, orait kalap kalap insait haus lotu i stret. Tasol sapos wokabout bilong man i kranki, orait kalap kalap insait long haus lotu em samting bilong sem.

1 Korin 14:19 Tasol long bung bilong sios mi laik mekim 5-pela tok tasol long tngting bilong mi, bai mi ken skulim ol arapela man tru, na maski long mekim 10,000 tok long narapela tok ples.

1 Korin 14:23 ...sapos olgeta manmeri bilong sios ol i bung wantaim, na yupela olgeta i mekim tok long narapela narapela tok ples, na sapos sampela man i no save, na i no bilip, ol i kam insait bai ol i tok, “Yupela i long long.”

Yes, sampela sinman i no gat save, tasol planti ol i bin skul, na ol gat save moa yet. Na taim ol kam insait long lotu, na harim ol mekim kainkain nois long tangs ol bai ting wanem? Olsem sapos wanpela man em i mekim tok long narapela tok ples ol kongrigesen i no save long en, em mak long wanem samting? Ating dispela em mak ol bin kisim Holi Spirit? Nogat. Dispela em mak ol no bihainim tising bilong 1 Korin 14.

Wanem samting tru tru bai mekim sinman kam insait na brukim skru long Bikpela?

1 Korin 14:24 ...sapos yupela olgeta i autim tok bilong God, na sapos wanpela man i no bilip, o i no save gut, em i kam insait, bai tok bilong yupela olgeta em i sutim bel

bilang dispela man, na tok bilang yupela olgeta i kotim em. V. 25. Olgeta tok i hait i stap long bel bilang em, dispela bai i kamap ples klia. Na bai em i lindaun long pes bilang en na i litimapim nem bilang God, na i tokaut olsem: Tru tumas, God i stap namel long yupela.”

Ol samting bilang lotu i mas kamap gut tru bilang lotuim God wanpela tasol. God I no as bilang ol kain paul tok bilang lotu i no gat mining.

1 Korin 14:26 ...Yupela i mas mekim olgeta samting bilang strongim sios.

Wanpela tangs evanselis i stori long em i autim tok long tausen tausen pipol. Sampela tausen ol kam long alta bilang beten long kisim Holi Spirit. Na inap 1,000 samting ol autim tok long tangs wan taim na ol “kisim Holi Spirit.”

Taspl long V. 27 Pol i givim 4 pela lo bilang kontrolim Tok Ples lotu:

- 1. 1 Korin 14:27 Sapos sampela i laik mekim tok long narapela tok ples, tupela o tripela tasol i ken mekim. Em inap.**
- 2. Ol i no ken mekim tok wantaim, Nogat. Wanpela i mas tok pastaim na narapela bihain long em.**
- 3. Wanpela man i mas tanim tok.**
- 4. Na sapos i no gat man bilang tanim tok, orait man bilang mekim narapela tok ples em i mas pasim maus long bung bilang sios.**

Man husat i gat dispela presen, em mas save klia tru wanem mining bilang dispela tok em yet i save mekim. Holi Spirit I no inap skulim man long narapela kain pasin Buk Baibel i no save sapotim. Man i mas daunim em yet na bihainim ol lo bilang lotu.

1 Korin 14:32 .Ol man bilang autim tok bilang God ol i save bosim spirit bilang ol yet.

Wanpela brata i mas ananit long narpela brata taim i gat Baibel ves bilang sapotim em. Em spirit doti tasol i save bosim man long tok long tangs i no gat mining. Dispela kain pasin i no save litimapim nem bilang Bikipela, na i no gat mining long ol lotu nabaut.

1 Korin 14:38 Sapos wanpela man i no pilim olsem, orait yumi no pilim em i man bilang autim tok bilang God tu.

As mining bilang dispela ves i olsem: Sapos wanpela man i no wanbel wantaim 1 Korin 14, orait em i mas sindaun na pasim maus tasol insait long haus lotu.

1 Korin 14:39 ...yupela i no ken tambuim pasin bilang mekim tok long narapela narapela tok ples.

Dispela i wankain olsem long De Bilong Pentikos.

Aposel 2:8 Olsem wanem yumi olgeta man wan wan yumi harim ol i tok long tok ples bilong yumi street....

Long dispela kain tasol, aposel Pol i bin orait long en insait long haus lotu. Dispela em i presen tru bilong Holi Spirit.

Sampela i save strongim ol sinman long mekim tok long tangs bilong kisim Holi Spirit. Ol dispela wok em bilong Seten stret. Na Baibel i no save saptim.

Jon 14:17Dispela em Spirit bilong tok tru. Ol manmeri bilong graun ol i no nap kisim em.

Wanpela ves moa bilong pininsim dispela sapta long presen et, na nain.

1 Koring 13:1 Sapos mi save toktok long ol manmeri long kain kain tok ples bilong man, na long tok bilong ol ensel tu, tasol mi no givim bel bilong mi long ol, orait mi olsem belo i pairap, o garamut i krai nating.

Sapta 9 - 1 Korin 13

Dispela sapta em i soim mining tru bilong holines. Em pasin bilong givim bel olsem God I save givim bel. I gat 4-pela kain pasin bilong givim bel.

1. Givim bel olsem God I save givim bel.
2. Givim bel olsem ol family
3. Givim bel olsem man wantaim meri insait long marit.
4. Givim bel olsem pasin pamuk.

Hia yumi i laik stadi long namba wan pasin bilong givim bel, em i wankain olsem God I save givim bel. Em i wanem kain givim bel? Dispela i save winim ol presen bilong Holi Spirit. Dispela kain givim bel em 100%, na i no mikis wantaim arapela samting nogut.

God I gat wanem kain pasin bilong givim bel ?

Jon 3:16 God I laikim tru ol manmeri bilong dispela graun olsem, inap long Em I givim dispela wanpela pikinini man...

Susa, brata bilong mi, harim nau, holines em i no wanpela flag bilong karim, no wanpela klos bilong putim, no wanpela lotu yu save go long en, no wanpela presen Spirit I save givim. Holines em samting i save stap insait long bel bilong man, na i save kamaut long laip bilong man. Pasin bilong givim bel olsem God i save givim bel em yu mas yusim laik bilong yu long mekim. Yumi no mas amamas long tanim han kais wasket long birua. Tasol holines tru bai mekim bikos Tok bilong God i soim yumi long mekim. Yumi bin tok bipo long pafeksen long Jon 17. Dispela pafeksen em pasin bilong givim bel tru tru. Holines i no antap moa long dispela, na i no daunbilo long dspela mak. Mipela tok bipo dispela i no pafeksen long aksen bilong man, o pafek long wokabaut bilong man. Dispela pafeksen em bel klin 100%. Laik bilong ol pela bel i dai pinis, na pasin bilong givim bel olsem God i save givim bel i save puap long bel. Dispela tasol em Holines bilong Baibel. Tru, em 100% tasol i gat spes yet bilong gro moa. Banana em 100% banana, tasol i gat spes bilong gro moa.

I no gat man inap kirapim dispela kain givim bel. I gat wanpela rot tasol, em Jisas Krais Yet I mas stap insait long bel bilong man na mekim. 1 Koring 13 i save soim ol kain aksin bilong givim bel.

Efesus 1:4 God i no wokim graun yet, na em i makim yumi pinis long Krais, bai yumi ken i stap holi na i no gat asua long ai bilong em. [KJV, holy and without blame before him in love.] Mining dispela kain pasin bilong givim bel i no gat kain samting bilong paulim.

Sapta 10 - Bret I No Gat Yis

Stori long dispela i save stap long O.T. na N.T wantaim. Yis em bilong mekim bret i solap gut, na bikpela moa. Sapos no gat yis, orait bret em olsem strong bisket tasol. Oltaim long Baibel yis i save makim ol pela bel, -as bilong sin.

Luk 13:21 Em i olsem yis. Wanpela meri i kisim dispela yis na i tanim wantaim bikpela dram plaua. Na bihain dispela plaua olgeta i solap. Lukim tu long [Matyu 13:33]

Em pasin bilong yis long go nabaut nabaut long olgeta hap plaua. Na i no gat wanpela liklik hap i no save go long en. Sampela i ting dispela i save makim Gutnius i go long olgeta hap graun, tasol nogat. Dispela i piksa tru long as bilong sin i save bagarapim laip bilong Kristen. Ol aksen bilong en i gat smel bilong as bilong sin. Em laik presim nem bilong Bikpela, tasol em no inap mekim gut tru. Em laik testifai long lotu, tasol testimoni em no gat laip tru long en. I gat hat wok long kontrolim belhat o bikhet. Dispela yis i save mekim bel wantaim het i solap. Dispela em sem kain wok yis i save mekim. Ol lain Galesia i gat trabel long dispela sin i bagarapim ol. Na Pol i tok:

Galesia 5:9 Liklik yis tasol em inap long mekim olgeta bret i solap.

Putim liklik posin long kap wara, na em i bagarap olgeta. Mikisim liklik sin wantaim holines na em bagarapim Kristen laip. olgeta. Jisas I tokim ol disaipol long lukaut long tising bilong ol Farisi na Sadyusi i olsem yis:

Matyu 16: 6 -12 Nau Jisas i tokim ol, Yupela was gut ! Yupela lukaut long yis bilong ol Farisi na ol Sadyusi!"

Mak 8:15 Yupeaa was gut ! Yupela lukaut long yis bilong ol Farisi na yis bilong Herot !

Luk 12:1 Yupela lukaut gut long yis bilong ol Farisi. Mi tok long giaman pasin bilong ol.

1 Korin 5: 6 -8 Liklik yis i save mekim olgeta bret i solap,Yupela i olsem bret i no gat yis olsem na yupela i mas rausim olupela yis, bai yupela i ken i stap nupela bret..... Yumi no ken kisim olupela yis, em yis bilong sin na pasin nogut tru . Yumi mas kisim bret i no gat yisDispela bret em i pasin bilong klinpela bel na tok tru.

Ol dispela ves i soim tru antap yis em i no Gutnius bilong Baibel, Nogat. Tru, yis i save mekim bret i swit moa, tasol i save makim samting i nogut tru long ai bilong Bikpela.

Stori long dispela i stap long Eksodas Sapta 12 na 13. God i tok save long Israel mas mekim Pasova, na redi long lusim Isip olgeta. Em tok long las kaikai long Isip, na i no gat taim bilong wetim yis solap. Ol mas kaikai kwiktaim, hariap. Putim plaua nating nating, na kukim olsem strong bisket. Nogut ol sindaun na toktok i go, i go. Taim sot,

na ol mas sanap na kaikai, na redi long go aut long biknait. Rausim yis long sospen, rausim long botol, rausim long wanem wanem ples nabaut. Rausim long haus. Tromoi. Bikos dispela i makim as bilong sin. Jisas I tok:

Luk 13: 20, 21 ...”Mi ken makim kingdom bilong God long wanem samting? Em i olsem yis.....”

Dispela “kingdom bilong God” em i no makim sios. Em makim samting i mikis. I gat gutpela wit wantaim gras nogut. I gat gutpela plaua mikis wantaim yis. I gat gutpela pis na pis nogut. Olsem dispela kingdom bilong God i save makim ol manmeri bilong Kristen lotu. Sampela tru tru Kristen, tasol arapela i gat nem Kristen tasol. Na lotu i solap long tupela kain.

Sios bilong ol Aposel i stap strong tru. Planti ol bin dai long han bilong ol Juda pastaim, na bihain long han bilong ol Rom. Tasol bihain i gat planti trabel i save kamap insait long sios yet, em yis, gras nogut, pis nogut. Ol dispela i stap insait long kingdom bilong heven. Yes ol kolim “Kingdom bilong Heven,” tasol kingdom bilong heven i stap hia nau long dispela graun. Em mikis. Dispela yis i save mekim Kingdom i solap tumas olsem posin. Jisas i tok long ol pipia gras:

Matyu 13:30 Yupela larim tupela i kamap wantaim, inap long taim bilong kisim kaikai

Na dispela yis i save wok insait long Kristen wankain olsem i save wok insait long kingdom. Long Baibel, plaua, bret, wit i save makim Kraist na ol Kristen.

Jon 6:35 Mi yet, mi bret bilong laip.

Matyu 3:12 Emi holim savol bilong en long han bilong en, na bai em i rausim olgeta pipia bilong wit. Bai em i bungim wit long haus wit bilong en. Tasol bai em i kukim pipia long paia i no save dai.

Papa bilong plua em Bikpela
Wit em ol Kristen.
Rausim skin long wit. sanktifaikesin
Plua -ples bilong stretim kot.
Bakstua makim ples heven
Skin wit em as bilong sin
Paia i makim panismin long hel

Sapta 11 - Aipas Man

Jisas I save putim han long aipas tupela taim. Bilong wanem man i no orait long wanpela taim tasol?

Mak 8:25Na Jisas i putim [KJV 2-pela] han gen long ai bilong em. Na dispela man i lukluk strong, na ai bilong en i kamap gutpela, na em i lukim olgeta samtingi kamap klia.

Tupela han, tupela ai, tupela taim. Jisas i mekim tupela wok long dispela man. Namba wan taim i no save pikisim trabel bilong en. Em i nitim namba tu wok bilong pikisim ai gut. Ol man aipas i save makim ol sinman.

Matyu 6:23sapos ai bilong yu i stap nogut, bodi olgeta bilong yu bai pulap long tudak...

Matyu 15:14 Larim ol i stap. Ol i aipas, na oli laik soim rot long arapela aipas.

Ol save wokabaut olsem aipas, na paul long rot. Ol no save lukim samting tru tru. Long namba wan wok ai bilong sinman i save op. Na nau em save lukim ol samting em i no bin lukim bipo. Tasol i wankain olsem long sampela Kristen i no save lukim ol samting i klia tumas. Taim ol bin tanim bel tru tru, na kamap nupela long Kristen laip, sampela i ting, "Nau mi inap pinis, na mi no gat nit long samting moa." Em bikos ol no save lukim ol samting klia tumas. Ol save ting mi bin kisim pulap long Holi Spirit pinis long namba wan wok. Tasol ol paul na no save lukim saming klia. Ol gat hap plang i pasim ai bilong ol.

Matyu 7:3 ...yu no tingim bikpela plang i stap long ai bilong yu yet ?

1 Koring 3:3 Yupela i stap yet long pasin bilong olupela bel.

Dispela hap plang em makim as bilong sin i save givim trabel long Kristen i no gat namba tu wok. Namba tu wok bai pikisim dispela trabel olgeta. Em bai rausim hap plang long ai bilong Kristen bilong em ken lukim ol samting klia. Nau em inap lukim namba tu wok klia long Baibel. Ol Kristen i save nitim Jisas long putim tupela han **gen** long ai bilong ol.

Sapta 12 - Sik Lepa

Taim Jisas I klinim ol lepa i piksa long namba tu wok. Jisas I save **oraitim** ol kain kain man sik, tasol Em i save **klinim** ol lepa. I gat planti stori long sik lepa long O.T. na N.T. wantaim. Jisas I no save pikisim as bilong sin. I no gat we long oraitim o pikisim.

Hia long America mipela i gat tupela kain kalabus.

1. Kalabus bilong trenim na stretim tingting na pasin bilong ol raskol.
2. Bikpela kalabus bilong kain man i no gat we long stretim pasin bilong ol.

Em olsem long ol pela bel, i no gat we long pikisim o stretim, olsem God I tok dispela O.T “Egak” mas i dai. Ai pas, lek nogut, kainkain sik God I save oraitim. Tasol sik lepa i narapela kain, i no gat we long oraitim. Em mas klinim. (KJV Cleansing)

Namba wan wok em bilong fogivim sin, tasol namba tu wok em bilong kinim as bilong sin i pinis olgeta. Olsem wanem God ken larim dispela kain sin long heaven. Nogat. Bipo wanpela meri i save haitim sik lepra bilong en. Na ol manmeri i no save long en. Em save putim paura bilong bebi long skin bilong en, tasol em no inap oraitim.

Matyu 10:8 ..Yupela go mekim orait ol sikman, na kirapim ol daiman, na mekim ol lepra kamap klin.

Matyu 8: 1 - 4 ...Orait, nau tasol sik lepra bilong en i pinis, na dispela man em i klin.

Matyu 11:5 ... Skin bilong ol lepraman i kamap klin.

Luk 17:14Orait ol i wokabaut i go, na skin bilong ol i kamap klin.

Mak 1: 40 - 45 Jisas i mekim klin wanpela man i gat lepra

Luk 5:13 Jisas i putim han long em na i tok, “Mi laik, Yu kamap klin” Orait, nau tasol dispel sik lepra pinis.

God I laik yumi ken klia tru long sik lepra i narapela kain sik, na i save makim as bilong sin, o ol pela bel.

Sik lepra i stap dip tru insait long blut bilong man. Dispela kain sik i save kaikaim nus, ia, pinga, na to, bilong man, na bihain, pinisim em olgeta. Ol save rausim kain man aut long siti, na ol mas stap ausait long haiwe. Na dispela sik lepa i no inap go insait long Siti bilong Bikpela. Nogut arapela i kisim dispela wankain sik long skin bilong ol. Long buk Livitikas sapta 13, na 14, Moses i save putim kainkain lo ol sik lepra mas bihainim:

1. Ol mas stap ausait long kem bilong Israel.
2. Ol mas kukim haus, bet, na klos bilong ol husat i kisim dispela sik.
3. Oltaim pris i mas sekap long ol.
4. Ol mas singaut bikmaus sapos narapela man i save kam klostu.

Dispela sik lepa i save stat long wanpela liklik sua tasol, na bihain em save kamap bikpela moa. I olsem taim mama i save karim pikinini wantaim as bilong sin, tasol bihain dispela as bilong sin i save gro na gro, moa na moa. (“Acquired depravity”). I save wok wankain olsem yis bilong bret.

Long ol arapela kain sik, i gat marasin o dokta bilong helpim, tasol man i gat sik lepra em i mas sindaun wetim dai tasol. I piksa tru long as bilong sin. Sapos Kraist i no klinim, orait dispela sik bai karamapim sol. I save wok wankain olsem bret i gat yis na go long olgeta hap bilong man. Dispela olupela bel bai pulim man daun long namba 2 dai.

Revelesen 22:14Dispela bikpela hul i gat paia em i namba tu dai.

Tasol tenkyu long Jisas yumi gat helpim bilong dispela kain sik. Het Pris bilong yumi, Jisas Kraist wanpela tasol inap klinim dispela as bilong sin, na pinisim olgeta. Ol sin-man i brukim lo na ol i mas go long kot na harim JAS. Tasol ol KRISTEN i mas go soim skin long HET PRIS bilong kamap klin.

Wanem samting dispela sik lepa i mekim bilong kamap klin ?

Luk 17:19Bilip tru bilong yu i bin mekim yu kamap orait olgeta....

God I no gat rot long klinim as bilong sin pastaim man i bilip. Na God I no gat rot long klinim as bilong sin taim man i bihainim laik bilong em yet.

Aposel 5:32 ...God i save givim Holi Spirit long ol manmeri i bihainim tok bilong em.

Glasim Sapta 27 gen, i gat tok save long bilip.

Sapta 13 - Lasaras I Kirap Bek Gen

Lasaras i kirap bek gen em piksa long Namba Tu Wok. Hia gen, yumi save lukim Jisas i mekim tupela kain wok long man. Bipo yumi lukim sinman i olsem ai pas, tasol hia yumi lukim sinman i olsem man i dai pinis.

Jon 11:14 ...Lasaras i dai pinins.

I gat planti Baibel ves i save soim sinman i olsem dai man.

Efesas 2:1na yupela..... husat i stap daiman long ol pasin bilong sakim lo na ol sin.

Efesas 5:14kirap long dai, na Kraist bai givim yu lait.

Matyu 8:22ol daimani ken planim ol daiman bilong ol yet.

Luk 15:32Dispela brata bilong yu em i dai pinis, tasol nau em i kamap laip gen.

Kolosi 2:13 ...Bipo yupela i mekim kain kain rong na yupela i bihainim pasin bilong olupela bel, na dispela i kilim yupela i dai.

Revelesen 3:1 ...Ol tok... "Dispela sios i gat laip i stap." Tasol nogat, yu dai pinis.

Ol sinman i bruk pinis wantaim God, yes ol i wokabaut yet long graun, tasol, ol i stap olsem daiman long God. Tupela i no save toktok wantaim. Tupela i no save wokabaut wantaim. Lasaras em dai, na em i dai pinis. Bodi bilong em, ol pasim raun raun wantaim bandis. Ol putim em insait long wanpela maunten ston, na pasim dua long narapela ston. Em dai, na foa-pela de i go pinis. Nau bodi bilong em sting pinis. Tasol Jisas Em I kam na singautim:

Jon 11:43 "Lasaras, yu kam ausait!" Ves 44. Orait daiman i kirap na i kam ausait.

Lasaras em no sinman, tasol em i piksa long ol sinman. Bipo em dai pinis, tasol nau em i gat laip gen. I wankain tasol long sinman i tanim bel na kamap nupela long Kristen laip. Kamap nupela em namba wan wok.

Jon 3:3sapos man i no kanmap nupela gen, em i no inap lukim kingdom bilong God.

2 Korin 5:17 ...Sapos wanpela man i stap long Kraist, orait God i mekim em i kamap nupela man tru.

1 Pita 1:23 Yupela i kamap nupela pinis

Tasol Kristen husat i bin kamap nupela gen, em gat trabel yet long laip bilong en. Em i nitim namba tu wok. Ol no stap fri long as bilong sin. Lasaras tu wankain olsem. Em i

pas wantaim ol bandis bilong matmat i karamapim olgeta hap bodi. Na pes blong em i pas nabaut wantaim laplap. Kristen i no gat namba tu wok em i no stap fri long as bilong sin. [Rom 7] As bilong sin i save pasim Kristen, i no fri long wokabaut gut.

Galesia 5:17olpela bel em i laik daunim Holi Spirit, na Holi Spirit em i laik daunim olpela bel.na samting yupela i laik mekim, em yupela i no inap mekim.

Em olsem Lasaras, na em i olsem laip bilong planti Kristen i no gat namba tu wok. Kristen laip bilong ol i sot tumas. Hat wok long beten, hat long amamas, hat long presim nem bilong Bikpela, hat long ritim Baibel. Dispela as bilong sin mekim. Taso Jisas yet i gat ansa long dispela bandis i pasim Kristen laip. I gat narapela wok bilong mekim:

Jon 11:44 ...Lusim laplap na larim em i go.

Tupela kain trabel i gat tupela kain ansa.

1. Sinman, Jisas inap givim nupela laip.
2. Olpela bel i pasim Kristen, Jisas inap mekim fri.

Yes, Jisas I gat ansa long ol Kristen husat i gat trabel long as bilong sin.

Sapta 14 - Lapun Man I Dai

Husat dispela lapun man ol mas kilim i dai?

Rom 6:6 olpela bel [KJV olpela man] bilong yumi em i dai pinis long diwai kros wantaim Krai.

Efesas 4:22 Bipo yupela i wokabaut long pasin bilong olpela man.

Kolosi 3:9 long bel bilong yupela, yupela i rausim pinis olgeta pasin bilong olpela man.

Ol holines evanselis bipo ol save dispela olpela lapun man i wankain olsem ol pela bel, no as bilong sin. Tasol nau i gat sampela nupela evanselis i tok “Nogat, dispela olpela man i save makim olpela laip bipo man i bin kamap Kristen.” Ol paul tru long dispela kain tising. Dispela Rom sapta 6 em i no tok long namba wan wok fogivnes, em sapta long holines. Na em tok klia tumas long dispela olpela man i mas dai. Dispela olpela man em wanem samting? Em dispela strong pela laik bilong man i mas bruk daun olgeta na pinis. I wan kain Jisas I beten long gaden:

I gat tu-pela samting hia long ves 6 yu mas save long en.

1. Konsikresin - Dispela strong pela laik bilong Kristen i mas dai. Tasol dispela i no save kilim as bilong sin.
2. God wanpela tasol inap kilim dispela as bilong sin, o olpela bel.

Luk 22:42 ...Yu no bihainim laik bilong mi. Nogat. Yu bihainim laik bilong yu...

Ol Kristen i mas painim wanpela ples bilong go mekim dispela sem prea.

Rom 7 i stori long meri i trabel long marit.

Rom 7:2 ...Sapos meri i marit na man bilong en i stap laip yet, orait lo i pasim em wantaim man bilong en. Tasol, sapos man bilong en i dai, orait dispela lo i bin pasim wantaim man, em i no pasim em moa.

Stori i save go olsem. Wanpela ol pela man, tit bruk, wait pela gras, lek krungut, bodi bilong en guria, na smel nogut tu. Ol i fosim wanpela yangpela, naispela meri long maritim em. Em paitim meri long stik wokabaut planti taim, na givim hat wok tru longen. Lo i save pasim tupela wantaim. Tasol long wanpela gutpela de, dispela lapun i dai pinis. Lo tu i no pasim meri wantaim daiman. Em i stap free long lo bilong lapun man. Na bihain wanpela gutpela, yangpela man, bodi bilong en strong olgeta, em i save maritim dispela yangpela meri. Na tupela i amamas tru.

Dispela ol pela man i save makim olpela bel. Em i save givim hat wok long ol Kristen, husat i no gat namba tu wok. Ol Kristen husat i gat trabel long dispela olpela bel, mas larim God i kilim i dai, maski long marimari long en. Na nau ol ken marit long nupela - Em Jisas Krai, Pininini bilong God Papa.

1. Em wok bilong man long dai aut long strongpela laik bilong en yet.
2. Em spesol wok bilong God Wapela long kilim as bilong sin long sem taim man i bilip.

Sapta 15 - Pikinini Wit

Bipo yumi bin lukim long rausim skin bilong wit, na kukim long paia i no save dai. Tasol nau yumi lukim gutpela wit tu i mas dai.

*Jon 12:24Mi tokim yupela, **Sapos pikinini wit em i no pundaun long graun na i dai, bai em wanpela tasol i stap. Tasol, sapos em i dai, bai em i kamap na karim planti kaikai.***

Ves 24 i poin long dai bilong tupela.

1. Dai bilong Jisas yet
2. Na ol Kristen i man daiaut long olupela bel.

Rom 6:11 ...Olsem tasol yupela tu i mas tingim yupela yet i bin i dai na i no aninit long strong bilong sin moa.

Long namba wan wok sinman i save kisim nupela laip, tasol i no kam wantaim presin bilong givim ofa long God.

Jon 3:3 sapos man i no kamap nupela gen, em i no inap lukim kingdom bilong God.

Tasol long namba tu wok em Kristen i save kam wantaim presin bilong givim long God.

Rom 12:1,2 ...Ol brata....Yupela mas givim bodi bilong yupela long God olsem ofa...

Wanem samting man ken mekim bilong daiaut long sin? Man i mas yesa, yesa, long ol wan wan poin long laip God I putim pinga long en. Sampela poin i draipela tru, sampela i liklik samting nating. Tasol yumi no ken kalapim wanpela poin God i save soim long yumi. Taim yumi save daunim laik bilong yumi ananit long laik bilong God, yumi save kolim diapela “daiaut.” Aposel Pol yet em save testifai long dispela.

Galesia 2:19 Mi hangamap pinis long diwai kros wantaim Krais

Galesia 6:14Long diwai kros bilong Krais, pasin bilong dispela graun em i dai pinis long tingting bilong mi, na mi yet mi olsem daiman long ai bilong ol man bilong graun.

Hia Pol, em no testifai long kamap nupela gen. Em wok bilong Kristen long daiaut, tasol dispela i no save pinisim as bilong sin. God wanpela tasol ken klinim as bilong sin.

1 Thesalonaika 5:23 ..God em i as bilong bel isi, em yet i ken mekim yupela i holi olgeta.. v24Em bai i makim olsem.

Daiaut o konsikresin, em wok bilong Kristen. Sanktifaikesin [bel klin] em wok bilong Bikpela.

Sapta 16 - Faivpela Save Meri

Stori i stap long Matyu 25. I gat liklik tok save long pasin bilong ol Juda long marit. Ol lain Juda i save pati long haus bilong meri i laik marit. Jisas tu i go long kain pati olsem long Jon sapta 2. Long dispela pati ol wetim man bilong marit i kam. Em i no save kam bilong maritim tupela meri, o tenpela meri. Em i kam bilong maritim wanpela meri tasol. Piksa long Kraist olsem: Em I kam bilong maritim wanpela meri tasol. Orait, dispela 10-pela meri i no bilong marit. Ol i olsem wokmeri bilong go holim lam sapos man i save kam long tudak. Olsem dispela wanpela meri bilong marit i makim sios: Efesas 5:31,32

Na 10 -pela yangpela meri i no marit i mas makim Isrel.

Matyu 25:1 Long dispela taim....(Bihain long Tribulation long Sapta 24)

Long stori hia, man bilong marit em i no save kam kwik, na ol wokmeri i les tru. Na lam bilong 5-pela i dai pinis. Tasol ol save meri i bringim narapela botol i gat wel moa. Mipela save pinis ol taim long Baibel, wel i save makim piksa long Holi Spirit. Poin long stori i tupela:

1. Olgeta 10-pela meri i gat lam na wel, na lait wantaim. Dispela i save makim namba wan wok. Olgeta 10-pela i stap Kristen tru tru, na wetim kambek bilong Jisas.
2. Faivpela tasol i bringim narapela botol i gat wel moa. Namba tu botol i save makim namba tu wok.

Yumi no save, tasol ating stori i mas samting olsem: Planti taim 5-pela save meri tokim arapela long ol mas go kisim wel moa. Tasol faiv-pela i tok “Nogat. Mipela inap pinis. Dispela namba tu wok yupela tok long en, mipela no gat nit.” Tasol nau, man bilong mariti kam biknait tru, na 5-pela i gat lam i lait ol go insait long pati. Na bikman i pasim dua. I wankain olsem God i pasim dua long sip bilong Noa.

Jenesis 7:16Na BIKPELA i pasim em insait.

Faiv-pela i krai krai planti tasol ol no inap go insait. Wanem ples ol inap go painim wel long biknait ? Ol stua i pas. Dua i pas. Pati i pas, Heven i pas. Bikos ol bin givim beksait long we bilong holines. Sapos wel i pinis, orait lam (Kristen Laip) tu i pinis. I wankain olsem tude tu, planti ol les long harim prising long holines.”Mipela no gat nit.!”

Luk 12:45 ...Wokboi em i tingting “Bikpela man bilong mi em i no inap i kam kwik”[Matyu 24:48].

Matyu 25:12mi no save long yupela (Em 5-pela meri i bin bekslaid).

Matyu 7:23 ...Mi no save liklik long yupela (Em sinman i no bin tanim bel).

Sapta 17 - Foa Pela Kain Graun

Long Matyu 13 i gat 4-pela kain graun:

1. Ples wokabaut
2. ples i gat ston
3. rop i gat nil
4. gut pela graun

4-pela kain graun i makim 4-pela kain man.

Wanpela man bilong planim kaikai em i go planim kaikai, wit o samting.

Sampela pikinini kaikai i pundaun hapsait long ples wokabaut, na ol pisin i kam pinisim olgeta. Dispela i save makim evanselis em i kam autim tok, tasol ol pipol i les long harim. Orait Seten em i kam stilim tok, na ples i no gat tok bilong God moa.

Nekis, sampela kaikai i pundaun antap long ston. Dispela lain ol kisim tok bilong God na amamas tru. Tasol taim bik sankamap, piknini kaikai i drai olgeta, na em i dai. Em i no got rot bilong putim rop i go daun dip bikos ston pasim. Pikinini kaikai em kamap kwik, tasol taim bilong hevi painim em, na em bagarap. Brata, hel bai pulap long ol dispela kain pipel. Ol amamas long harim gutnius, na ol tanim bel i go long God, kwiktaim. Ol joinim sios, mekim wok bilong Bikpela, singim song, testifai, mekim beten go i go. Tasol nau ol painim wanpela ston i stap long laip bilong ol. Dispela ston em makim as bilong sin. Kristen laip bilong ol i slek nau. San i kukim. Nau em taim bilong karim diwai kros, tasol ol les long goan long Kristen Laip. Testimoni i dai, Kristen laip i drai, nogat taim bilong prea, Baibel em stap we? Brata, ol painim aut ol pela bel i stap yet. Ol bin ting Kristen laip em bilong flai olsem pisin tasol. Nau ol painim aut Kristen laip i gat maunten, i gat vali, i gat riva, na i gat olupela bel i save mangal agens Holi Spirit. San hat, na Kristen laip i no stap moa. As bilong sin mekim.

Nekis em dispela graun i gat rop nil i save pasim nek bilong wit. Dispela i makim Kristen husat ol bin goan long namba tu wok, na ston bilong sin, ol rausim pinis. Kristen laip bilong ol i bin gro gut tru. Tasol nau narapela trabel i save kamap. Rop nil, isi isi i kamap na ol no save long dispela.

Luk 8:14..Tri-pela samting i save karamapim

1. *Ol kain hevi*
2. *Mani samting*
3. *olkain amamas bilong dispela graun*

Em ol kainkain wari bilong dispela graun, kaikai, klos, haus, mani, ol wanem samting ol wari long en, na dispela i pasim nek bilong Kristen. Na kristen laip i dai. Bipo ol bin goan long holines haiwe, tasol nau lusim. Ol kain kain gras nogut, rop nil i pinisim

olgeta. Pren, em trik bilong Seten i save kam isi isi. Oltaim, oltaim, yumi mas lukaut long ol dispela samting i laik kamap insait long laip bilong yumi, na katim nek bilong Kristen laip.

Nekis graun, em gutpela graun. I no klostu long haiwe, em i no gat ston, rop nil na gras nogut, ol save klinim na lukautim gut. Na wit bilong Kristen laip i gro moa yet. Baibel i stap, taim bilong prea i stap, testimoni i stap, em bisi long winim arapela sol. Dispela graun i save makim strong pela Kristen i gat namba tu wok.

Sapta 18 - Jisas I Klinim Tempel

Taim Jisas I klinim tempel, em piksa long namba tu wok. Stori i stap long 4-pela Gutnius. Jisas i kamap 30 pela Krismas, na Em I statim wok Profet bilong Em. Namba wan wok Em I go mekim pastaim, em bilong klinim Tempel. Painim stori long Jon 2. Em i mekim wok Profet i go 3 pela Krismas, na las wok tru em I save mekim, Em I go bek na klinim tempel gen. Matyu 21, Mk 11, na Luk 19. I olsem, namba wan hevi bilong Em, na las tingting, em bilong Haus Holi bilong God i mas stap klin.

Matyu 21:13 Baibel i tok olsem: Haus bilong mi bai ol i kolim haus bilong prea.

Na tising bilong Baibel i klia tru long bodi bilong ol manmeri i tempel bilong God tu.

1 Korin 6:19 Bodi bilong yupela em i haus holi bilong Holi Spirit

1 Koring 3:16 ..Yupela i haus holi bilong God, na Spirit bilong God i stap insait long yupela.

Olsem bodi bilong yumi i mas klin long ol doti pasin bilong dispela graun. Sapos spirit nogat i lusim pinis wanpela man, orait dispela man em klinim haus gut;

Luk 11:25 ..ol i brumim pinis na bilasim pinis [Matyu 12:44]

Orait, mipela no save lukim Jisas I go klinim haus bia, haus pamuk, haus danis, haus piksa, haus laki. Nogat, Em I no gat intres long ol dispela. Tasol Em I gat bikpela hevi long Kristen i mas stap klin.

Jon 14:17 ...Spirit bilong tok tru. Ol manmeri bilong graun ol i no inap kisim em.

Efesus 5:26 ..Em i mekim olsem bilong wasim sios na i kamap klin long waswas bilong wara wantaim tok. V.27 Em i laik mekim sios kamap naispela tru long ai bilong em, na bai sios i no gat doti na grile na kain samting olsem. Nogat.

Bilong wasim sios, em mas namba tu wok. Ol haiden i no redi long God i klinim bel bilong ol. Pastaim ol i gat wok bilong go stretim sin wantaim Jas. Na ol Kristen i gat nit long go lukim Het Pris na larim em i klinim as bilong sin.

Olsem Kraist I bin klinim tempel bipo, wankain olsem tasol Em I laik kam insait long bel bilong Kristen na klinim as bilong sin long bel bilong ol.

Sapta 19 - Pasin Bilong Katim Skin

God I tokim Ebrahim, wantaim ol pikinini bilong em i mas inapim kontrak bilong katim skin.

Jenesis 17:10 ...Dispela em i kontrak bilong Mi.Yupela bai katim skin bilong olgeta wan wan pikinini man namel long yupela.

Buk Aposel, Ol sapta 10, 11, na 15, i gat stori long dispela pasin bilong katim skin.

Tasol Aposel Pol i gat tising long ol Kristen mas katim skin bilong bel.

Rom 2:29 ..pasin bilong katim skin, em i samting bilong bel.

Mama i save karim yumi wantaim sampela skin i raunim bodi sait bilong ol man. Na long N.T. ol save yusim dispela skin i olsem piksa long as bilong sin. Yumi no gat askim long dispela, yumi save kisim nating-nating. Olgeta lain Adam, mama i save karim ol wantaim dispela skin. Yu mas klia, dispela skin i no gat sin, tasol Aposel Pol i lainim ol sios dispela pasin bilong Juda em i piksa long ol manmeri Kristen i mas katim as bilong sin long bel.

Long N.T. God i no save kisim glori long man husat i save katim skin long bodi. Kaatim skin em God i mekim kontrak wantaim ol Juda. Dispela i no save helpim wanpela man long sevim tewel bilong en. Tasol God bai kisim glori taim Kristen manmeri i save katim skin bilong bel na tromoi. Long pasin blong katim skin, Ebrahim i sapim wanpela ston na katim sampela skin long hap bodi bilong ol pikinini man bilong en. Aisak wantaim Ismael tu. Tasol tising bilong aposel Pol i olsem: -dispela skin i save stap long bel, no long spirit bilong man (meri tu wantaim). Na dispela skin bilong bel, i gat nit long katim na tromoi. Dispela em klia piksa long mama i save karim yumi wantaim as bilong sin.

Tude tu, sampela autsait long lain Ebrahim i bihainim dispela pasin. Tasol Baible i klia ol man husat i save katim skin, dispela i no gat wok long kisim bek man. Na ol lain manmeri tude, i mas bilip wantaim papa Ebrahim, na ol ken katim skin bilong bel. Olsem, katim skin long bel em klia piksa long namba tu wok sanktifaikesin.

Sapta 20 - Graun I Paia Olgeta

Long taim graun i paia olgeta i piksa long namba tu wok.

Dispela graun i gat 2-pela baptais:

1. *2 Pita 3:6 God i tok na em i mekim wara i kamap haiwara long dispela graun, na graun i bagarap olgeta.* [nogut sampela i ting hap graun tasol bagarap]
2. *2 Pita 3:10 Long dispela De bai skai em i pairap bikpela na i lus. Na olgeta liklik samting bilong en bai paia i kukim na i pinis. Graun tu, wantaim olgeta samting ol i wokim i stap long em, bai paia i kukim olgeta.*

Long sait bilong spirit tu i gat tupela baptais:

1. *Matyu 3:11 Mi baptaisim yupela long wara*
2. *Matyu 3:11 Em bai i baptaisim yupela long Holi Spirit na long paia*

Yumi ken tingim olsem. Namba wan, long taim bilong Noa, graun i kisim baptais long wara, na dispela i makim taim man i bilip na kisim baptais long wara. Na namba tu samting, Pita i tok graun bai kuk olgeta, em olsem graun i kisim baptais long paia. Na dispela i makim taim Kristen i kisim baptais wantaim Holi Spirit na paia. Yumi nitim baptais long Holi Spirit wantaim paia bilong klinim as bilong sin, na bel i kamap holi.

I no gat rot long man i ken klinim bel bilong en yet, na redim bel bilong kisim Holi Spirit. Sapos olsem, orait i no gat nit long kisim Holi Spirit. Em dispela baptais long Holi Spirit paia tasol ken pinisim ol pela bel. Sapos yumi yet ken mekim, orait i no gat nit long Holi Spirit long kam mekim.

Holi Spirit I kam long Jisas bilong welim Em. Jisas I no gat as bilong sin, na I no gat nit long kisim baptais long paia. Jon i save baptais long wara, tasol em no inap baptaisim ol manmeri wantaim paia. Jisas em no baptaisim wanpela man long wara, tasol em save baptaisim wantaim Holi Spirit na paia.

Matyu 3: 14 ...Tasol Jon i laik pasim em, na i tok, "Mobeta mi kisim baptais long yu."

Jon i no save askim Jisas long baptaisim em long wara. Nogat. Em askim Jisas long kisim baptais wantaim Holi Spirit na long paia. Nogat. Jisas I stap long heven na KAPSAITIM Holi Spirit i pundaun antap long ol manmeri. Long namba tu wok holines, Holi Spirit I save stap antap wantaim Jisas, na Jisas I kapsaitim na baptaisim yumi WANTAIM Holi Spirit. Em aksin bilong Jisas long baptais. Em Holi Spirit i kapsait olsem wara.

Jon 16: 7sapos Mi no go, Poroman bai i no inap kam long yupela. Tasol sapos Mi go, Mi bai salim Em long yupela.

Dispela i wanpela trutru promis olgeta Kristen i gat nit long kisim.

Sapta 21 - Beten Long Getsemani

Pren, yumi save kam nau long graun holi. Yu ken painim dispela stori long Matyu 26, Mak 14, Luk 22. Jon i no givim stori. Olsem wanem na dispela i makim namba tu wok?

Jisas yet i no gat nit long kisim namba wan wok, no namba tu wok. Dispela i makim tru konsikresin ol manmeri mas mekim bilong kisim namba tu wok. Konsikresin, em mining long givim laip long God antap long alta olsem ofa. Dispela i no save kilim as bilong sin, tasol i redim man long Holi Spirit i kapsait long Heven.

Matyu 26:39 “Yu no ke n bihainim laik bilong mi. Nogat.. Yu mas bihainim laik bilong yu”..

I no gat we yumi ken kopi samting Jisas I bin mekim long Getsemani. Dispela prea i no liklik samting nating. Na dispela strong pela laik insait long manmeri i mas bruk daun olgeta ananit long laik bilong Bikpela. Yu save go long we bilong yu yet, tasol God i laik yu ken go long narapela rot.

Aisaia 53:6 Yumi olgeta i olsem sipsip i raun nabaut, na yumi wanwan i bin bihainim laik bilong yumi yet.

Namba wan wok em bilong fogivim sin, na pasin bilong brukim Lo. Tasol bilong kisim namba tu wok, yu mas brukdaun, na ananit long laik bilong God. Aisak, em dia tumas, i mas go antap long alta ston. Bilip i no inap wok long taim yu bihainim laik bilong yu yet. Dispela strong pela laik em trabel bilong Kristen laip. Sapos Kristen i save gohet long dispela rot em bai bekslaid, na bruk wantaim God. I no gat wanpela i ken sakim tok, na stap Kristen yet.

Dispela rot bilong konsikresin, yu mas go wan pis. Tri-pela disaipel i no inap go wantaim Jisas. Ol slip i stap. Yu yet tu, mas i go wanpis. Lain bilong yu, no inap go wantaim, wantok nogat, papa na mama, nogat, brata na susa, nogat, pasta nogat, arapela Kristen, nogat. Yu, wanpis mas mekim dispela konsikresin, na putim yu yet antap long dispela alta bilong mekim ofa. Dispela rot bilong konsikresin em sem rot bilong go long kalvari. Na aposel i givim testimoni bilong en:

Galesia 2:19 Mi hangamap pinis long diwai kros wantaim Krais.

Sapta 22 - Kraist I Dai

Long ofa long bodi bilong Kraist, yumi ken lukim piksa long namba tu wok. Dispela stori i save stap long olgeta 4-pela Gutnius. Aposel Pol i save givim testimoni klia long mining bilong dai wantaim Kraist:

Galesia 2: 19 Mi hangamap pinis long diwai kros wantaim Kraist.

Yu no ken ting Jisas i kisim namba tu wok long diwai kros, tasol em piksa tasol long Kristen i save dai aut long sin wantaim Kraist. Jisas Yet i no gat nit long askim fogivnes, o kisim baptais bilong Holi Spirit. Maria i save karim Jisas em holi tru. As bilong sin i save kam long lain bilong papa. I no save kam long lain bilong mama. Olsem Maria i karim Jisas fri long sin.

Matyu 1:20 Dispela pikinini em i kisim pinis long bel bilong en, em Holi Spirit i bin givim long em.

Jon i baptaisim Jisas long wara. Na Jisas I kisim welim bilong Holi Spirit taim Em i kam daun olsem pisin long Jisas. Em I nogat nit long Holi Spirit i kapsait long em, bikos i no bin kisim as bilong sin long waspapa bilong em, Josep.

Matyu 3:16 Em i lukim Spirit bilong God i kam daun olsem wanpela pisin na i kam i stap long Jisas.

Pol i tok em hangamap. Strongpela laik bilong man i mas pilim nil, na spia, na pen. Na em mas dai. Em dispela olupela man, Egak, i no inap ananit long laik bilong God.

Rom 6:6Olpela bel bilong yumi em i dai pinis long diwai kros wantaim Kraist.

Em dispela olupela man, em save stink (ol meri tu i gat dispela olupela man bilong sin) em dispela olupela bel, bikhet, tingting long yu yet tasol, bel hat kwik, kros nabaut, het solap, bel solap, mi yet tasol, trikim narapela long kisim namba wan sia, ol dispela i save stap hait, dip insait long bel i no klin. Em dispela tasol, mipela tok “man mas daiaut.” Tasol yu mas klia long dispela: Dai long sin pinis, tasol yu no inap yet. Yu no inap sanktifaim yu yet long kamap holi. Yu mas bilipim God long sanktifaim yu nau tasol.

Rom 6:6 ... bilong pinisim strong bilong sin i save wok long bodi bilong yumi
KJV Our old man is crucified with him, that the body of sin might be destroyed.
Tupela samting hia.

1. Olpela man, Strongpela laik bilong man i mas hangamapim long kros.
2. Bodi bilong sin, (bodi bilong man nogat) God yet mas pinisim dispela.

Long laik bilong olupela man yu mas daiaut, tasol long “bodi bilong sin” Em yu mas givim long han bilong God long pinisim.

1 Tesalonaika 5:24 God...bai i mekim olsem. [holi]

Hangamapim man long diwai kros em pasin bilong Rom. Ol no save mekim long ol lain bilong ol yet. Ol save mekim long ol arapela lain tasol. Ol save rausim ol klos, na hangamap skin nating long diwai. Em samting bilong sem tru. Ol hangamapim long rot bung bilong planti pipol ken lukim. Rot bilong diwai kros, em rot biong karim sem. Long dispela em hat tumas, na planti Kristen tanim na go bek, na lusim Kristen laip. Planti pasta i no save kliam tingting bilong ol kongrigesin long karim sem bilong diwai kros. Ol pes-sem, long go long dispela rot i gat daun pasin tru. Planti pipol ol tromoi laip bilong ol long kainkain samting nogut, tasol hat tru long ol i kisim sem wantaim Kraist.

Jon 6:66 Dispea tok i pinis, na planti disaipel bilong Jisas i lusim em, na ol i go bek, na ol i no wokabaut moa wantaim em.

Tasol Moses em i amamas wantaim ol pipol bilong God long dispela liklik get, na liklik rot.

Hibru 11: 24 - 26 Moses i bilip long God. Bihain em i kamap bikpela pinis, em i no laik ol i kolim em pikinini bilong pikinini meri bilong Fero. Em yet i laik kisim hevi wantaim lain bilong God. Em i no laik bihainim pasin bilong sin na painim amamas bilong sotpela taim tasol. Em i ting, sapos em i kisim sem long nem bilong Krai, dispela i winim tru olgeta mani na bilas samting bilong Isip. Em i ting long dispela gutpela pe bambai God i givim em.

Moses i tingim dispela sem bilong lain bilong God. Long bilip, em tingim strong long bihain dispela prais wetim em long heven. Bilong wanem planti Kristen i hat tru long karim sem bilong Kraist? Bilip bilong ol i sot tumas, na ol ai pas long prais i wetim ol bihain.

Trabel em olsem: Long taim yu laik nilim dispela ol pela bel long diwai kros, olsem Pol i bin mekim, orait dispela ol pela bel em laik ranawe hait. Em yu mas go kisim na bringim em aut long sanlait na konfesim. Agag tu i krai long Samuel ken sori long en, olsem king Sol i bin sori long en. Tasol nogat. Samuel em katim, katim, katim, em i dai. Dispela em we bilong pinisim dispela ol pela bel.

Hibru 13: 12 Olsem na Jisas tu i bin karim pen ausait long dua bilong banis, bilong mekim ol manmeri i kamap holi long blut bilong en.

Na nau Kristen ken testafai wantaim Pol “Mi hangamap pinis wantaim Krai.”

Sapta 23 - Ol Lain Tesalonaika

Dispela pas aposel Pol i salim long Tesalonaika em i save soim tru antap namba tu blesing holines. Dispela taun i stap long kantri Gris, na Pol i bin go lukim ol long namba tu wokabaut bilong en. (Stori i stap long Aposel 17) Pol i stap 3-pela wik long Tesalonaika, na sampela i laik kilim em, na em i ranawe long nait, na kamap long Atens. Dua i pas, na Pol i no gat rot long go bek gen long Tesalonaika. Long Atens, em tingting sori long ol lain Tesalonaika i stap olsem wanem, na salim dispela pas bek long ol.

1 Tesalonaika 2:18 Olsem na mipela i laik i go long yupela. Mi Pol, mi traim planti taim, Tasol Seten i pasim mipela.

Nau, Pol i laik salim Timoti bilong luk save long ol stap olsem wanem long Kristen laip. Nogut Seten i bagarapim na ol pundaun pinis.

1 Tesalonaika 3: 1 - 3.... I orait bai mitupela tasol i stap long Atens. Na mitupela i salim Timoti.....Nogut bai sampela i surik long dispela hevi na pen.

Orait, tru tumas, Timoti i go bek long Tesalonaika, na em luk save gut long ol stap olsem wanem. Na em i kambek gen na givim repot long Pol long ol stap gut tru long Kristen laip.

1 Tesalonaika 3:6Orait Timoti i lusim yupela na nau tasol em i kamap long mipela. Na em i autim gutpela nius long mipela. Em i tok long yupela i bilip, na yupela i save laikim tru ol man..

Yes, ol dispela lain i stap gut tru, wantaim bilip tru. Tru ol bin karim hevi, tasol dispela i no bin bagarapim bilip bilong ol, na ol stap strong tru long Kristen laip. Nau, Pol i harim dispela ripot na em sindaun bilong bekim dispela pas long ol.

Long sapta 1:

Ves 1. Ol stap yet wantaim God Papa Na Jisas.

Ves 3. Bilip bilong ol i kirapim gutpela pasin

Ol hat wok long bihainin pasin sori

Ol save strongim bel

Ol wetim kambek bilong Jisas

Ves 4. Ol stap brata bilong Pol

Ves 5. Ol kisim Gutnius wantaim strong

Gutnius i bin kam wantaim Holi Spirit

Gutnius i kirapim strongpela bilip long bel.

Ves 6. Ol bihainim pasin bilong Pol

Ol bihainim pasin bilong Bikpela.

Ol i bin kisim tok bilong God

Ol bin kisim planti hevi

Holi Spirit I bin kirapim ol

Ol amamas

Ves 7. Ol soim gutpela pasin

Ves 8. Ol telimautim tok bilong Bikpela
Ol bilip long God

Ves 9. Ol bin lusim god giaman
Ol tanim bel i go long God
Ol kamap wokman bilong God

Ves 10 Ol wetim Pikinini bilong God

Long sapta tu:

Ves 1. Wok bilong Pol i no lus nating.

Ves 10 Pol i kolim ol "bilipman"

Ves 13 Ol bin kisim Tok bilong God
Ol tingim dispela em Tok bilong God
Tok i bin wok strong long bel bilong ol.

Ves 14 Ol bilip wankain olsem sios long Juda
Ol wankain ol Juda long karim pen
Ol manmeri bilong God.

Kristen laip bilong dispela kongrigesen i save winim tru planti arapela kongrigesen Pol i bin kirapim. Tasol yet ol sot long namba tu wok holines.

Ating planti ol ting ol Tesalonaika inap pinis, na ol no nitim samting moa gen. Tasol nogat. Pol i strongim ol long ol mas goan long kisim namba tu wok.

1 Tesalonaika 3:10 ...

Sapos bilip bilong yupela em i sot liklik, orait mipela i laik mekim em inap.

1 Tesalonaika 4:3 Laik bilong God em i olsem: Yupela i mas kamap holi...

Dispela trabel i stap, ol no bin kisim namba tu wok -bel klin. Ol gat gutpela repot long planti samting, tasol ol sot long holines. Nogut ol sindaun long namba wan wok na malolo. Bilong fit long heven, bel i mas klin. Bilip bilong ol i sot yet long sanktifaikesin.

1 Tesalonaika 4:7 ...God... Em i singautim yumi bilong bihainim pasin holi.

Em nau, God I singautim ol lain Tesalonaika Kristen long ol mas kamap holi. Olsem wanem sapos sampela Kristen i tok "Ol no gat nit long narapela samting moa.?"

1 Tesalonaika 4:8 Olsem na man i givim beksait long dispela tok, em i no givim baksait long man. Nogat. Em i givim baksait long God. Na God tasol i givim Holi Spirit bilong en long yupela.

Ol dispela hat wok bilong Tesalonaika bai lus olgeta sapos ol i no save goan long kisim holines. Na tewel bilong ol tu bai lus, bikos ol i no gat rot long go insait long Nupela Jerusalem wantaim as bilong sin.

1 Tesalonaika 3:10 Long san na long nait mipela i save beten....

Pol em save karim bikpela hevi long ol dispela lain mas goan long holines. Sapos nogat, i no long taim, na **Seten bai kam insait olsem wel lion na brukim sios olgeta.** Em nau, Pol em save beten olsem:

1 Tesalonaika 5:23 God em i as bilong bel isi, em yet i ken mekim yupela i holi olgeta. Na em i ken lukautim spirit na tewel na bodi bilong yupela, bai yupela i stap gutpela olgeta, na i no gat asua long taim bikpela bilong yumi Jisas Krai em i kam bek.

Sampela poin mi laik mekim long dispela prea. Ol dispela lain i no stap holi olgeta. Ol klia olgeta long namba wan wok, tasol ol sot long holines. Holines em pul ansa bilong sin kwesten. I gat marisin bilong pinisim sin olgeta. Yu lukim? OLGETA, OLGETA, OLGETA ! Wanem lotu husat i opim dua bilong Kristen i ken mekim sin -em wanpela lotu giaman. Dispela Baibel em tok tru bilong Bikpela. Na narapela poin long dispela prea i olsem. Dispela wok bilong holines, God I no save mekim long taim man i kamap long heven. Nogat. Dispela holines em bilong redim yu long kambek bilong Jisas. I olsem: yu mas kamap holi hia, nau, long taim yu stap long dispela graun. Olsem dispela wok bilong holines i bikpela tumas, na man i no inap klinim bel bilong en yet?

*1 Tesalonaika 5:24 God i singautim yupela, em i stret olgeta. **Em bai i mekim olsem.***

Tok save long 1 Tesalonaika 5:23 Tingim gen 2-pela mining bilong Santifaikesin.

1. Makim samting holi bilong God tasol. Haus Sel, Alta Gol, Haus Lotu, ol kain samting olsem.

2. Holi Spirit klinim as bilong sin long bel.

Na sampela i tok “1 Tesalonaika 5:23 em olsem namba wan mining tasol. Na i no gat tok long bel klin. Tasol yumi mas klia 1 Tesalonaika 5:23 em namba tu mining bilong sanktifaikesin.

Sapta 24 - Boi I Gat Bret Na Pis

Stori i stap long Jon 6, Matyu 16, Mak 8, Luk 9. Hia yumi ken lukim liklik boi, em givim 5 -pela bret, na tu-pela pis long Jisas . Em i no holim bek sampela bilong em yet. Nogat. Em i givim 100% olgeta long Jisas. Dispela ol tisa bilong Baibel i save kolim “in-tai-a konsikresin.” Mining kompli, olgeta. Olsem man i givim pul laip bilong em long God, --sakrifais antap long alta. Basket bilong boi nau empti. Dispela konsikresen, em yumi tu mas mekim. God I no inap mekim dispela. Yumi mas putim ofa antap long alta, na God bai salim paia i kam daun long dispela empti basket bilong yu, na pulimapim olgeta long taim yumi bilip. Alta i no bilong putim sin, no dotipela samting long en. Nogat. Em bilong Kristen laip bilong yu i dia tumas. Olsem Abraham i mekim long Aisak.

Rom 12: 1 Ol brata mi tingting long bikpela marimari bilong God na mi tokaut long yupela. Yupela mas givim bodi bilong yupela long God olsem ofa. Bodi i gat laip yet na yupela givim long God, na i bilong God wanpela tasol...

Bilong kisim namba tu blesing holines, yu mas mekim dispela konsikresin pastaim. Bilip bilong kisim holines i no inap wok, sapos yu no bin mekim dispela ofa pastaim. Olgeta samting i mas stap antap long alta, God I no inap salim paia long 99% ofa.

Boi i givim olgeta samting long God 100%, na nau basket bilong em empti ? Nogat. Em pasin bilong God long pulimapim em gen, na gen, na gen, na gen, long laip bilong yu. 5,000 man kaikai, na ol tok “em inap, bel bilong mi pulap.”

Malakai 3:10 ...inap opim ol windo bilong heven, na kapsaitim wanpela blesing i go ausait long yupela, inap long bai i no got spes inap bilong kisim dispela.

Sapta 25 - Barabas Kalabus

Dispela stori i stap long olgeta 4-pela Gutnius. Barabas i laik kapsaitim gavman bilong Rom yet, na em i bin kilim wanpela man pinis. Olsem ol bin pasim em wantaim sen, na i stap daunbilo rum long kalabus. Em mas wanpela ol-pela man i gat planti yia, bodi gras i save karamapim bodi bilong en olsem Iso. Tet bilong en bruk, bodi bilong en doti, tok bilong maus bilong en doti, em save hetim olgeta man. Em no save waswas, bodi bilong en sting olgeta. Em i stape wail-man tru. Em daunbilo tru long kalabus, na ol pipol i no save lukim em.

Dispela em poto stret long Kristen i gat as bilong sin i stap hait insait long bel bilong en. Olpela man bilong sin i save hait gut tumas. Dispela i save bagarapim Kristen laip. Yes, em pas tru, tasol pairap bilong em i save skrapim testimoni bilong Kristen.

Tasol nau ol Het Pris i fosim Pilat long larim em kamaut fri man. Na Pilat em pret, na i save mekim olsem. Sapos dispela Barabas i save kamaut long Kristen laip bilong yu em taim nogat tru. Nau man i go joinim pai wantaim lain bilong en, nau man i tok bilas long meri bilong en, nau ol kros long taim ileksin. Kros insait long sios tu. Wanem samting mekim ? Barabas ! Man i ken givim trening long ol kain wel abus, pisin, snek, kainkain pis, tasol em i no inap kontrolim dispela Barabas. Na Barabas i no fit long heven.

Rom 7: 2

Sapos wanpela meri i marit kain olsem Barabas, orait lo i pasim tupela wantaim. Tasol, sapos dispela Barabas i dai, orait dispela lo i bin pasim em wantaim man, em i no pasim em moa. Em fri long kirapim nupela laip wantaim narapela man.

Dispela lapun man i save makim as bilong sin. Na sapos dispela as bilong sin i dai, orait Kristen i fri long nupela laip wantaim Kraist.

Buk Tri - Namba Tu Wok Long Buk Aposel

Sapta 1 - Sameria

Long Aposel 8 ol lain Sameria i bin kisim namba tu wok. Tingim gut, ol lain Sameria i bin kisim namba wan wok pastaim.

Aposel 8:6 Planti manmeri moa ol i harim tok bilong Filip na ol i lukim ol mirakel em i wokim, na ol i putim ia gut long tok bilong em.

Aposel 8:7 ...Planti manmeri ol i gat spirit nogut i stap long ol, na ol dispela spirit i singaut nogut tru na i lusim ol. Na planti man bun bilong ol i dai, o lek bilong ol i nogut, ol i orait gen.

Appsel 8:8 Olsem na bikpela amamas i kamap long ol manmeri bilong dispela taun.

Aposel 8:12 ...Filip i telimautim gutnius bilong kingdom bilong God na bilong nem bilong Jisas Krai. Na long dispela taim ol man na meri wantaim i bilip na ol i kisim baptais.

Aposel 8:14 ...ol Sameria i kisim tok bilong God.

Ol dispela ves hia i soim tru antap ol dispela lain i bin kisim namba wan wok fogivnes. Tude tu, i gat sampela ol save krugutim dispela stori na traim long senisim nabaut long laik bilong ol yet. Tasol rait i klia tru, Sameria i gat namba wan wok, na bihain kisim namba tu wok. Na ol i no gat nit long go long Baibel Skul pastaim, o wetim sampela taim bilong kisim.

Taim ol Kristen sios long Jerusalem i harim stori long Sameria, orait ol salim 2-pela bilong go luk save.

Aposel 8:14 Ol aposel i stap long Jerusalem ol i harim tok long ol samaria i kisim tok bilong God. Olsem na ol i salim Pita wantaim Jon i go long ol.

V. 15. Tupela i go daun na i beten long God i helpim ol, na bai ol i kisim Holi Spirit.

V. 16. Long wanem Holi Spirit i no kam yet long ol. Ol i kisim baptais tasol long nem bilong Jisas..

Dispela stori i klia tru long namba wan wok, na namba tu wok. Dispela lain Kristen long Jerusalem, wan-tu tasol ol ting long ol Sameria i nitim namba tu wok. Sampela long sios tude, ol ting long “wet long pris long holines. Dispela sanktifaikesen bai paulim tingting bilong ol nupela Kristen. Ol no inap klia long dispela. Ol i no inap redi

long dispela. Ol mas gro long Kristen laip pastaim.” Na ol laik pasim maus bilong pasta na evanselis husat i save autim strongpela tok long holines.

Baibel i tok dispela em i laik bilong God:

1 Tesalonaika 4: 3dispela em i laik biong God, yes, long yupela i ken stap holi.....

Em laik bilong God long wanem taim? Dispela em i laik bilong God nau tasol. Bilong wanem man i laik wet moa long inapim laik bilong God? Nogat. Wet olsem wanem? Wet long gro? Wet long stadi i pinis? Wet long yia i pinis? Wet long sampela wok i pinins? Wet long moning taim? Wet long wanem samting? Yumi no ken wet long inapim laik bilong God. Dispela “wet” tingting i save kam long Seten stret. Sapos yu Kristen tru, orait gohet long kisim holines nau.

Aposel 8:17 ...ol i kisim Holi Spirit.

Planti kain pasin long Pentekos ol no save mekim long Sameria.

I no gat nois i kam long heaven.

I no gat krai bilong win

I no gat lait bilong paia

I no gat tok long kain kain tok ples

Na tu i no gat kain guria sek sek

Na i no gat kalap kalap nabaut

Ol dispela i no save soim tru antap man i bin kisim Holi Spirit. Tasol long Pentekos, na long Sameria tu, ol kisim kapsait bilong Holi Spirit.

Sapta 2 - Aposel Pol

Aposel Pol yet i bin kisim namba tu wok long laip bilong en. Pastaim gen, yumi mas klia tru long wanem taim, na wanem ples Pol i bin kisim namba wan wok. Em long rot i go long Damaskas? long haus bilong Judas? long Arebia? Faiv -pela ples long Baibel i stori long Pol i tanim bel:

Aposel 9

Aposel 22

Aposel 26

1 Korin 15

Galesia 1

Sampela ves i save soim Pol i bin tanim bel **long rot** i go long Damaskas. Long hia em bungim Jisas Yet. Yumi lukim sampela Baibel ves i tok wanem.

1 Koring 15:8 Na bihain tru long ol, em i kamap long ai bilong mi tu.

*Aposel 9:17 ...Ananias i tok, “**Brata Sol**,*

Aposel 9:27Sol i bin lukim Bikpela long rot

Aposel 26: 16 ..Mi kam long yu nau bilong dispela samting: Mi laik makim yu bilong holim wok bilong mi, na bilong autim tok long ol samting yu lukim pinis long mi, na long ol samting bihain bai mi soim yu.

1 Korin 15 I save givim pul list long ol husat i save lukim Jisas bihain long Em I kirap bek. Na i no gat wanpela sinman i bin lukim Jisas bihain long Em i kirap bek.

1 Korin 15:6 Na bihain planti brata wantaim ol i lukim em, namba bilong ol i winim 500.

Aposel 9:5 Bikpela, yu husat ?

Aposel 22:10 .Na mi tok, ‘Bikpela, bai mi mekim wanem nau?’

Hia yu save lukim bel bilong Sol i tanim pinis, na kolim Jisas “Bikpela.”

1 Korin 12: 3 ...Na man i no gat Holi Spirit, em i no inap i tok, “Jisas em i Bikpela.”

Ol sinman i no save mekim dispela kain tok. Dispela em tok bilong man i bin tanim pes wantaim bel bilong en long go long narapela kain wokabaut.

Long rot, dispela man em redi pinis long tanim bel. Pes bilong Stiven kotim bel bilong en. Em i bin kik bek long samting sap -em Holi Spirit I save kotim em long ol sin em i bin mekim.

Aposel 26:14 Yu wok long kikim samting i gat sap, na yu givim pen long yu yet.

Bungim ol dispela ves wantam na mipela i gat klia piksa long Pol em i kamap nupela gen long rot Damaskas, pastaim em i bin bungim Ananias long haus bilong Judas. Nau em man bilong daun pasin. Nau em man bilong prea, na tambuim kaikai. Nau em man bilong bihainim Jisas. Bikpela i tokim Ananias long go bungim Sol (Pol) long haus bilong Judas. Ananias em pret, tasol God I tok yu mas go bikos...

Aposel 9:15 Dispela man em i wokman bilong mi. Mi makim em pinis bilong karim nem bilong mi i go long ol arapela lain....

God I tokim Ananias olsem pastaim Pol i kam insait long haus.

Wok long kilim ol Kristen nau pinis, olsem Ananias i kolim em “brata.” Dispela bikpela senis i bin kamap long rot ausait long Damaskas, tasol bilong mekim dispela wok Bikpela i makim long em, em bai nitim namba tu wok bilong Holi Spirit.

Aposel 9:17 ...Brata Sol, Bikpela Jisas i kamap long yu long rot, em i salim mi na mi kam, bilong yu ken lukluk gen, na Holi Spirit i ken pulap long yu.

Dispela pulap bilong Holi Spirit Pol i no bin kisim long rot we em i save tanim bel, na kamap nupela gen. Dispela “pulap long Holi Spirit” em save kisim insait long Damaskas, insait long haus bilong Judas. Em klia olgeta, dispela em i namba tu wok Pol i save kisim.

Jon 14:17 ...Dispela em Spirit bilong tok tru. Ol manmeri bilong graun ol i no inap kisim em.

Ol Kristen tasol inap kisim pulap long Holi Spirit.

Na hia tu Pol i no harim nois bilong win, o lukim lait bilong paia, o mekim tok long narapela tok ples. I no gat nit long dispela. Tasol em i save kisim bel klin, em namba wan samting.

Galesia 1:17 Mi go long Arebia.

Sampela i tok “Pol i kisim pulap bilong Holi Spirit long Arebia,” tasol i no gat saport bilong soim dispela tru antap.

Sapta 3 - Ko-nil-i-as

Hia tu yumi mas glasim gut bilong soim Konilias i bin kamap nupela gen pastaim em i kisim pulap long Holi Spirit. Stori i stap long Aposel 10. Dispela stori i save soim tu, namba tu wok i no bilong ol lain Juda tasol. Dispela namba tu wok i bilong ol lain Jentail wantaim.

Kornilias em wanpela het ami bilong Rom. Ol bin makim em bilong mekim wok long wanpela taun nambis, Sisaria. Dispela em as ples stret bilong ol ami bilong Rom long bosim ol pipol bilong lain Juda. Sapos bikpela trabel i kamap long Jerusalem, o wanem wanem ples, orait, ol bai salim soldia bilong Sisaria bilong go stretim. Sisaria tu, em ples bilong rot bung bilong kisim kago kam i go long planti ples. Na em rot bung tu bilong ol sip i save kam long narapela narapela kantri bilong kisim ol kago kam i go. Olsem Sisaria em ples bisi tru, ol manmeri bilong narapela narapela tok ples ol kam i go long en.

Nau, i gat planti toktok long Konilias em i Kristen tru o nogat. Bilong painimaut yumi mas glasim ol Baibel ves wanwan. Mipela i no inap soim tru antap, tasol ating Konilias i mas tanim bel, na kamap Kristen long taim Filip em kam autim gutnius long Sisaria.

> *Aposel 8:40 Filip... i go kamap long Sisaria.*

> *Aposel 10:1, 2 .Kornilias Em i man bilong lotu.*

> *Aposel 10:2 ..Em wantaim olgeta wanhaus bilong en ol i save pret long God*

> *Aposel 10:2Emi save givim planti mani samting bilong helpim ol Juda*

> *Aposel 10:22 Em i stretpela man na i save pret long God*

> *Aposel 10:22 Em i gutpela man*

> *Aposel 10:2 Oltaim em i save beten long God.*

> *Aposel 10:4 ..God i harim pinis beten bilong yu*

John 9:31 Yumi save, God i no save harim tok bilong ol sinman.

Sam 66:18 Sapos mi bihainim sin nogut long bel bilong mi, Bikpela bai i no harim mi.

Long dispela stori yumi bai lukim, God I harim prea bilong Konilias, na Em I givim wankain samting em i askim long kisim. Wanem samting Konilias i bin askim long kisim? Sapos yumi lukim wanem samting Kornilias i bin kisim, orait yumi ken save wanem samting Kornilias i bin askim.

Aposel 10:44 Holi Spirit i kam daun long olgeta...

1 Jon 3:22 Na sapos yumi beten long wanpela samting, orait em i save givim long yumi. Long wanem yumi save bihainim lo bilong em,....

Luk 11: 9 ...Yupela mas beten long God, na bai em i givim samting long yupela

V. 10 Olgeta man i beten long God, ol i save kisim samting...

V. 11 Sapos pikinini bilong wanpela man namel long yupela em i askim papa bilong en long givim em wanpela pis, ating bai papa i givim wanpela snek nougat long em ? Nougat.

V.12 sapos kiau, ating bai papa i givim em wanpela binatang nogut ? Em tu Nogat.

V. 13 Yumi ken save tru, Papa i stap long heaven em bai i givim Holi Spirit long ol man i beten long em.

> Aposel 10:35 Long olgeta lain em i save laikim ol man i pret long em na i mekim stretpela pasin.

Em klia, Kornilias em strongpela Kristen tru. God I save harim rikwes long beten bilong en, na givim em stret samting bel i krai long kisim. Dispela i wankain tu long sampela Kristen i no save stap long holines sios. Ting ting bilong ol i no inap klia gut long namba tu wok, tasol God I save ritim rikwes long bel bilong ol, na givim Holi Spirit long ol. Olsem, yumi no ken jasim ol manmeri i stap long wanem lotu nabaut nabaut.

Kornilias em i bin tanim bel na kamap nupela gen, na bihain long dispela Jisas i kapsaitim Holi Spirit na pulimapim ol wanhaus bilong Kornilias.

Pita i kam long haus bilong Kornilias, na ol wet long bihainim tok bilong en.

> Aposel 10:33 ...Nau mipela olgeta i kam i stap hia long ai bilong God bilong harim olgeta tok Bikpela i bin givim long yu bilong tokim mipela

Dispela kain tok i no save stap long maus bilong ol sinman. Dispela i save soim ol redi tru long kisim namba tu wok -pulap long Holi Spirit.

Aposel 10:44 Holi Spirit i kam daun long olgeta man i harim tok bilong God.

Holi Spirit i no save kam daun long ol sinman. Em Kapsait, o pundaun antap long Kristen tasol.

Jon 14:17 ...Spirit bilong tok tru. Ol manmeri bilong graun ol i no inap kisim em...

Nau yumi bin lukim klia, Kornilias i bin kisim namba wan wok, na nau, namba tu wok. Pita i laik karim dispela ripot long ol Sios konfrens long Jerusalem. Em i tok aut klia long ol lain Jentail, i bin kisim baptais long Holi Spirit.

*Aposel 15: 8, 9. God i save long bel bilong olgeta manmeri, em i soim yumi, bel bilong em i orait long ol. **Em i givim Holi Spirit long ol, olsem em i givim long yumi.** V.9. Em i no mekim wanpela pasin long yumi na narapela pasin long ol. Nogat. **Ol i bilip long em, na long bilip tasol em i mekim bel bilong ol i klin.***

Em hia 4 pela poin yu ken autim tok long ol kongrigesin.

> God, Em I save tru tumas, wanem samting em i stap insait long bel bilong ol man.

- > Konilius i bin kisim kapsait bilong Holi Spirit long BILIP tasol.
- > Kapsait bilong Holi Spirit i save klinim.
- > Holi Spirit Em I save witnes long wok Em I bin mekim pinis.

Na Pita i soim klia wanem samting ol bin kisim long De Bilong Pentikos. Em bel klin long kapsait bilong Holi Spirit. Na em i tok moa, ol lain Kornilias i kisim stret wankain olsem ol bin kisim long De Bilong Pentikos.

Aposel 11:15 Holi Spirit i kam daun long ol, wankain olsem em i kam long yumi namba wantain.

Long hia ol no harim nois olsem win, o lukim lait olsem paia. Tasol ol kisim bel klin, na mekim tok long kainkain **tok ples**. Bilong wanem ol lain Kornilias i mekim toktok long kain kain tok ples? Long sem risin ol bin mekim long De Bilong Pentikos. Em ples bung bilong ol kain **tok ples** bilong plant kantri. Sapos ol mekim tok nating nating, orait i no gat wanpela ol bai kisim save long tok bilong ol. Tasol long De Bilong Pentikos ol lain kantri i bung ol harim klia long **tok ples** bilong ol yet. Na Pita i tok Pentekos na haus Konilias i wankain olsem.

Aposel 10:46 ...Ol Juda i harim ol i mekim tok long narapela narapela tok ples na litimapim nem bilong God.

Olsem wanem ol i save ol i bin litimapim nem bilong God? Bikos tok i save kam long kain kain TOK PLES.

Sapos long lotu bilong yu ol i mekim wanpela tok yu no save long en, na ol i no tanim, orait yu ken save dispela lotu i no save bihainim buk Baibel.

Long Aposel 15: 8 na 9 taim Pita i givim ripot long confrens, em tok ol kisim bel klin, tasol em no ripot long ol bin mekim tok long kain kain tok ples. Em bikos bel klin i namba wan samting man mas kisim, na dispela i winim tru ol presen bilong Holi Spirit.

Las poin.

Sampela Bible tisa ol tok “Ol disaipol i kamap Kristen tru tru long De bilong Pentekos.” Dispela i wanpela tising i giaman tru. Na i paulim planti Baibel ves bilong Buk Baibel.

Sapta 4 - Apolos

Aposel 18: 23 - 28 Apolos em husat?

- > *Aposel 18:24 wanpela Ju...*
- > *Aposel 18:24 mama i karim long Aleksandria*
- > *Aposel 18:24 i kam long Efesas*
- > *Aposel 18:24 saveman bilong toktok*
- > *Aposel 18:24 strong long ol rait bilong God*
- > *Aposel 18:25 i kisim skul pinins long rot bilong Bikpela.*
- > *Aposel 18:25 i save long baptais bilong Jon tasol*
- > *Aposel 18:26 toktok wantaim strong*

Nau mipela laik lukim dispela man tu i bin kisim namba wan wok fogivnes, na bihain namba tu wok, bel klin:

Em i save long baptais bilong Jon, orait, em bin tanim bel tru tru. Jon Baptais em i no save baptasim ol sinman, o man i no Kristen tru.

Matyu 3:8 Sapos yupela i tanim bel, orait pasin bilong yupela i mas makim yupela i tanim bel pinis..

Apolos em i bin go daun long Aleksandria, wanpela siti bilong Isip. Long hia em wanpela senta bilong ol Baibel tisa i laik stadi long ol rait bilong Ol Pela Testamen. Na ol bin tanim O.T. long tok Grik. Na i luk olsem Apolos em i bin stadi long dispela ples, na em i gat save tru long ol stori bilong O.T.

Tasol, olsem Tesalonaika, olsem Samaria, olsem ol disaipel, olsem planti Kristen tude, Apolos sot yet, na i gat nit long kisim pulap long Holi Spirit. Apolos i bin lusim Aleksandria, na kamap long Efesas. Long hia wanpela Juda i stap, nem bilong em Akwil-a, na meri bilong en Pri-sil-a, na tupela i gat save long samapim haus sel. Apolos em save pinis long baptais bilong Jon, na Akwila na Prisila i gat save long baptais long Holi Spirit. Olsem tupela i soim Apolos i gat narapela kain baptais bilong kisim.

Aposel 18:26 ...Prisila wantaim Akwila tupela i harim, na tupela i kisim em na i soim Rot bilong God stret moa long em.

Tru, Apolos i bin skul planti long Aleksandria, tasol em i daunim em yet na harim tising bilong Akwila na Prisila long namba tu wok.

Sapta 5 - Sios Long Efesas

12-pela Kristen long Efesas i bin kisim namba tu wok holines. Dispela stori i stap long Aposel 18 na 19. Tupela Pri-sil-a na A-kwil-a, wantaim Pol, i lusim Korin, na kamap long Efesas. Na Pol i save lusim tupela hia, na kisim sip i go bek long Jerusalem. Tasol hia, long Efesas, 2-pela i bin wok bilong statim wanpela holines sios.

Tupela i save autim tok long Efesas na soim ol no ken sindaun long namba wan wok. Ol i mas goan moa long Kristen laip na kisim pulap long Holi Spirit.
Aposel 18:26rot bilong God stret moa.

Bihain Pol i pinisim wok bilong em long Jerusalem, na nau kambek gen long Efesas.

Aposel 19:1, 2. Pol i wokabaut long hap i gat maunten na em i go kamap long Efesas. Long Efesas em i painim sampela Kristen. Na em i askim ol, "Bipo yupela i bilip, na ating yupela i kisim Holi Spirit?" Na ol i tok, "Nogat. Mipela i no harim tok long wanpela Holi Spirit i stap."

I luk olsem i gat 2-pela kain Kristen long Efesas. Sampela i harim tok bilong Prisila na Akwila, na sampela nogat.

Holi Spirit yet i save kolim ol **"Kristen."** Tasol ol i no gat save long we bilong holines. Nau, namba wan taim Pol i lukim pes bilong ol dispela 12-pela, na em i askim ol long ol bin kisim Holi Spirit, o nogat. Sampela Kristen i gat kros long dispela bikos ol ting holines em samting bilong kisim bihain, bihain tru long taim bilong dai. Apostle Pol em kirapim dispela namba wan kwesten bilong em. Bilong wanem sampela pasta i ting long wetim long-pela taim bihain, bihain long autim tok long namba tu wok?

Bilong wanem Pol i askim ol dispela kwesten? Em bikos sampela Kristen i gat pulap long Holi Spirit, na sampela no gat. Ol Kristen i no save kisim pulap long Holi Spirit long namba wan wok. Aposel Pol yet em i no bilip olgeta Kristen i gat pulap long Holi Spirit, olsem em i askim dispela kwesten. 1`2-pela i wankain olsem Apolos, ol gat save long baptais bilong Jon tasol.

Aposel 19:3, 4 ..Na Pol i tokim ol, "Olsem na yupela i kisim wanem baptais?" Na ol i tok, "Mipela i kisim baptais bilong Jon." Na Pol i tok, "Bipo Jon i baptaisim ol manmeri, na em i tok, 'Yupela i mas tanim bel na kisim baptais...."

Matyu 3:8 Sapos yupela i tanim bel, orait pasin bilong yupela i mas makim yupela i tanim bel pinis..

Tru tumas, yumi ken save ol dispela brata, ol Kristen pinis pastaim Pol em i kam bungim ol.

Ol disaipol bilong Jon, wantaim ol disaipol bilong Jisas i no bin kisim namba tu wok, i kam inap long De Bilong Pentikos. Na hia, long Efesas, yumi lukim ol dispela disaipol i no bin kisim namba tu wok pastaim Aposel Pol i lusim Jerusalem na kam bek long Efesas.

Aposel 19:6 Na Pol i putin han antap long ol, na Holi Spirit i kam long ol, na ol i mekim tok long kain kain tok ples

Yu no nitim wanpela slipim han antap long yu bilong kisim Holi Spirit. I no gat pawa long han bilong wanpela man long givim Holi Spirit long arapela. Baibel i klia tru, man husat i save bilip, em i kisim Holi Spirit. Lukim, Holi Spirit I stap antap, kapsait, pundaun antap, na pulimapim ! Hia tu, wankain olsem Sisaria, ol toktok wantaim tok ples. Na hia tu, wankaim olsem Sisaria, i gat nit long mekim, bikos em nambis taun i pulap long ol lain pipol i save kam, i go. Em rot bung bilong ol kain kago, na tok ples bilong narapela narapela kantri. Na wanem lain kantri i stap ol save klia tok bilong ol. Nogut yu ting ol mekim long nois i no gat man i save long en. Long Pentikos, long Sisaria, long Efesas, ol mekim tok klia, inap ol lain kantri i stap, ol save long en.

Ol ples long Baibel mipela save lukim dispela tupela samting:

1. Namba wan wok, fogivnes.
2. Sanktifaikesin
 - a. Makim samting holi bilong God wanpela
 - b. Bel Klin

Buk Foa - Sampela Holines Man Long Olpela Testamen

Sampela tok save pastaim:

Long N.T. yumi lukim:

1 Pita 1: 16 ..Baibel i tok olsem: “Mi stap holi. Olsem na yupela tu i mas i stap holi.”

Pita i bin kisim dispela tok long O.T.

Livai 11: 44yupela mas i stap holi, long wanem Mi stap holi.

Kontrak i senis, tasol tingting, na pasin bilong God i no bin senis O.T. tu N.T. Sampela i rit long:

Hibru 13: 8 Pasin bilong Jisas Krai em i wankain tasol, long asde, na long tude tu, na long oltaim oltaim.

Jon 1: 17 ...God i givim lo long yumi long han bilong Moses, tasol marimari wantaim pasin i tru em i bin kamap long Jisas Krai.

Planti i ting ”Lo i pinis long taim bilong Krai i kam. Na marimari bilong God i stat long taim Jisas i kam.” Tasol dispela tingting i paul tru.

10-pela bilong Moses i save stap inap tude:

Matyu 5:17 Yupela i no ken ting mi kam bilong rausim lo...

Marimari bilong God long taim bilong O.T.

Jona 4: 2 Yu God bilong sori na marimari. Yu no save belhat kwik. Nogat. Yu save sori moa yet long mipela. Yu save senisim tingting bilong yu na yu no bekim rong bilong ol man.

*Genesis 6:8 Tasol bikpela i amamas long Noa. [KJV: Noa found grace (**marimari**) in the eyes of the LORD.]*

God i save kisim bek man i wankain O.T. na N.T.- - -

Hibru 11 i givim stori long planti bilipman i stap long O.T. time. God i no save kisim bek long taim ol kapsaitim blut bilong bulmakau. Baibel i klia, marimari bilong God I save kisim bek long sem taim ol bilip.

Hibru 10:4 Blut bilong ol bulmakau man na bilong meme em i no inap tru long tekewe sin.

God I kisim bek Abraham long bilip tasol, i wankain olsem God I save kisim bek man tude. Na tu, God I sori, na kisim bek ol lain Niniva, ol i no gat alta, tempel, o ofa long blut. King Devit tu i painim ples bilong marimari bilong God. (Sam 51).

Jisas i krosim Nikodimas bikos em i no save long “kamap nupela gen” i stap long O.T.

Jon 3:10 Yu tisa bilong Isrel na yu no klia long dispela samting?

Baibel i klia: O.T. bilipman i save long kamap nupela gen, tasol i no gat wanpela i bin kisim “baptais long Holi Spirit.” Jisas i tok klia, em mas go bek long heven bilong kapsaitim Holi Spirit.

Jon 7:39 Em i tok long Holi Spirit ol man i bilip long em bambi ol i kisim. Long dispela taim Jisas i no i go bek long heven yet, olsem na Holi Spirit i no kam yet.

Yes, tru tumas, yumi lukim wok bilong Holi Spirit long O.T., tasol yumi no save lukim baptais bilong Holi Spirit long O.T. OLSEM, i no gat man i save kisim namba tu wok long O.T., tasol i gat sampela man wanwan, laip bilong ol i piksa tasol long kisim namba tu wok.

Tupela poin long ves 39:

1. Bilip man tasol ken kisim Holi Spirit. Olsem yumi tok “Namba tu Wok.”
2. I no gat rot sinman ken kisim Holi Spirit.

Profet Joel i tok klia moa long De bilong Pentekos:

*Joel 2: 28, 29 Na em bai kamap olsem bihain, long Mi bai kapsaitim Spirit bilong Mi **antap** long olgeta man.....V. 29. Na tu **antap** long ol wokboi na **antap** long ol wok meri long ol dispela de bai Mi kapsaitim, Spirit bilong Mi.*

De Bilong Pentikos em namba wan taim man i bin kisim “kapsait bilong Holi Spirit.”

Long Yutub yu ken harim sampela prising bilong olupela Nasarin Sios bipo, long Aposel 2:16 “**Dispela em Dispela**” (De bilong Pentekos em inapim profesi bilong Joel)

Painim olsem: Holiness Campmeeting 1959 (L.B. Hicks Preaching “This is That”)

Pinisim dispela:

Levai 11:44 na 1 Pita 1:16 Yupela mas stap holi.

Kwesten: Olsem wanem man long O.T. ken stap holi, sapos Holi Spirit i no kapsait yet?

Ansa:

1 Jon 1: 7 Na sapos yumi wokabaut long lait, olsem em i stap long lait, orait yumi stap wanabel wantaim olgeta brata. Na blut bilong Jisas, Pikinini Bilong God, em i save tekewe olgeta sin bilong yumi na yumi kamap klin.

Sapta 1 - Jop

Jop em i wanpela holi man i stap long Olpela Testamen.

Jop 1: 1.dispela man em i inap tru na stretpela, na wanpela husat i pret long God, na ranawe long pasin nogut.

Jop 1: 8. Na BIKPELA i tokim Seten, Ating yu bin tingim na skelim wokboi bilong Mi Jop, long i no got wanpela i olsem em long dispela graun, a, wanpela man i inap tru na wanpela stretpela man, wanpela husat i pret long God, na ranawe long pasin nogut?
[inap tru: KJV perfect]

Pafeksin long Baibel em mining bel bilong man em klin 100%. Dispela em pafeksin bilong bel - - - i no bilong tingting, toktok, o wokabaut. Long ol dispela yumi save makim mistek.

Sapos dispela em testimoni bilong Jop yet, orait yumi ken ting em paul. Tasol i gat tupela witness long Jop em pafek: Holi Spirit long V. 1, na BIKPELA Yet long V.8.

God wantaim Seten, tupela i got tok pait long Jop inap winim taim bilong traim o nogat. Na God I orait long Seten i ken bagarapim olgeta samting bilong Job. Na bihain gen God I orait long Seten i ken bagarapim bodi bilong Jop yet. Tasol long ol dispela Jop i sanap strong yet, na amamasim Bikpela.

Jop 1:21 Na tok, Skin nating mi kam ausait long bel biong mama bilong mi, na skin nating bai mi go bek long hap. BIKPELA i givim, na BIKPELA i bin kisim i go. Blessing i stap long nem bilong BIKPELA.

Holi Spirit i tok:

Jop 1: 22Jop i no mekim sin.....

Jop 2: 10Jop i no mekim sin....

Sapos yu man bilong mekim sin, orait moabeta yu no sanap na na givim testifai long dispela. Sapos man i ken testifai long God I bin kisim em bek long laip bilong sin, na dispela i save litimapim nem bilong God. Ol Kristen tude i gutpela sapos ol gat dispela sem kain testimoni bipo God I givim long Jop.

1 Jon 3: 7, 8, 9.Nogut wanpela man i giamanim yupela.

V.8. Bipo tru Seten i mekim sin, olsem na man i save mekim sin, em i man bilong Seten.

V.9. Sapos wanpela man i kamap pikinini bilong God, orait em i no save bihainim pasin bilong sin.

Namba wan wok i save pinisim **pasin bilong mekim sin**. Namba tu wok em save pinisim **as bilong sin**. Sapos yu save mekim sin yet, orait yu no redi long beten long kisim namba tu wok. Yu mas tanim bel pastaim, na bilipim tok bilong Baibel. Planti

tude i tok “Mi Kristen,” tasol laip bilong ol i no save kamap inap long mak bilong Jop bipo long Olpela Testamen.

Sapta 2 - Inok

Inok em i narapela holines man long Olpela Testamen.

Jut 14 Inok em i namba seven man i kamap bihain long Adam, na em i autim tok profet long ol dispela man...

Hibru 11:5 Inok i bilip long God, na God i kisim em i go long heven, Em i no i dai. Ol man ol i wok long painim em, tasol ol i no lukim em. God i kisim em pinis. Na Baibel i tok, bipo God i no kisim Inok yet, long dispela taim Inok i bihainim laik bilong God..

Jenesis 5: 24 Na Inok i wokaaut wantaim God, Na em i no stap, long wanem, God i kisim em.

Wanem kain man inap wokabaut hia long graun, na lusim i go stret insait long get bilong heven? Yes, God i bin senisim bodi biong en, bilong em i no ken i dai. Dispela em piksa tru long rapsa. Wanem brata i stap hia long graun na i go stret insait long get bilong heven i mas i gat senis long bodi, tasol i no gat senis long tewel.

1 Koring 15:50Ol brata, mi tok stret long yupela: Man bilong dispela graun em i no inap kisim kingdom bilong God. Na samting bilong bagarap emi no inap kisim samting i no save bagarap. [KJV flesh and blood]

God I no bin senisim bel bilong en namel long graun na skai. We bel bilong i stap hia long graun, wankain olsem tasol we em i go insait long heven. Olsem wanem bel bilong man i stap pinis long heven, em wankain olsem i bin stap hia long graun. I no gat man i ken tanim bel antap long skai. Sem we bel bilong Kristen i stap hia long graun, em sem we bel bilong en i stap long heaven. I no gat we yu ken go long heaven wantaim sin i stap insait long bel.

Sam 24: 3, 4 Husat bai go antap long liklik maunten bilong BIKPELA. O husat bai i sanap long ples holi bilong Em? V.4. Em man i gat klin pela han na bel i klin olgeta.... Yu mas pasim ia biong yu long

Pasim ia long ol tok bilong man, na bilipim ol rait i stap long dispela buk Baibel. Bikpela husat I krietim yu, Em Yet I raitim dispela tok.

Olsem wanem dispela Inok ken go stret insait long Siti? Bikos bel bilong em i klin olgeta long taim em i wokabaut wantaim Bikpela. Olgeta Kristen tude i mas stap redi wankaim olsem.

Hibru 12: 14 pasin holi, dispela samting sapos man i no gat em bai i no inap lukim Bikpela. [Pasin-Holi: KJV Holiness, (o sanktifaikesin) without which no man shall see the Lord.]

Mining: Holi insait long bel.

Inok i no save lukim “Klin paia,” o “pagatri.” Nogat. Dispela tok i no stap long wanpela Baibel ves, Pisin, o Englis. Inok i no bin kisim baptais, komunio, o Ekaristia. Em i gat holines na em i fit man bilong go insait long get long heven. Inok tu, em wankain piksa long ol husat i redi long rapsa.

Revelasen 20:6.Ol man i kirap bek long dispela namba wan taim, ol i ken amamas na i stap holi.

Ol lotu lain i save pait agens holines i no inap go insait long Siti. Na man i no inap kisim namba tu wok namel long graun na skai. Em i mas kamap holi hia, nau, long bilip, long dispela laip.

Sapta 3 - Aisea

Aisea tu, em i holines man long O.T. Yu ken painim dispela stori long buk Aisea, sapta 6. Long hia dispela profet Aisea i gat wanpela visin long Bikpela insait long Tempel.

Aisea 6: 3.BIKPELA bilong bikpela ami i stap holi, holi, holi.

Revelesen 4: 8 Holi, holi, holi, God Bilpela i gat olgeta strong.

Long buk Aisea sapta 1 - 5 Aisea em i bin autim tok profet long ol king bilong Juda. Em i save autim strongpela tok agens long ol kain sin ol i save mekim. Tasol hia long sapta 6, wanpela nupela samting i kamap. Em i no bin save bipo, em i no lukim bipo, em i no bin pilim bipo. Nau em i lukim God I holi, Em I holi, na Em I holi olgeta. God Yet i save opim tingting bilong Aisea na soim Holines bilong Em Yet. Jisas I tokim Pita

Matyu 16:17 I no gat wanpela man bilong graun i bin soim dispela tok long yu. Nogat Papa bilong mi i stap long heaven em i soim dispela long yu.

Na em i wankain hia olsem Aisea. Em i lukluk klia long holines bilong Bikpela i nnarapela samting tru. Nau, em pilim as bilong sin long bel bilong en yet. Em yet i no klin olgeta. Em yet i no fit man bilong go insait long ples holi, bilong Bikpela.

Aisea 6: 5. Mi mas lukaut ! Long wanem ? mi bagarap pinis. Long wanem ? mi stap man bilong maus i no klinLong wanem ? ol ai bilong mi i bin lukim King, em BIKPELA bilong bikpela ami.

Ating sampela i no pilim nit long holines bikos ol no save klia long holines bilong God. Na dispela God holi I givim dispela wanpela Pikinini holi, bilong mekim ol Kristen ken kamap holi.

Aisea 6: 6, 7 ...serap [Ensel]....i gat wanpela ston i paiaem i putim dispela long maus bilong mi na tok, Harim, dispela i bin kam antap long maus bilong yu na God i tekewe sin nogut bilong yu na sin bilong yu i no stap moa. [KJV...and thy sin PURGED. Mining i gat kain sop i save rausim kain kola long clos.]

Long Inglis dispela ves i gat tok i strong antap tumas. I no gat tok long Inglis bilong mekimi dispela ves strong moa. Dispela i no gat tok long fogivnes, o larim sin bilong man. Nogat. Dispela em save go dip tru, daun insait long bel bilong man, klin 100%.

God Em agens sin. Em I no orait long sin i stap yet insait long bel bilong man. Sin em birua bilong God. Na God I no inap givim liklik spes long sin.

Sapos yumi no pris long dispela holines bilong God, orait i no gat we ol pipol ken save long nit long bel bilong ol. Ol mas pilim tru dispela as bilong sin em i no save fit long heven. Klin bilong Aisea em sem klin inap long yumi tude.

Matyu 3: 11 Em bai givim baptais long yupela wantaim Holi Spirit, na wantaim paia.

Dispela ves hia ol man mas givim ansa long en.

Hebrew 12¹⁴ KJV....and Holiness, without which no man shall see the LORD.

Sapta 4 - Ebrahim

Baibel i pulap long stori bilong Ebrahim, tasol yumi ken lukim 4-pela ples: Aposel 7: 1 -3, Jenesis 12, Hibu 11: 8 - 11. Na wanpela moa: Rom 4. Ol lain bilong Noa i bruk long tri-pela lain, na Ebrahim em i bin kam long lain bilong Siem. Olgeta dispela 3-pela lain i lusim God, na kamap haiden stret, na bihainim ol kainkain god gaiman. Sampela bilong ol haiden lain bilong Siem i go sindaun long taun Ur, bilong Kaldia. Long hia God I singautim Ebrahim long brukaut long lain bilong em yet, na go long narapela ples Em laik soim.

Jenesis 12:1 Nau bikpela i bin tokim Ebram, kisim yu yet i go ausait long kantri bilong yu, na lusim ol kandre bilong yu, na lusim haus lain bilong papa bilong yu, i go long wanpela hap graun, dispela Mi bai soim yu.

Orait, Ebrahim i givim beksait long ol samting bilong tumbuna na em, na lusim taun Ur i go. Tasol em i gat 3-pela trabel:

1. Em kisim papa Tira i go wantaim.
2. Em kisim Lot, pikinini bilong brata bilong en wantaim.
3. Em i go inap hap we tasol, na sindaun long Haran.

Olsem, em i bihainim Bikpela, tasol em i no bihainim 100%, na bihain i gat trabel long dispela. Long Haran papa bilong Ebrahim em i dai. Ol planim pinis, na Ebrahim, Sara, na Lot i go kamap long dispela ples God I laik soim long en. Em ples Kenan, na em ples bilong ol haiden tu i kam long lain Ham. Long hia wanem wanem ples Ebrahim i go sindaun long en, em i save sanapim alta pastaim na lotu long Bikpela. Dispela em namba wan samting long laip bilong en. Na yumi kalapim sampela stori bilong en na go long sapta 17.

Jenesis 17:1 Na taim Ebram i gat 99 yia, BIKPELA i kamap ples klia long Ebram, na toktok long em, Mi God i Gat Olgeta Strong. Wokabaut long pes bilong Mi, na yu stap inap tru.

Jenesis 17:1 .[KJV...walk before me, and be thou perfect]

Jisas I save givim dispela sem tok long yumi tude tu, taim Em I stap antap long maunten.

Matyu 5:48 Olsem na yupela i mas stap inap tru, yes, olsem Papa bilong yupela husat i stap long heven em inap tru.

O.K. i gat kainkain “inap tru,” o pafeksin.

I gat wankain bilong God Yet, i gat narapela kain bilong ol ensel, i gat narapela kain bilong banana, na paw-paw, na i gat narapela kain “inap tru,” bilong man yet.

Dispela pafeksin bilong man i stap long bel tasol. Man i no gat pafeksin long kru o aksin bilong en.

Long sapta 17 God Yet Em I mekim kontrak wantaim Ebrahim. Yumi ken lukim ol wanwan poin bilong dispela

1. Long kontrak, Ebrahim em mas wokabout long we bilong holiness (pafeksin).
2. Ol lain bilong em bai kamap olsem wesan long nambis, na wankaim ol sta long heven.
3. God I senism nem bilong em Ebram long Ebrahim.
4. God I senisim nem bilong Sarai long Sara.
5. Lain pikinini bilong em bai kamap lain bilong king.
6. God bai givim graun Kenan long Ebrahim
7. Mak bilong dispela kontrak, Ebrahim mas katim skin long ol lain bilong en.
8. Dispela kontrak i no inap bruk, em bilong oltaim oltam, SAPOS Ebrahim inapim ol hap bilong en

Sampela i save tok long dispela kontrak, “Em kontrak bilong God tasol, na Ebrahim i stap nating, na i no gat hap o sait bilong en long inapim.” Tasol ol paul tru long dispela. Sapos tupela i no sainim kontrak, em kontrak nating. God mas inapim sait bilong Em, na Ebrahim i mas inapim sait bilong en. Sapos nogat, orait kontrak em nating. Ol i laik ting “dispela em piksa long God I save kisim bek man long tingting bilong Em Yet, maski long aksin, o laik bilong man.”

Nau mipela ken pasim tok long Ebrahim olsem wanem? Long taim Ebrahim i lusim taun Ur, na brukaut long ol dispela haiden, em i piksa tru long namba wan wok, kamap nupela long Spirit.

2 Korin 6:17 Yupela i mas lusim ol, na i go i stap long narapela hap.

Nogut ol lain papa i holim yu bak long bihainim dispela komanman bilong God. “Brukaut long Ur, Kaldi,” em makim namba wan wok. Nekis God I laik yumi ken mars stret long ples Kenan, ples God I promis long en. Ol taim Kenan i makim sanktifaikesin, o Holines.

Na nau long sapta 17 dispela kontrak bilong Ebrahim i mas katim skin, dispela tu em piksa tru long namba tu wok holines. Nau God I tok Abraham mas wokabout long we bilong holines. (pafeksen). Genesis 17:1.

Sapta 5 - Aisak

Taim Ebrahim i laik mekim ofa long Aisak, dispela i makim konsikresin bilong Ebrahim, na Aisak em makim pasin bilong Kraist Yet. Stori i kamap long Jenesis 22. Yu mas tingim klia gen,

1. Konsikresin Rom 12:1 givim bodi olsem ofa. Aksin man yet mas mekim.
2. Sanktifaikesin Jon 14 - 17 Jisas i kapsaitim Holi Spirit. God tasol ken mekim.

Long buk Baibel, Holi Spirit I soim rong bilong Ebrahim, King Devit, Jekop, Pita, Jems na Jon, tasol Holi Spirit I no soim wanpela rong long laip bilong Aisak, olsem em i gutpela piksa long Jisas yet.

Bikpela i tokim Ebrahim:

Jenesis 22:2 Yu gat wanpela pikinini tasol Aisak, na yu laikim em tumas. Yu mas kisim dispela pikinini na yu go long hap bilong Moria, na bai mi soim yu wanpela mountain. Na long dispela maunten yu mas givim Aisak long mi olsem ofa bilong paia i kukim olgeta.

Yes, Ebrahim i gat narapela pikinini Ismal, tasol em i no pikinini bilong promis.

Long moning taim Ebrahim mekim olsem God I tok. Em no wetim apinun, o nekis de. Ebrahim i bihainim tok bilong God 100%. Em putin boi Aisak olgeta antap long alta long God. Ebrahim em i gat strong pela bilip long kontrak bilong God, long ol lain king yet bai kamap long lain bilong Aisak. Mekim olsem, God bai sanktifaim yu tu.

Ebrahim i tokim ol wokman:

Jenesis 22: 5Yupela stap hia wantaim donki. Na mi na manki bai go long hap na lotu, na kam bek gen long yupela.

Hibru 11:19 Em i tingting olsem: "Sapos em i dai pinis, maski, God inap long kirapim em bek."

Rom 4: 20 Ebrahim i no tubel na i lusim bilip, Nogat.

Olsem yumi lukim Ebrahim em i bilipim kontrak bilong God na bihainim tok bilong Em 100%. Pul. Olgeta. Em i putim Aisak antap long alta. Yumi gat dispela sem wok long kon-si-kre-sin, wantaim strong pela bilip long God. Sinman i no gat ofa bilong givim, tasol ol Kristen i gat ofa bilong givim long God.

Rom 12:1 Yupela mas givim bodi bilong yupela long God olsem ofa. Bodi i gat laip yet na yupela gvim long ?God....

Wok bilong yumi, em bilong putim 100% antap long alta. Na em wok bilong God long salim Holi Spirit wantaim paia bilong klinim olupela bel bilong sin, i pinis olgeta. God I laik yumi mekim pul 100% ofa. Na ating Em Yet bai klinim sin hap hap tasol.? Nogat tru. Yumi mekim 100%, na God tu bai pinisim sin 100%. Taim bel i kamap klin, orait

em i kamap klin olgeta. Em i no olsem 50% no 99.9 % Nogat. Blut bilong Kraist i gat pawa, i gat pul ansa long dispela trabel bilong sin.

Nau, olsem wanem long Aisak? Em i no liklik boi nau. Em nau i gat strong inap winim lapun papa bilong en. Tasol nogat. Em i ananit tru long olgeta laik bilong papa bilong en. Em yet i putim paia wut antap long sol bilong en na karim. Em i wankain tru olsem Krai, Em I ananit tru long olgeta laik bilong Papa bilong Em. Aisak mas givim tupela han, lek long papa ken pasim, na putim em antap long alta ston. Ebrahim i no fosim Aisak. Aisak yet i putim laip bilong en i go daun. Dispela em konsikresen bilong Aisak, wankain olsem Krai I bin mekim long Getsemani. Aisak i no gat tok gen long papa, i no kik bak, i no pait bak. Em i yesa, yesa, long olgeta laik bilong papa. Holines i no save putim yu het bilong sios, holines em bilong yu daunim laik bilong yu yet bilong ananit long laik bilong God tasol.

Ebrahim em redi long katim nek bilong Aisak, tasol God I tok:

Jenesis 22: 16,17 ...bikos yu bin mekim dispela samting, na yu no bin holim bek pikinini man bilong yu, dispela wanpela pikinini man bilong yu...V.17. Long blesing Mi bai blesim yu, na long wok bilong mekim i kamap planti moa bai Mi mekim tumbuna pikinini bilong yu i kamap planti moa olsem ol sta bilong heven, na olsem dispela wesani stap antap long nambis bilong solwara.....

Wesani save makim ol lain blut bilong Ebrahim.

Stani save makim ol lain bilong Ebrahim long bilip.

I tru tumas, wanem samting yu givap long en, God bai givim moa yet long yu gen, na gen, na gen.

Bihain God I givim Rebeka long Aisak, wankain olsem tasol Papa bai givim Sios long Kraist bilong maritim. Na ol lain king bilong Isrel i bin kam long lain Ebrahim. Deviti kisim ples bilong king Sol i go inap long Krai.

Sapta 6 - Jekop

Sampela hap stori bilong em i stap long Jenesis 25. Rebeka i gat bel, na karim 2-pela pikinini wantaim. Long pasin bilong ol lain Ebrahim, namba wan pikinini man em bilong kisim olgeta samting bilong papa. Na dispela tupela boi, mama i no bin karim yet, na 2-pela pait insait long bel bilong mama. Orait, Iso i winim pait na kamaut pastaim, na brata i holim lek bilong en na kamaut namba tu. Taim mama i karim dispela pait i go bikpela moa yet. Na Jekop i trikim Iso, na Iso i tok “Maski long dispela blesing bilong papa, yu yet ken kisim.”

Jems i stori long kain Kristen i gat tupela tingting long bel.

Jems 4: 7,8 Yupela man bilong sin, bel bilong yupela i mas kamap klin, olsem mani wasim han bilong en na i kamap klin. Yupela man i gat tupela tingting, yupela i mas rausim dispela tingting nogut long bel bilong yupela

Han, i save makim aksien bilong ol sinman, ol nitim namba wan wok, long God ken fोगivim ol. Tasol Kristen i gat tupela tingting, ol nitim namba tu wok, bel klin.

Apostle Pol tu i stori long kain Kristen i gat tu- bel.

Galesia 5:17bodi i aigris i birua long Spirit, na Spirit i aigris i birua long bodi.

Olsem wanpela tasol ken winim pait. Spirit bai win, na kontrolim Kristen laip, o ol pela bel bai win, na Kristen bai bekslaid.

Mining bilong nem Iso, ret pela. Na mining bilong nem Jekop, giaman. Jekop em bin trikim papa bilong em Aisak, em trikim kandere bilong en Leban, na em trikim brata, na kisim ol blesing papa Aisak.

Iso em man bilong bus na kaikaim wel abus, tasol Jekop em man bilong lukautim bulmakau, sip sip. Wanpela de Iso em painim ol wel abus nabaut, tasol nogat. Em kam bek long haus sel nating nating. Bodi bilong en slek, na em hangri nogut tru. Em bungim brata bilong en Jekop i kukim sampela bret na ret sup bin, na Iso askim “plis, mi dai long kaikai,” Na Jekop i tok:

Jenesis 25: 31 Pastaim yu mas givim mi dispela namba bilong yu olsem namba wan pikinini man, na bihain mi ken givim sup long yu.

V. 32 Em i orait, Klostu mi laik i dai, na dispela namba bilong mi olsem namba wan pikinini bai i helpim mi olsem wanem?

Hibru 12: 16 Nogut wanpela man i givim baksait long God, olsem bipo Iso mekim. Bilong baim kaikai wanpela taim tasol, em i tromoi olgeta blessing bilong namba wan pikinini, Bihain em i laik kisim dispela blesing gen, tasol God i tok nogat. Iso em i krai planti long kisim blesing tasol i no gat rot bilong em i tanim bel.

Dispela lo i save makim Iso bilong kisim ol samting bilong papa. Aisak i gat planti haumas sipsip, bulmakau, meme, kamel, donki, silva, gol, moa na moa. Na tu, insait long Aisak i gat promis long lain king bai kamap bihain. Taim bilong Aisak i laik dai,

orait, em singautim Jekop, putim han antap long en, na givim blesing long en. Na dispela ol mekim tru antap, na no gat we long senisim bihain.

Tingim lista bilong olgeta samting bilong namba wan pikinini, na promis long lain king bilong en, na skelim ol dispela wantaim sup bin. Na Iso i tromoi ol dispela samting bilong inapim hangri bilong bel. I gat sait bilong spirit, na i gat sait bilong bodi. Planti ol tingting long bodi sait tasol, na ol no tingim sait bilong spirit. Bodi sait i no bilong oltaim oltaim. Tasol sait bilong spirit em long itaniti. Jisas yet tok:

Matyu 6: 31 Yupela i no ken tingting planti na tok, 'Bai yumi kaikai wanem samting? Bai yumi dring wanem samting ? Ol haiden i save wari long dispela samting.

Ol haiden i wok long painim dispela long olgeta de, tasol ol Kristen i mas inapim sait bilong spirit pastaim. Pren, Papa God tu I laik givim bikpela blesing long ol pikinini bilong en. Dispela blesing i no bilong ol haiden. I no bilong ol stilman, meri pamuk, no man spak. Nogat. Dispela blesing em bilong ol famili bilong Em tasol. Dispela blesing i save makim namba tu wok ol Pikinini bilong God i gat promis long kisim.

Tasol planti Kristen i no goan bilong kisim dispela blesing. Ol ting “dispela namba tu wok bai helpim mi olsem wanem?”

Dispela sup bin em wanem samting ?

1 Jon 2: 16 Ol pasin bilong dispela graun

1. *Pasin bilong bel kirap*
2. *Aigris*
3. *Bikhet*

Bihain gen, Iso em senisim tingting bilong em, na i laik kisim blesing bilong papa.

Sans bilong em pinis, i no gat rot long tanim bel.

Hibru 6: 6 Sapos dispela ol man i pundaun na givim baksait long God, orait i no gat rot bilong ol i kam bek na tanim bel gen. Nogat.

God I save givim spes we Kristen ken goan long kisim namba tu wok. Tasol ausait long dipela spes, orait sans i pinis.

Revelesen 2:21 Mi laik bai em i tanim bel, olsem na mi larim em i stap sampela taim, tasol em i no laik.

Tru tumas, man i ken makim rot we i no gat ples long tanim bek gen.

Lukim sampela Baibel Ves i tok long “las sans” long pes 184.

Orait, yumi go bek na pinisim stori.

Iso i bin lusim olgeta rait bilong kisim ol samting bilong papa. Olsem, na em i laik kilim brata bilong em Jekop. Nau mama bilong Jekop i laik helpim em long ranawe, na go bek long kandere bilong en Leban.

Jekop em ranawe long brata bilong en, na long nait em slip...

Jesesis 28: 12 Na em i driman, na lukim wanpela lata i sanap long graun, na het bilong en i go inap long heven. Na lukim, ol ensel bilong God i wok long go antap na kam daun long en.

Long hia God I promisim em long bringim em bek gen long as ples bilong en. Long moning taim Jekop i mekim 4-pela samting:

1. em sanapim alta ston
2. i kapsaitim wel antap long ston
3. em givim nem bilong ples "Betel" (haus bilong God)
4. em i mekim promis long God

Nau, God I stat long wok long spesol we long laip bilong Jekop. Long hia yumi ken tok bel bilong en senis long God. Yu mas klia, mi no save tok Jekop i kisim namba wan wok hia na namba tu wok bihain. Tasol mipela laik soim laip bilong Jekop i **piksa** long kisim namba wan wok na namba tu wok. Jekop i painim moa trabel long laip bilong en, em dispela stori long 4-pela meri i karim ol pikinini bilong Jekop:

<u>Lia</u>	<u>Silpa</u>	<u>Resel</u>	<u>Bilha</u>
Ruben	Gat	Josep	Dan
Simion	Asa	Bensaman	Naptalai
Livai			
Juda			
Isaka			
Sebyulan			
Daina			

Aposel 17: 30 Bipo ol man i no gat save, na God i no toktok planti long samting ol i bin mekim long dispea taim. Tasol nau em i tok strong long olgeta man long olgeta ples, Yupela i mas tanim bel.'

I olsem: No gut man tude i ting God i no gat toktok planti long man i maritim namba tu meri. Mipela stap nau long taim bilong pul lait bilong Baibel, na God bai skelim ol man long rait i stap long Buk Baibel. Long taim ol bin askim Jisas long pasin bilong marit, orait Jisas i no stori long Jekop, no Ebrahim, o king Devit. Nogat. Em i poin bak long Adam na Iv. Jisas i givim lo bilong kontrolim pasin bilong marit.

Matyu 19: 5Na tupela bai stap wanpela bodi....

Man i gat wanpela bel tasol, na olsem wanem em i bruk bruk na givim hap long wanpela meri, na hap long narapela meri? Nogat, wanpela meri tasol ken stap namba wan, olsem namba wan bilong Jekop em Resel. God, Husat I got olgeta save Em I givim wanpela meri tasol long Adam. Na wanem Kristen i bakslaid bilong kisim namba tu meri, bai pesim Bikpela long kot.

Nau long Jenesis 32 yumi lukim tingting bilong Jekop i laik go bek long as ples bilong ol Biasiba. Yu lukim, ol wrong bilong Jekop, God i kapsaitim na kisim glori long en. Em bin stap wantaim Leban planti yia, na God I bin blesim em olgeta.....

200 meme meri

20 meme man

200 sipsip meri

20 sipsip man

30 kamel i gat pikinini wantaim

40 bulmakau meri

10 bulmakau man

20 donki meri

10 donki man

Na ol wokman, wokmeri, na famili bilong Jekop yet i kisim blesing tu. Ol lain bilong Jelop i go kamap long rot long Biasiba, tasol pes nogut bilong Iso, i stap yet long tingting bilong Jekop. Bipo, Iso em redi long kilim Jekop, na nau em kam klostu long bungim em long rot. Iso i kam wantaim 400 man bilong pait, na Jekop i pret nogut tru.

Nau Jekop i laik stretim trabel wantaim brata bilong em, olsem na em i redim ol dispela fam animal bilong givim olsem presen long en. Em i save skelim ol samting bilong en gut tru, bilong givim olsem presen long Iso.

1. Ol fam animal bilong em i go paslain
2. Nekis ol wokman, wok meri
3. Ol meri bilong en, wantaim 13 pikinini bilong ol.
4. Resel.
5. Jekop em stap bek wanpis.

I gat wanpela liklik wara i stap, nem bilong en Jabok, na Jekop i salim ol lain samting bilong en i go brukim wara pastaim. Dispela i piksa long konsikresen, bilong putim ol samting antap long alta. Planti ol kain samting em i no hat long givap, na putim antap long alta, tasol bihain ol kainkain samting i dia, i gat hat wok long givap. Na bihain wanpela las samting i dia tumas, na las tru, yu yet.

Rom 12: 1 Yupela mas givim bodi bilong yupela long God olsem ofa. Bodi i gat laip yet na yupela givim long God, na i bilong God wanpela tasol...

Dispela em i no wok bilong sinman long mekim. God I no redi long kisim ofa long sinman. Dispela em bilong ol Kristen brata bilong kam long putim olgeta samting antap long alta.

Sampela taim em hat tru long Kristen long givap na lusim laip long ol yet, bilong givim long God. Las bilong salim i go brukim wara Jabok, em mas Resel. Na nau, san i laik go daun, na Jekop stap bek wanpis.

Jenesis 32: 24 Na Jekop tasol i stap.....

Jisas, tu, Em i go stap wanpis long gaden Getsemani. Bilong kisim namba tu wok yu mas go long God wan pis tasol. No ken kisim ol brata, tumbuna, wantok bilong yu wantaim. Nau Jekop sanap em yet, no gat narapela bilong helpim, no gat poroman bilong sanap wantaim. No gat mama bilong holim han bilong em nau. Nogat na nogat. Jekop i mas daiaut long Jekop yet.

Galesia 2:20 Olsem na nau mi stap laip, em i no laip bilong mi yet, Nogat.

Mipela bin tok bipo long pikinini wit i mas dai, nau em wankain olsem long Jekop yet. Em olupela bel bilong em i save trikim papa Aisak, brata Iso, smolpapa Laban. Jekop mas nilim Jekop long kros wantaim Krais. Trabel bilong Jekop em i no Aisak, o Iso, o Leban. Trabel bilong Jekop em Jekop yet.

Jenesis 32: 24Na long dispela hap wanpela man i pait wantaim em inap long tulait i kamap.....

Dispela “man” em Bikpela yet, tasol Holi Spirit i kolim Em “wanpela man.” Em nau dispela tupela poin we laip bilong en i gat bikpela senis.

1. Long **Betel**
2. Hia, hap sait long wara, na Jekop i kolim dispela ples **Pe-nai-el**

Jekop i holim pas Bikpela bilong kisim blesing.

1. Jekop i laik kisim blesing.
2. Bikpela I laik lus i go.
3. Jekop em no laik lusim Em.
4. Bikpela itok “orait givim nem bilong yu pastaim.”

Jenesis 32: 27 Wanem em i nem bilong yu?

Pastaim Bikpela ken blesim Jekop, Jekop mas givim nem bilong em. Sampela i kam daun bilong beten long namba tu wok, na krai krai planti long kisim pulap long Holi Spirit. Tasol pastaim long “kisim,” ol mas konfesim as bilong sin i stap. I olsem, dispela as bilong sin i save ranawe hait long taim man i go daun bilong prea. Olpela bel em olsem wel-gris, na hat long pulim aut ples klia. Tasol man mas bringim sin aut long san lait bilong Bikpela. “Mi Jekop! Mi Kristen, tasol mi gat ol pela bel.” Dispela prea, planti ol slek long mekim taim ol i kam daun bilong prea. Ol taim long Baibel nem bilong man i save fitim kain pasin bilong en. Jekop em laik kisim blesing, tasol em les long konfesim nem bilong em, [trikman] na pait i go, i go, long pela tumas. Brata, yu no mas beten olgeta nait, inap tulait i bruk bilong kisim namba tu wok. Dispela namba tu wok em laik bilong Bikpela, na Em bai givim long sem taim yu bringim dispela ol pela bel aut long ples klia na larim Bikpela kilim i dai.

Aposel 5: 32 ...God i save givim Holi Spirit long ol manmeri i bihainim tok bilong em.

Jenesis 32: 28 ...Bai ol i no moa kolim nem bilong yu Jekop, nogat. Bai ol i kolim yu Isrel, Long wanem, olsem wanpela pikinini man bilong king yu gat pawa wantaim God na wantaim man. Na yu bin win.

Dispela tupela poin long laip bilong Jekop yumi lukim i gutpela **piksa** long namba wan wok, na namba tu wok. Mining bilong Jekop, giaman, o trikim arapela. Mining bilong Isrel em pikinini bilong King. Bikos laip bilong em senis, orait nem bilong em senis tu wantaim. Laik bilong Jekop i strong tumas long kisim dispela blesing, olsem em holim pas Bikpela inap em i kisim dispela blesing. I luk olsem yumi laik givap isi isi tumas, na yumi no laik taitim bun bilong kisim dispela namba tu wok. “Mi kisim, i orait. Mi no kisim, i orait tu.” Brata dispela em i no inap. Yu mas kisim bel klin bilong go insait long heven. Yumi mas winim **pait**, wankain olsem Jekop em i bin win.

Luk 18 Meri, man bilong en i dai pinis, i tok **pait** wantim Jas.

Mak 7 Meri bilong Finisia i strong tumas long Jisas mas helpim pikinini meri bilong en.

Matyu 7: 8 Man i paitim dua, bai God i opim dua long em.

Matyu 11: 12 [KJV Mi yet tanim long Tok Pisin. RB] man i laik kisim kingdom bilong heven em mas pait tru long kisim. Na man i save long pait, em bai kisim kingdom long strong bilong em yet.

Luk 13: 24 Yupela i mas taitim bun tru, bilong go insait long liklik dua.

Man husat i malumalu long painim namba tu wok, em no inap kisim. Sapos yu kam daun bilong beten long kisim namba tu wok, na yu beten long taim, na yu no klia yet, orait go painim wanpela ples hait, yu wantaim God tasol, na prea wantaim bilip bilong yu. Tru. tru, God bai mekim olsem em i promis.

Jenesis 32: 25 Na taim em i lukim em i no winim em, orait em i tasim skru i antap bilong lek bilong em. Na skru i antap bilong lek bilong Jekop i lus, taim em i pait wantaim em.

Jenesis 32: 31.....na em i wokabaut kranki long lek blong en.

Yumi save lukim ol holines pipol tu i gat narakain wokabaut. Ol no save fit wantaim pasin bilong ol arapela pipol. Wanem samting i stap insait long bel, em save kontrolim wokabaut bilong ol. Dispela kain wokabaut i gat sem bilong diwai kros wantaim Kraist. Dispela sem em mak bilong husat i bin pait wantaim Bikpela na win.

Matyu 5:11 Sapos ol i lukim yupela i bihainim mi, na ol i tok nogut long yupela na i ranim yupela na i sutim kain kain tok giaman long yupela, orait yupela i ken amamas.

Apostle 5: 41 Olsem na ol aposel ol i lusim kaunsil na i go ausait. Na ol i amamas long God i tingim ol inap long kisim sem long nem bilong Jisas.

Wokabaut bilong man i save soim aut sem bilong diwai kros.

Sapta 7 - Moses

Moses em narapela holines man long O.T. Hap stori yumi laik lukim em long Hibu 11: 23 - 28. Na long Eksodas sapta 1 - 4. Laip bilong Moses i save bruk long tri-pela 40 yia.

1. 40 yia long haus Fero
2. 40 yia long lukautim sipsip long ples nating
3. 40 yia long lukautim ol Isrel long ples nating

Tupela poin long laip bilong em i brukim dispela 3-pela 40 yia

1. Yia 40 long Isip, em i laik long kisim hevi wantaim ol pipol bilong God.
2. Yia 40 wantaim sipsip Bikpela I kamap long em long bus paia.

Dispela tupela poin i **piksa** long namba wan wok, na namba tu wok. Mi no tok Moses i kisim namba wan wok, na namba tu wok, tasol mi tok em **piksa** tasol long dispela.

Long yia 40 long haus bilong Fero stori i save go olsem ---

Hibu 11: 24-27

V24. Long 40pela yia long haus Fero, Moses i les long stap moa.

V25. Em sori long lain Isrel. Em les long amamas bilong sin long haus Fero.

V26. Em ting "sem bilong Krai i winim pasin bilong Isip. Na God bai givim gutpela pe"

V27. Moses i bilipim God na lusim Isip.

Yes, ol dispela ves hia long Hibu i makim bikpela poin long laip bilong Moses. Em lukluk long haus bilong Fero, na em i lukluk long ol lain bilong em yet i karim hevi. Em i tingim, ol amamas na pati bilong dispela laip bai pinis kwik taim, tasol itaniti i no gat pinis bilong en. Olsem em i makim dispela liklik rot i gat bikpela prais bihain, long taim em i dai. Tru, long dispela taim em i kilim wanpela Isip, tasol mipela lukim dispela em poin i tanim laip bilong en long narapela rot. Na long buk Hibu em i tok Moses em i bilip na mekim. Olsem long dispela taim i piksa long Moses i kisim namba wan wok.

Hibu 11: 24 Long bilip tru Moses.....

Hibu 11: 27 Long bilip tru em i givim baksait long Isip.

Moses i stap long wanem ples taim em i **bilip tru** ? Insait long haus bilong Fero !

Nau Moses I ranawe, na go hait long ples i no gat man long Midian. Long hia, em lukautim sipsip bilong Jetro inap 40 yia moa long laip bilong em. Nau em i gat 80- pela Krismas, na em i lukim wanpela bus paia.

Eksodas 3: 2, 3. Na ensel bilong BIKPELA i kamap ples klia long em insat long lait bilong paia i kamaut namel long wanpela bus. Na em i lukluk na, harim, dispela bus i lait long paia na paia i no kaikai olgeta dispela bus. V. 3. Na Moses i tok, Nau bai mi go arere na lukim dispela samting, em as bilong dispela bus i no kuk olgeta.

Orait, long hia, yumi ken lukim nekis poin i save tanim laip bilong Moses i go long narapela we. Gen, mipela no ken tok klia wanem samting tru tru i kamap long Moses, tasol mipela ken lukim klia dispela bus paia i **piksa** long namba tu wok. Long hia Moses i tok **“bai mi go arere.”** Pren, bilong kisim namba tu blesing holines, man i mas go arere. Yumi no inap pinisim ol samting bilong wan wan de. Yumi mas go arere. Skul, wok, slip, kaikai, sindaun, wokabaut, toktok, i mas slek, na yumi mas go arere. Yumi mas go arere bilong prea, yumi mas go arere bilong painim God. Yumi mas lusim ol wari bilong wan de, wan de, na painim taim bilong go prea long kisim pulap long Holi Spirit. Yumi no ken bisi, bisi long olgeta samting na kisim namba tu wok sem taim.

Em Ensel bilong BIKPELA i laik salim Moses long go bek long Isip gen, na kisim ol Isrel aut long Isip Dispela “Ensel,” Em Pikinini Man bilong Papa God. Na Moses i les long lusim ol sipsip, na go bek gen long Isip. God I laik, na Moses i no laik. Olsem dispela strong pela laik bilong Moses i mas bruk, na mekim wankain beten Jisas I bin mekim long Getsemani. Konsikresin.

Matyu 26: 39 “Yu no ken bihainim laik bilong mi. Nogat. Yu mas bihainim laik bilong yu tasol.”

Dispela em prea man i mas mekim bilong goan long holines. Faiv pela taim Moses i surik long dispela wok God I laik salim long en. Em save eksklus, eksklus, eksklus.

Eksodas 3: 11 Mi husat, bai mi ken i go....

Eksodas 3: 13 Harim.... bai mi mekim wanem tok long ol...

Eksodas 4: 1 Harim, bai ol i no bilipim mi

Eksodas 4: 10 mi no stap man bilong mekim naispela toktok

Eksodas 4: 13 salim long han bilong man husat Yu laik salim

Tasol Moses i no inap senisim tingting bilong Bipela. Olsem na nau dispela Ensel bilong BIKPELA, em les, na bel hat long Moses.

Eksodas 4: 14 Na belhat bilong BIKPELA i kamap birua long Moses....

God I no save orait long strongpela laik bilong man husat i tok “Nogat” long Em. Sampela i save kam daun bilong prea, na krai “Yes, Bikpela, Yes Bikpela,” tasol dispela bikpela NOGAT i stap yet long bel bilong ol. Nau, Moses i no inap stap moa long Midian, na holim pas long bilip bilong en. Na sapos God i salim yu long narapela hap, orait yu no inap stap bak long as ples na mekim wok bilong God i go het. Nogat.

Man husat i save sakim tok bilong Bikpela em i no fit man bilong go long heven. Bel hat bilong God bai pasim hanlek bilong dispela man na tromoi long hel.

Tupela man God I laik salim, tasol tupela i no laik go. Moses long Isip na Jona long Nineva.

Esikiel 3: 18 Taim Mi tokim man nogut, Tru tumas, yu bai dai, na yu no givim tok lukaut long em, o toktok long man nogut long em i mas lukaut long rot nogut bilong em, bilong kisim bek laip bilong em, dispela man nogut stret bai dai long sin nogut bilong em, Tasol blut bilong em bai Mi mekim askim long en long han bilong yu.

God I tokim Moses “Rausim su bilong yu, yu stap long graun holi.” God I les long harim eksklus moa long Moses. Orait Moses i bruk daun. Na konsikretim laip bilong em long laik bilong Bikpela. Em i orait long God I salim em bilong go bek long Isip na kisim ol lain Isrel aut long dispela ples.

Em i yesa long BIKPELA, na i orait long go daun long Isip. Na God I givim strong long Moses bilong go mekim wok bilong Em. Yes, em hia, long dispela bus paia, laip bilong Moses i tanim long nupela wokabaut. Ol dispela stori i fit tru bilong soim rot bilong kisim Holi Spirit, na namba tu wok holines. Yes, strong pela laik bilong man i mas burkdaun and givap. Bihain Moses tu, em i go sanap wantaim Jisas antap long maunten. Matyu 17:1 -

Sapta 8 - King Devit

Stori bilong king Devit i stap long 1 na 2 Samyuel. Yumi ken lukim sampela poin long stori bilong em. Long taim Devit em yangpela boi, em i save lukautim ol sipsip bilong papa. Wantaim strong bilong God, em i bin kilim wanpela laion, na narapela taim em i kilim wanpela bea. Samyuel i kam long haus bilong en na kapsaitim wel bilong makim em long kamap king. Na bihain, God I helpim em long em kilim Golait tu.

Devit i pundaun long sin wantaim Betsiba, meri bilong Yuraia. Na bihain, i traim long haitim long ai bilong ol pipol, tasol God I salim profet Netan bilong krosim em. Orait Devit nau em krai sori long God, na prea bilong en i stap long Sam 51. Long dispela prea, king Devit i gat tu-pela rikwes:

1. Namba wan: Em askim fogivnes long aksin bilong sakim tok.

Ves 1. rausim i go ol pasin bilong mi long kalapim lo.

Ves 2. Wasim mi

Ves 3. mi bin mekim ol pasin bilong mi long kalapim lo

Ves 4. Mi bin mekim sin...

Ves 4. mi bin mekim dispela pasin nogut.

Ves. 7. rausim pasin doti...

Ves. 9. rausim i go olgeta pasin nogut bilong mi.

2. Namba tu: Em askim God long klinim bel bilong en.

Ves. 2. Wasim mi olgeta, na bai pasin nogut i no stap moa long mi.

Ves. 5. Mi stap yet long bel bilong mama, mi man bilong mekim sin

Ves. 7. Rausim sin...bai mi kamap klin olgeta...waitpela

Ves. 10. Wokim nupela klinpela bel insait long mi.

Ves. 10. Putin nupela spirit insait long mi

Em wanpela prea, tasol king Devit i gat tupela rikwes: 1. fogivim sin. 2. klinim bel. Na i gat waswas bilong namba wan wok, na waswas bilong namba tu wok. Baibel i klia long mama i save karim yumi wantaim ol pela bel. "Mi man bilong mekim sin insait long bel bilong mama." -- mining, insait long bel bilong mama, bel bilong em i no stret wantaim God. Na long laip taim dispela olupela bel em save gro moa, na moa. Olpela bel i save pikap o bungim moa na moa dipraviti. Orait, long namba wan wok i gat wanem waswas ? Em i save wasim dispela sin i bin gro moa, kam inap long taim mama i bin karim. Tasol dispela waswas bilong namba wan wok, i no save wasim olupela bel mama i karim em long en.

Olsem long Inglis i gat tu-pela nem bilong skelim tupela kain waswas.

1. Wasim klin ol pela bel mama i bin karim yumi long en.

2. “Acquired” dipravity. As bilong sin man i save pikap long laip taim bilong en.

Olsem king Devit i bin beten long kisim tupela: 1. waswas bilong namba wan wok, na 2. waswas bilong namba tu wok.

V.7. na i **winim** ais i wait pela tru.

Em askim forgivenes long kilim Uraia, na forgivenes long stilim meri bilong en. Tasol nau em askim God I ken klinim dispela sin em dip moa. Forgivenes i no inap pikisim. Olgeta wanwan ais i kam long skai i gat wanpel liklik pipia das i stap namel stet long en. Ol mas gat kain spesol glas bilong lukim. I olsem dispela sno flek em wait, tasol i no 100% bikos dispela liklik das i stap insait long en. Olsem king Devit i tok “**wait i winim ais.**” Prea bilong em i olsem, mekim bel kamap klin 100%. Kain wait i winim sno, na i no gat pipia das insait long en. Olsem na sin em pinis, na i pinis kompit olgeta 100%.

Apostle 13:22 Mi painim pinis Devit, pikinini bilong Jesi. Bel bilong mi i laikim dispela man. Em bai i bihainim olgeta laik bilong mi.

Dispela stori bilong king Devit i save soim klia tru, man husat bel bilong em i rait wantaim God, em ken pundaun long traim, na bekslaid, na Holi Spirit I no stap moa wantaim em.

Sapta 9 - King Esa

Bihain ol lain Isrel i bruk tu-pela hap, orait Esa em namba tri king bilong Saut, Juda. I no gat wanpela king bilong Not i bihainim Bikpela. Na sampela wanwan tasol long sait bilong Juda i gutpela king. Na king Esa em i wanpela gutpela king tru bilong Juda. Mipela i no gat pul stroi bilong em hia, tasol mipela laik lukim wanpela Baibel ves i tok long em.

1 King 15: 14 Tasol bel bilong Esa i stap inap tru wantaim BIKPELA olgeta de bilong en. [100% KJV pafek]

Bel bilong em pafek wantaim BIKPELA.

I no gat baptais bilong Holi Spirit long O.T. pipol.

Jon 7:39 Em i tok long Holi Spirit ol man i bilip long em bambai ol i kisim. Long dispela taim Jisas i no i go bek long heaven yet, olsem na Holi spirit i no kam yet.

Tasol i gat O.T. sampela manmeri i holi, lista i stap long Hibru 11. Em ol dispela lain pipol i bin kamap long mak “ inap tru,” na i no gat nekis level moa. Olsem bel bilong ol i stap pafek long ai bilong God.

Sapta 10 - King Hesekaia

King Hesekaia em namba 13 king bilong Juda, na yumi no inap lukim ol stori long laip bilong em hia, tasol yumi laik lukim sampela wanwan ves. Planti arapela king bilong Juda wantaim Isrel i lusim Bikpela, na go bihainim ol god giaman bilong Kenan. Tasol king Hesekaia em i brukaut long ol lain tumbuna bilong em.

Papa bilong king Hesekaia, em king Ehas, em i bin lokim dua bilong tempol, tasol king Hesekaia em i bin opim gen. God I bin helpim king Hesekaia long winim ol birua long Siria, tasol bihain king i painim bikpela sik bilong dai. Na nau mipela kam long poin mipela laik mekim long dispela O. T. king. Lukim em beten bilong en wantaim testifai bilong en.

2 King 20: 3 Mi askim yu long daun pasin, O BIKPELA holim tingting nau long mi bin wokabaut long ai bilong Yu olsem wanem, long pasin i tru na wantaim bel i inap tru, na mi bin mekim dispela samting i gutpela long ai bilong yu

“Bel inap tru.” Inglis Baibel: “a perfect heart.” I olsem, bel bilong mi pafek long ai bilong yu. Klin olgeta. 100%. Em no tok long aksen bilong em pafek, o tingting bilong em pafek, tasol em i testifai long bel bilong em pafek. Jon Wesli i save kolim dispela “Kristen Pafeksin.” Ating sampela man i lukim aksen, o wokabaut bilong king i no pafek. Tasol king Hesekaia em i tok ol aksen bilong em i stret long ai bilong BIKPELA. BIKPELA tu Em I no tok ‘Yu giaman.’ Em i harim, na orait long testifai bilong en, na orait long rikwes bilong en long oraitim sik bilong en.

2 King 20:5 Mi God, Bikpela bilong tumbuna bilong em, Devit, mi harim pinis beten bilong en.....

Testifai bilong yu yet i olsem wanem?

Sapta 11 - Ilaisa

Yu ken painim stori long dispela profet long 2 King. Ilaisa em strong pela profet bilong Bikpela, tasol em laik kisim strong bilong God moa yet long laip bilong em. Maski wanem samting, em i hangri tru long painim dispela strong moa wantaim God.

Ilaisa i poroman wantaim narapela profet Ilaija. Na tupela mekim wok bilong Bikpela. Tasol Bikpela I bin soim Ilaija, wok bilong em pinis nau, na God bai kisim em antap long heven. Na Ilaisa i mas stap bek bilong pinisim wok bilong en i stap yet. Na God I yusim Ilaija bilong testim Ilaisa long em tru-tru i laik kisim dispela nupela strong o nogat.

Test long Gilgal:

2 King 2: 2 Na Ilaija i tokim Ilaisa Stap yet hia, mi askim yu plis. Long wanem BIKPELA i bin salim mi long Betel.

Tasol Ilaisa em save, “Sapos mi stap hia long Betel, orait mi no inap kisim dispela namba bilong Ilaija.” Na em tok “Nogat,” long Ilaija, “mi no inap lusim yu.” Mining bilong Gilgal em raun raun sekel. Hia long Gilgal Josua I tokim ol man Isrel ol mas katim skin bilong hap bodi i gat sem. Dispela skin ol save rausim em makim piksa long ol pela bel. Olsem katim skin long Gilgal, dispela em piksa long holines. Nau Ilaisa i redi long goan wantaim Ilaija.

Tes long Betel:

Mining bilong Betel em “Haus bilong God.” Long hia wanpela Baibel skul bilong ol pikinini bilong ol profet i stap. Sampela studen hia ol tokim Ilaisa”

2 King 2: 3 “Nau Bikpela bai i kisim bikman bilong yu i go, Yu save long dispela o nogat?”

Na Ilaisa bakim olsem:

2 King 2: 3 Yupela pasim maus bilong yupela.

I luk olsem ol dispela Baibel skul studen i gat mining olsem. Maski long yu bihaimin Ilaija moa. God bai kisim em i go, na yu bai westim taim bilong yu. Yu inap pinis, na olsem wanem yu ting yu inap kisim namba wankain Ilaija ? Setan i save yusim ol dispela studen long pasim Ilaisa long kisim strong bilong Ilaija. Tasol Ilaisa i ting “Yupela Baibel studen i no inap pasim mi long kisim dispela blesing.”

Tes long Jeriko:

2 King 2: 4 Na Ilaija i tokim em, Ilaisa, stap yet hia, mi askim yu plis. Long wanem, BIKPELA i bin salim mi long Jeriko.

I luk olsem Ilaija i laik testim Ilaisa na painimaut long em i maus wara long kisim dispela blesing, o tru tumas em strong long kisim .

Ilaisa i bekim tok:

2 King 2: 4 ...mi bai i no inap lusim yu. Olsem na tupela i kam long Jeriko.

Hia long Jeriko i gat narapela Baibel skul bilong ol profet, na sem tok i kamap gen ol bin mekim bipo long Betel. Ilaisa i bin winim plant tes bilong lusim dispela namba bilong Ilaija. Nau, narapela tes i kam long Ilaisa bilong luk save em strong moa bilong kisim namba bilong Ilaija o, nogat.

Tes long Riva Jordan

2 King 2: 6 Na Ilaija i tokim em Stap yet, mi askim yu plis, long hia. Long wanem, BIKPELA i bin salim mi long Jordan.

Ilaija tu i laik testim Ilaisa gen, na painimat long Ilaisa i maus wara tasol long kisim blesing o nogat. Tru tumas sapos Ilaisa i stap bek long Gilgal, o Betel, o Jeriko, em i no inap kisim dispela namba bilong Ilaija.

Ilaisa i tok:

Planti samting i laik tanim yu bek long kisim holines. Tasol, olsem Ilaisa, yu mas strong long pait, na goan.

2 King 2: 6 mi bai no inap lusim yu. Na tupela i go yet.

Oltaim long Baibel Jordan Riva i gat mining long dai. Long taim Jisas I kisim baptais long wara Jordan i poinim dai na kirap bek bilong Em. Na taim Josua i brukim wara Jordan wantaim ol Isrel em piksa long kisim namba tu wok. Yumi mas daiaut long sin bilong kisim namba tu wok, na go insait long Kenan.

2 King 2: 7 Na 50-pela man bilong ol pikinini man bilong ol profet i go, na sanap longwe bilong lukluk.

Ol dispela lain studen i no gat intres long go daun long Jordan na daiaut long laik bilong ol yet. .

Ol dispela “luk luk” man i no save kisim wanpela blesing. Ol stap long we na luk luk tasol. Dispela kain ol save sindaun baksait long haus lotu. Ol kam bilong lukluk tasol. Ol no laik kam long painim blesing bilong God. Ol dispela longwe man i no gat intres long kisim namba tu wok.

Tes bilong pasim ai long Ilaija.

Orait tupela i go daun klostu long wara Jordan, na Ilaija i paitim wara Jordan long saket bilong em. Orait wara i bruk hap hap na tupela i wokabaut i go hapsait. Long hia Ilaija i askim Ilaisa “Yu laik kisim wanem samting ?”

Na Ilaisa i tok:

2 King 2: 9 Mi askim yu plis, larim wanpela dabol hap skel bilong spirit bilong yu i ken stap antap long mi.

2 King 2: 10 Yu bin askim wanpela hatpela samting. Tasol, sapos yu lukim mi taim God i kisim mi i go lusim yu, em bai stap olsem long yu. Tasol sapos nogat, em bai i no inap stap olsem.

Dispela las tes i stap, em mas lukim Ilaija long taim em i go, olsem em bai kisim namba tu blesing. Olsem nau planti tes bai kamap bilong Ilaisa ken lukluk raun long ol arpela kain samting. Em i wankain tru long taim man i laik kisim namba tu wok. Seten laik yu ken lukim ol arapela samting. Tok long tangs, lotu long Sarere, piksa long Maria, o sampela Kristen i bin giaman na palim yu, o arapela i save testifai giaman, o wanem arapela kain trabel long lotu, o wanpela pasta i pundaun, stua, kago, mani, ol dispela bai paulim ai bilong yu no ken lukim Jisas. Em Jisas Wanpela tasol bai baptaisim yu wantaim Holi Spirit, na ai bilong yumi mas sutim stret long Em. Pita tu, i tanim ai long Jisas na wokabout long wara, tasol nekis i lukim biksi, na em i go daun long wara. Seten i laik senisim Holines tru tru, na givim yumi narapela kain holines giaman. Tupela kain holines: 1. Holines tru tru. 2. Holines giaman.

Efesas 4: 24 pasin holi tru tru

Ilaisa Em i piksa tru olsem yumi mas givim baksait long ol nois bilong holines giaman, na taitim bun bilong goan long kisim holines tru tru. Ol kain samting i save kamap nau bilong grisim ai bilong Ilaisa; lukim karis, lukim paia, lukim hos, lukim raunwin, tasol em i no save lukraun long ol dispela. Ai bilong en nilim Ilaija tasol.

2 King 2: 12 Ilaisa i lukim...na em i singaut, Papa bilong mi, papa bilong mi...Na em i no lukim em moa..

Elijah i lusim laplap bilong en i pundaun, na Ilaisa kisim. Em i go bek paitim wara Jordan, na wara i bruk tupela hap olsem bipo. Na ol Baibel skul i sanap lukim na ol i tok:

2 King 2: 15 Spirit bilong Ilaija i stap antap long Ilaisa.

Yu ken ritim stori i go moa. Ol strong na pawa bilong Ilaisa i winim strong na pawa bilong Ilaija. Laip bilong Ilaija i makim laip bilong Jon Baptais, na laip bilong Ilaisa i makim laip bilong Jisas yet.

Sapta 12 - Kelep

Ol poroman, wantok, wanlain, wanwok bilong Kelep i dai long ples nating. Em wantaim Josua tu-pela tasol i kamaut long Isip na go insait long Kenan. Ol olupela lain bilong Kelep i dai long ples nating, Kelep na Josua wantaim ol yangpela lain i no bin stap long Isip, i go insait long Kenan.

Ol Namba 14: 24 Wokboi bilong Mi Kelep tasol, bilong wanem, em i got narapela spirit insait long em, na em i bin bihainim Mi olgeta.

I no gat wanpela taim Kelep i bin sakim tok bilong BIKPELA. Em bihainim 100%. God I tok long ol dispela lain i bin lukim ol mirakel long Isip, na long ples nating, ol no inap go insait long Kenan. Ol husat i winim inap 20 yia, ol tambu long go insait long Kenan. (Ol Namba 14) Na ol husat i go insait long Kenan ?, Em ol yangpela lain i no bin stap long Isip. Ol i no bin lukim ol mirakel long Isip. Ol dispela yangpela lain tasol inap go insait long Kenan bikos ol no sakim tok olsem ol tumbuna. Tasol ol olpela lain i bin kamaut long Isip, ol bin skrapim bel bilong God. Ol bikhet tru, na i no piksa long Kristen i karim hevi bilong diwali kros. God yet i skelim dispela olupela lain na yangpela lain. Na God I tok wanpela man tasol i bin kamaut long Isip, ken go insait long Kenan, em Kelep. (wantaim Josua). Na Kelep em piksa tru long man i kisim namba wan wok [lusim Isip] na kisim namba tu wok [go insait long Kenan]. Na yumi tu mas gat wokabaut wankain olsem Kelep bilong go insait long Kenan.

Tingim, Keleb em bihainim Tok bilong Bikpela olgeta. Total, 100%. Dispela mipela save kolim “inap tru.” [pafeksin]. Keleb em stap long lista bilong ol holines man bilong O.T. Yu ken stap long dispela lista tu sapos yu bihainim Bikpela olgeta olsem Keleb.

Sapta 13 - Rut

Taim hangri i kamap long Betlehem, Elimelek wantaim meri bilong en Neomi, i lusim as ples Kenan na go long Moab. Ol lusim Kenan na go long ples bilong ol haiden. Dispela em piksa long wanpela i lusim holines na bekslaid wantaim ol haiden. Tupela pikinini man bilong ol i marit long haiden meri bilong Moab, Orpa na Rut. Tupela meri i haiden stret, na lotu long god giaman “Kimos” bilong ol Moab.

Elimelek, i dai long Moab. Na tupela pikinini man bilong em tu i dai long Moab. Na Neomi i stap yet wantaim tupela tambu, Orpa na Rut. Na Neomi i harim nius long taim hangri bilong Betlehem em pinis nau, na em laik tumasi long go bek long Kenan gen.

Olsem, Neomi i redim ol samting bilong lusim Moab, na tupela meri ol redim ol samting tu bilong go wantaim long Betlehem. Em nau, tripela wantaim i laik lusim ples haiden, na go long Betlehem. Ol go long rot nau, na Neomi i tok maski long yutupela i kam wantaim mi. Yu yangpela yet, na yu tupela mas go bak long as ples na painim narapela, narapela man bilong marit.

Rut 1: 10 Na tupela i tokim em, Tru tumas, mitupela bai go bek wantaim yu long ol lain bilong yu.

Tasol Neomi i strong tru, na tokim tupela, “Nogat, yutupela mas i go bek long as ples.”

Rut 1: 14 Na ol i apim nek bilong ol, na krai tru gen. Na Orpa i givim kis long tambu mama bilong em, Tasol Rut i holim pas strong tumas.

O.K. Orpa i go bek pinis long ol lain bilong en, na long Kimos lotu bilong en. Dispela i soim piksa tru, husat i bin stat long rot i go long holines, tasol ol i no strong tru, na ol save long go bek long sin bilong ol. I kain olsem Jisas i tok “pikinini kaikai i pundaun antap long ston, na kamap kwik taim, tasol bihain san i hat, ol drai na dai.” Nau, Neomi em strong gen long Rut i mas go bek wantaim brata bilong en, tasol Rut i tok:

*Rut 1: 16, 17 No ken mekim strongpela askim long mi mas lusim yu, o bilong mi mas go bek long bihainim yu. Long wanem wanem ples yu bai go, Mi bai go. Na we yu bai stap, Mi bai stap. Lain bilong yu bai stap lain bilong mi, na **God bilong yu bai stap God bilong mi.** Ves. 17. We yu bai dai, mi bai dai, na long dispela hap ol bai planim mi. BIKPELA i mekim olsem long mi na moa tu, sapos wanpela tasol i no brukim yu na mi.*

Olsem Neomi i lukim Rut i strong olgeta, na i no gat tok moa long i mas go bak. Luk gut long tupela samting hia. (1) Rut i lusim PINIS as ples lotu bilong en. (2) Long rot em tanim pes bilong en long go stret long Kenan, (Holines). Dispela em klia piksa long man i konsikretim laip bilong en bilong goan long kisim namba tu blesing Holines. Olsem Ilaija i save testim Ilaisa, olsem tasol Neomi i save testim Rut. Ol strong long goan na kisim namba tu wok o nogat. Ol kain kain samting bai kamap bilong blokim rot long yu goan long holines. Tasol yumi mas strong wankain olsem Rut.

Sapta 14 - Neman

Painim stori bilong Neman long 2 King 5. Neman em kepten bilong ami bilong Siria. Ol birua long Isrel. Em het-ami bilong ol Siria. Na i gat biknem wantaim king bilong em, na em i strongpela man long pait. Tasol em gat sik lepra. Na taim ol go pait wantaim Isrel, em stilim wampela liklik meri bilong Isrel i kam olsem wokslev long helpim meri bilong em. Dispela liklik meri em lusim lain bilong en, ples bilong en, haus bilong en, tasol em i no lusim God bilong en. Em i givim testifai long meri bilong bikman bilong en, “i gat profet long Isrel, em inap oriatim sik lepra bilong en.” Na stori bilong dispela liklik meri i kamap long ia bilong king. Orait King i salim Neman long go daun long Isrel bilong painim dispela profet.

Na ol i kamap long haus Ilaisa i stap long en, na wetim em i kamaut na mekim bikpela singaut samting bilong pinisim sik lepra. Tasol, Ilaisa em i no kam aut bilong lukim Neman, Nogat, em salim mausman bilong em tasol, na emi tokim Neman “go daun insait long wara Jordan na kaunim inap seven pela taim.” Nau, Neman i bel hat nogut tru. Em no laik sampela i lapim em. Em tanim pinis bilong go bak long rot long Siria, tasol soldia bilong em i tok “nogat, yu mas harim tok bilong ol na bihainim.” Orait Neman em i go mekim olsem prophet Ilaisa i tok, na dispela sik lepra i pinis na skin bilong em i klin olgeta.

Orait wanem tising long dispela stori ? Lepra, em dispela sik i stap insait long blut bilong man. Ol arapela kain sik Jisas I save oraitim. Tasol long ol Lepra, Em save klinim. Olsem sik lepra em ol pela bel, o as bilong sin. [Yu mas klia: Sik Lepra i stap long blut, tasol sin i no stap long blut.] Holu Spirit Yet I mas kam bilong klinim as bilong sin. Na Neman i paul tru long we God i laik klinim sik lepra bilong en. Wara Jordan em doti tru, na pulap long graun malumalum, na i no klin bilong dring. Tasol long Siria i gat gutpela, klin pela wara, na i gutpela bilong dring. Na Neman em ting “mi nambawan bikpela man bilong ami, na mi no inap daun pasin tumas, bilong go daun long dispela wara Jodan.” Tude tu, i wankain olsem, “mi bisnis man, o mi memba, o mi het ami, o mi polisman, o mi Yuni Tek, o mi skul, o mi wok gavman.....” Mi ting ol pasta bai givim ona long mi, na rispektim mi, o mekim bikpela singaut long mi, o givim spes long mi, o litimapim nem bilong mi.....” Nogat, brata, olgeta graun long diwai kros i wankain levul tasol. Yu bai stap sem levul wantaim olgeta arapela man nating. Yu mas daunim yu yet wankain olsem Neman i bin go daun long wara Jodan. Lindaun, brukim skru, krai aiwara, daunim gutpela nem bilong yu yet. Dispela as bilong sin em samting nogut tru i stap insait long bel bilong yu. Na yu mas konfesim dispela sik lepra bilong tewel aut long ples klia bilong God ken kilim. Olsem God bai pinisim dispela ol pela bel.

Buk Faiy - Piksa Long Holines Long Olpela Testamen

Sapta 1 - Bun bilong ol Daiman

Stori i stap long Esikiel 37. Long hia em wanpela bikpela tok profet long wanem samting bai kamap long Isrel long taim bihain. Spirit bilong BIKPELA i karim Esikiel long wanpela vali i pulap long planti bun bilong man i bruk-bruk nabaut na drai olgeta. Dispela i save makim ol kantri bilong Isrel i bekslaid olgeta, bruk wantaim God, ol bruk nabaut long planti arapela kantri, na laip bilong spirit i dai olgeta. Lain Isrel yet tude i stap olsem, ol givim baksait long God wantaim Pikinini bilong Em Jisas Kraist. Tasol BIKPELA I tokim Esikiel long autim tok long ol dispela bun i bruk nabaut long vali. Orait na wanpela nois kamap na ol dispela bun seksek, na mit wantaim skin i kamap long ol, tasol ol slip i stap yet.

Orait, na BIKPELA i tokim Esikiel long autim tok gen namba tu taim, long foa-pela win i ken pulimapim waitlewa long ol dispela man i slip long graun. Esikiel I mekim olsem, na ol sanap wanpela draipela ami. Dispela profesi long Isrel bai kamap long taim Jisas I kam bek long Mt. Oliv. Long dispela profesi yumi ken save klia olgeta, Maski long wanem nius i save kam long TV na radio, o wanpela lotu, I no gat wanpela kantri inap rausim Isrel long As Ples God I bin givim ol.

Dispela stori i gutpela piksa long tupela wok God I save mekim.

1. Esekiel i autim tok na ol bun i seksek na bung gen [Kamap nupela gen]
2. Ezekiel i autim tok gen na ol pulim win long waitlewa. [Sanktifaiquesin]

Dispela i save soim yumi tru tru, namba wan wok tasol i no inap, man i nitim namba tu wok bilong fitim em long go long heven.

Sapta 2 - Isrel I Brukim Wara Jordan

Taim ol Isrel i kalabus long Isip, em piksa long man i kalabus long sin. Ol wok slev long Fero, wankain ol sinman i wok slev bilong Seten. Tasol long strong bilong BIKPELA, Em i save kisim ol i kamaut long Isip. Ret Si i op, na ol kamap fri long Fero. Ol no wok slev bilong Fero gen. Na Kraist I save brukim sen bilong Seten na mekim yumi kamap fri long pasin bilong mekim sin. Sapos blut bilong Jisas i no gat strong long pinisim sin, orait blut bilong Em wes nating.

Tasol lain Isrel i no redi long go stret long Kenan. Pastaim ol mas go long maunten Sainai. Long hia BIKPELA i tok “Wasim klos, banisim maunten, sapos wanpela putim han, lek long maunten, ol bai dai. Maunten em smok na paia, na klaut i paiap. Ol dispela em bilong soim Isrel BIKPELA Em I holi, holi, holi. Long hia BIKPELA I givim 10 -pela lo long Moses, na ol manmeri i save tru, ol yet i no stap holi wankain olsem BIKPELA I stap holi. Hia ol save klia, dispela olupela bel bilong ol, i birua long God. Dispela em wankain olsem long Kristen husat i laik go long namba tu wok holines. Pastaim em nitim klia piksa long nit i stap long bel bilong en.

Orait, nau ol bin lusim Isip pinis, kamap long maunten Sainai, na nau ol go kamap long Kedes. Rot I no long pela tumas inap wan wik samting. Na ol gat gutpela stia bilong klaut long de, na paia long nait. Kedes i gat mining long Holines, na dispela ples em dua bilong go insait long Kenan. Long hia ol salim 12-pela Isrel bilong go luk stil long Kenan i olsem wanem. Tasol ol lukim draipela jaiant i stap, na ol kam bak na tok save long ol Isrel “maski, mipela no inap.” Tupela tasol Josua na Kelep i tok “God inap long helpim mipela long kisim.” Na ol Isrel i no bilipim tupela, tasol ol bilipim 10-pela. Na nau ol Isrel yet i tok “Maski, yumi no inap.” Na ol Isrel i krai sori long dispela nait.

Tasol long moning taim ol senisim tingting, na tok “kaman yumi go kisim.” Tasol Moses i tok “Nogat, God I no stap wantaim yupela.” Tasol ol bikhet na go traim, tasol ol no inap. God I givim taim long go insait long Kenan, na ol i no go insait long dispela spes God I givim. Nekis de ol traim long strong bilong ol yet na ol no inap. Yumi mas go insait long Kenan long taim God I opim dua. Hibr 3, i klia olgeta long dispela stori. Na long hia BIKPELA Yet I tanim olgeta i go bak gen long ples nating. God I save bringim olgeta Kristen long Kedes bilong ol yet, na ol bai go insait long holines, sapos nogat, ol bai bekslaid long ples nating na wetim dai tasol.

Nau God I tok olgeta dispela lain manmeri i pret long go insait long Kenan, olgeta bai dai long ples nating. Na ol yangpela tasol inap long go insait bihain. Ol i bikhet tru long ples nating, dispela i no olsem piksa long Kristen laip. Ol i no bilipim BIKPELA, ol sakim lo bilong Em, ol komplem long rot, long wara, long kaikai, long Moses, long BIKPELA yet, na BIKPELA i les olgeta. Sampela ol ting o Isrel long Ples Nating em piksa long Kristen laip, tasol nogat. Ol Kristen i no gat ol dispela kain pasin.

Bihain, taim ol olupela lain i dai long ples nating, orait Josua [wantaim Kelap] i kisim ol lain pikinini bilong Isrel, na ol i go brukim wara Jordan, na ol i go insait long Kenan stret. Wara Jodan i no makim man i dai long matmat. Em makim man i mas daiaut long sin bilong go insait long Kenan holines, na pait wantaim ol jaiant. Ol paul long tok Kenan em makim piksa long ples heven. Kenan em ples bilong ol gaiant, na Isrel i mas go winim Jeriko. Olsem, dai long wara Jordan i no bilong go insait long heven. Nogat. Banis bilong Jeriko i stap insait long Kenan, ol lain jaiant i stap insait, pait i stap. Kenan em i no olsem heven, na wara Jodan i no makim dai bilong bodi. Ves hia i givim mining bilong brukim wara Jodan.

Galesia 2: 20 God i bin nilim mi pinis long diwai kros.

Rom 6: 6 God i nilim olupela man bilong yumi long diwai kros

Nau wara Jodan em taim bilong hai tais. Ol lain Eron i karin Bokis Kontrak antap long sol bilong ol na mars i go stret long wara Jodan. “Gutbai long ples nating.” God bai brukim wara na opim rot olsem bipo em mekim long Ret Si. Nau em taim bilong strong pela **bilip** bilong yu, maski pret, mars stret i go. Yu putim lek long wara, God bai opim rot bilong yu tu. Olsem go stret long holines, maski luk bek.

Olsem wanem Hibru 4 i tok Kenan em ples malolo ?

1. Em malolo long hat wok long Mt. Sainai
2. Em malolo long dai long wara
3. Em malolo long dai long kaikai
4. Em malolo long snek nougat
5. Em malolo long paiap bilong olupela bel
6. Em malolo long bel ai gris i pait agens Holi Spirit.

Dispela malolo bilong Kenan, em malolo long ples nating bilong Mt. Sainai, No gat wara, no gat kaikai, ples snek, Em malolo bilong olupela bel. Holi Spirit I no gat pait moa wantaim ai gris bilong olupela bel. Olsem Baibel i soim Kenan em ples malolo. Na heven em ples malolo tu. Em malolo long ol traim bilong Seten, na ol hevi bilong dispela graun. Olsem Kenan em tupela 1. Ples paitim birua na kisim graun. 2. Ples malolo long trabel bilong olupela bel.

Olsem, yu stap we long Kristen laip? Long Isip, long Ret Si, Long maunten Sainai, Long Kedes, long ples nating, long wara Jordan o long Kenan?

Sapta 3 - Alta Bilong Ilaija

Stori biong God i salim paia long alta bilong Ilaija em piksa tru long holines. Stori i stap long 1 King 18. Ilaija em resis wantaim god giaman Bel antap long Maunten, Kamel, klostu long Namel Solwara. Ol wokim tupela alta, na tok husat i salim paia i kam daun long alta em I God tru. Ol profet bilong god Bel i mekim ol kain pasin bilong haiden, long paia ken kam daun long alta bilong ol. Tasol Nogat. Paia i no kam.

Olsem nau em taim bilong profet Ilaija. Em singautim ol pipol bilong kam klostu bilong ol ken lukim gut, em i no mekim wanpela trik. Em i kisim 12-pela ston na sanapim gut tru alta bilong BIKPELA. Ol wokim bikipela baret i go raun long alta. Na em i brukim na lainim gut tru ol diwai antap long alta. Nau em i katim katim ol hap bulmakau na putim olgeta [100%] [total] antap long diwai. Nekis em kapsaitim 12-pela draipela sospen wara antap long ol dispela. Na mekim gen namba 2 taim. Na mekim gen namba 3 taim. Na wara i pulimapim baret. Na em i wetim 3-klok apinun, em taim bilong mekim ofa long tempel, Na Ilaija em askim BIKPELA long salim paia i kam daun. I wankain olsem De Bilong Pentikos, paia i kam daun long ol disaipol na kukim ofa long alta.

1 King 18: 38 Na paia bilong BIKPELA i pundaun, na kaikai olgeta dispela sakrifais bilong kuk olgeta, na ol diwai, na ol ston, na das, na paia i rapim tang bilong en i karim i go antap dispela wara i stap long baret.

I olsem, dispela paia bilong God I no inap kam nating. Ol samting mas redi long stret pela oda pastaim.

Aposel 5: 32Holi Spirit...husat God i bin givim long ol husat i bihainim tok bilong Em.

Sapos Ilaija i putim 10-pela ston tasol dispela paia i no inap pundaun. Sapos em i tromoi diwai nating nating, na em i no stretim, orait paia i no inap kam. Sapos em putim hap tasol bulmakau, orait paia i no inap pundaun. Sapos em mekim ofa long 2-klok, paia i no inap kam. Na i wankain olsem long husat i painim namba tu wok. Em i mas bihainim ol wan, wan step God I save soim long en, bilong Holi Spirit wantaim paia i kukim olupela bel.

Matyu 3: 11 ...Em bai givim baptais long yupela wantaim Holi Spirit, na wantaim paia.

Dispela paia i save kam daun long heven, na i no gat nit long man yet traim long kirapim. Setan wantaim ol god giaman bilong em i no gat dispela kain paia. No gut sampela i traim long kirapim paia bilong ol yet long taim bilong lotu. Dispela holines paia i mas kam daun long heven.

Livai 10: 1 Nedap na Abaihu....tupela i ofaim narapela kain paia long pes bilong BIKPELA,

Dispela kain paia i save kam long han bilong man yet. Em i no wanpela mirakel. Tasol paia bilong Bikpela i save kukim as bilong sin.

Narapela kain paia em mirakel Setan yet wokim:

Rev. 13:13 Long ai bilong ol manmeri em [Namba tu wel abus] i mekim paia i lusim heaven na i kam daun long graun.

Yes, yumi nitim Holi Spirit I ken kam strong long lotu bilong yumi. Tasol yumi no gat we long fosim Em long kam. Em I mas kam long laik bilong Em Yet. Olsem nogut yumi kirapim wanpela paia giaman long taim bilong lotu olsem Nedap na Abaihu mekim.

Sapta 4 - Sospen Pulap Long Wel

Stori bilong dispela sospen i stap long 2 King 4. Wanpela profet i dai, na meri bilong en, wantaim 2-pela pikinini man bilong en, i gat draipela dinau bilong dispela profet i bin dai. Na dispela meri i go long profet Ilaisa, na askim helpim bilong em. Orait, Ilaisa i askim em i gat wanem samting i stap long haus, na meri i tok “Olgeta samting i pinis, na liklik wel tasol i stap.” Na Ilaisa i tokim em:

2 King 4: 3 ...Go, yu dinau long ol sospen samting nabaut long olgeta man i stap klostu bilong yu, yes, ol sospen samting i emti. No ken dinau long liklik namba tasol.

Orait, 2-pela pikinini man bilong em i go nabaut nabaut olsem na kisim i kam, na go kisim planti moa i kam. Na haus i pulap long sospen. Nau, ol pasim dua, na stat long pulimapim ol dispela emti sospen long wel i bin stap long namba wan sospen, na olgeta sospen, nau pulap pulap. Na meri tok boi, “bringim narapela.” Tasol boi i tok. “Nogat, olgeta pinis.” Na Ilaisa i tok “Go salim ol dispela wel, na kisim dispela mani long stretim dinau.”

Bodi bilong yumi i olsem dispela sospen graun. Na dispela wel yumi save kisim i no bilong yumi yet. Dispela wel em wel bilong Holi Spirit. Na holines yumi save kisim i no bilong yumi yet. I gat paia bilong Holi Spirit bilong klinim, na i gat wel bilong Holi Spirit bilong helpim yumi mekim wok bilong Bikpela. Jisas em tu nitim wel bilong Spirit, tasol Em I no nitim Paia bilong kukim ol pela bel.

Wokim sospen graun, em wok bilong rabis man. Ol putim sampela ret pela graun antap long wanpela raun tebol. Na ol pasim tebol long wanpela wil na tantanim olsem baisikel wil. Tebol wantaim graun malumalumi tanim raun na raun, na long tupela han man i wokim wanpela sospen smat tru. God i stretim laip bilong yumi olsem dispela graun malumalum.

Jeremaia 18: 6olsem retpela graun i stap long han bilong man bilong wokim sospen graun, olsem tasol yupela stap long han bilong Mi....

I olsem, dispela bodi bilong yumi em sospen graun, bilong God I ken pulimapim long wel bilong Holi Spirit.

1 Korin 6:19-20 Bodi bilong yupela em i haus holi bilong Holi Spirit, ating yupela i no save dispela ?

2 Korin 4: 7 Tasol mipela i gat dispela gutpela samting, em i olsem i stap insait long sospen graun.

Sospen graun, God i kisim das na wokim Adam. Yumi save mistek long tingting, mistek long aksien, paul nabaut, tasol insait long bel em samting dia tumas i stap. Ol taim long Baibel wel i piksa long Holi Spirit, na Em I laik pulimapim bel bilong ol Kristen long Holi Spirit.

Sapta 5 - Ilaisa I Tromoi Sol

2 King 2:19 Sampela man bilong taun Jeriko i laik Ilaisa ken kam sindaun wantam ol. Dispela taun ol sanapim gen naispela tru, tasol wara i nogut, na graun bagarap long sol. Olsem, na Ilaisa i tok long bringim sampela sol long mi, na em tromoi long dispela hul wara na em i tok-----

2 King 2: 21 ...BIKPELA i tok olsem, Mi bin oraitim ol dispela wara, bai i no gat dai moa long dispela hap...

Sol i save mekim wok wankain olsem paia. Em save klinim tru kainkain sik i stap long wara. Wara i ran daun long maunten, i save karim ol kain pipia, rabis, kain sik, malumalum, han diwai, pekpek, kain samting i no klin. Tasol ol dispela sol long biksi i save klinim ol dispela samting ol taun na vilis i bin tromoi. Na yumi harim tok bilong Jisas, em tok ol Kristen i olsem sol.

Matyu 5: 13 Yupela i stap sol bilong dispela graun.

Tasol long stori, dispela sol i bin klinim dispela sik long hul wara. BIKPELA I bin mekim olsem. Dispela kain sikness long hul wara i piksa long ol pela bel. Dispela olupela bel inap bagarapim Kristen laip sapos man i no save goan long holines. Yumi i no gat asua bilong Adam, tasol yumi gat siknes bilong em, na dispela siknes i save kamapim dai bilong bodi.

Hebrew 9:27 Olgeta man i mas i dai...

Yumi save dai bikos yumi stap lain bilong em. Long dispela, liklik bebi i save dai tu. Bel i pulap long ol kain posin yumi save kisim long Adam. Tasol profet i tromoi dispela sol, na mekim wara i orait, na olsem tasol God i save klinim as bilong sin wantu olsem.

Sapta 6 - Profet Ilaisa Na Plaua

2 King 4: 38 - 41 Em stori long Ilaisa i putim plaua long dis. Long Gilgal, ples bilong dispela Baibel skul bilong ol profet, ol studen i hangri nogut tru. Ol go nabaut nabaut na wanpela studen em go bilong painim wanpela kain kumu. Na em kisim dispela kumi i kam na tromoi long pot bilong kukim. Ol studen i no save dispela kumu i gat poisin long en. Tasol Ilaisa i putim plaua long pot, na dispela kaikai i kamap gutpela bilong kaikai.

Dispela posin, i no piksa long stilman, ol man i brukim lo. Em makim posin bilong ol pela bel. Em dispela kain posin i bin kam long Adam na stap pas insait long bel.

Rom 8: 6Sapos tingting bilong man i pas long samting bilong olupela bel tasol, dispela man bai i dai

Sapos yu orait long stap wantaim olupela bel, orait yu bai dai.

Long Baibel, wit, plaua, bret, i save makim Kraist, o Kristen. Plaua i kam long wit, na long plaua ol save wokim bret. Dispela plaua i gat strong bilong oraitim poisin bilong olupela bel. Dispela plaua em Jisas Yet. Na wantu tasol, dispela plaua i mekim kumu i swit moa, olsem holines em save swit moa.

Sapta 7 - Putim Hul Long Ia Bilong Slev

Stori stap long Eksodas 21: 1 - 6, na long Lo 15: 12 - 18 Long taim ol Isrel i go long paitim ol birua, sampela taim ol bringim wokboi slev i kam bak wantaim ol. Orait Moses i putim lo long ol ken holim inap long 6-pela yia tasol. Na long yia namba 7 ol mas larim em i go aut fri. Tasol sampela taim dispela wokboi em save kamap olsem memba bilong famili. Na em save laikim tumas masta, wantaim famili bilong en. Na sampela taim tu ol marit na karim pikinini insait long dispela 6-pela yia. Na ol nupela bebi i kamap olsem memba bilong dispela famili.

Na taim yia namba 7 i kamap, dispela slev i hat tru long lusim dispela famili em save laikim tumas. Orait ol ken go stretim long kot, na ol kisim dispela wokboi i go long pos bilong dua, na ol nilim hul long ia bilong em, na dispela i save soim em i olsem memba bilong dispela famili inap long em i dai.

Ol sinman i wokboi bilong Seten. Ol no stap fri, na Seten em save kontrolim ol long laik bilong em yet. Tasol long taim man i tanim bel, na Jisas i brukim dispela sen i pasim yumi, orait yumi amamas tru long stap wantaim famili bilong God.

Tasol i gat narapela level moa long Kristen laip yumi mas goan long en. Yumi save laikim Jisas tumas, na yumi no inap lusim Em inap long dai. Bikpela I laik kisim yumi i go long pos bilong dua, na nilim hul long ia bilong yumi, dispela i save soim yumi bai stap long famili bilong em inap long taim bilong dai. Ol givim nem long dispela "Slev Bilong Givim Bel." Yu no save kisim dispela mak long namba wan wok. Dispela em spesol mak, Kristen i save kisim long namba 2 wok.

2 Korin 4: 10 Oltaim mipela karim nabaut insait long bodi dai bilong Bikpela Jisas....

Sam 40: 6 Yu bin opim ia bilong mi....

Sapta 8 - Samyuel I Kilim Egak

Stori i stap long 1 Samyuel 15. Samyuel i bin kapsaitim wel antap long het bilong Sol bilong makim em king. Long dispela taim God i senisim bel bilong en.

1 Samyuel 10: 9 God i givim em narapela bel.

Sol em gutpela man long ai bilong BIKPELA, na ol Isrel i amamas tru long en. Na Holi Spirit I givim Sol dispela presen bilong autim tok profet. Sampela king em inap autim tok profet olsem king Devit. Wanpela pris tu em save autim tok profet, em Sakaraia. Na Jisas, wanpela tasol, em got tri-pela namba, Profet, Pris, Na King tu. Olsem BIKPELA i makim Sol profet na king -tasol i no makim em long mekim wok bilong Pris.

King Sol em i no save litimapim nem bilong em yet, na i gat daun pasin tru. BIKPELA I yusim em bilong kilim planti birua bilong Isrel. Nau tasol, wanpela de, olupela bel i save kamaut ples klia long laip bilong em, na dispela i paulim laip bilong king Sol olgeta.

Taim mama bilong Samyuel i gat bel, i givim em long BIKPELA, olsem na Samyuel i save mekim wok bilong pris tu, wantaim autim tok profet. Bikos mama i givim Samyuel olgeta long God, em wanpela tasol ausait long lain Eron bilong mekim wok pris. Na king Sol i brukim dispela lo bilong Moses, na em i mekim wok bilong king, bilong profet, na bilong pris tu, dispela 3-pela namba bilong Jisas wanpela. Em kisim namba bilong Jisas Yet, long dispela 3-pela wok.

Bikpela pait i stap wantaim lain Amalek. Samyuel i bin tokim king Sol, “Wetim mi kam na mekim ofa.” Tasol Samyuel i no kam kwik, na king Sol i gohet kwik taim na mekim wok pris long dispela ofa. BIKPELA nau I laik rausim Sol long stap king moa, tasol i givim em narapela sans gen long stretim laip bilong em, na bihainim tok olgeta.....

Bipo tru, ol lain Amalek i bagarapim nogut tru ol Isrel, taim ol lusim Isip i kam. Ol bin kilim i dai sampela lain i no gat strong, husat ol kamap las tru long rot. Olsem BIKPELA I tok olgeta lain Amalek mas dai. Nau Em I laik yusim king Sol bilong mekim dispela wok bilong pinisim olgeta. BIKPELA I tok “kilim man, meri, marit, lapun, bebi boi, bebi meri, bulmakau, sipsip, meme, kamel, rausim nem bilong dispela lain long graun. Orait king Sol i go kilim, kilim, kilim, tasol em holim ol gutpela gutpela sipsip, bulmakau samting, na king bilong ol tu, Egak. God yet I tok Egak mas dai. Dispela em piksa long rait bilong Aposel Pol:

Rom 6: 6 Olpela bel bilong yumi em i dai pinis long diwai kros wantaim Krais.

Nau, Samyuel i kam lukim ol samting, na kirap nogut tru, “Bilong wanem ol samting bilong Amalek i stap yet ?” Na king Sol em tok “mi bihaim tok bilong BIKPELA olgeta.” Em giaman stret. Dispela bainat long han bilong king Sol i slip nating, tasol Samyuel I kisim na katim, katim, katim, dispela Egak i pinis. Baibel long han bilong sampela pasta i no gat strong . Tasol long han bilong narapela i gat sap bilong Holi Spirit. Nau laip bilong king Sol i go daun, daun, daun, olgeta. Na dispela olupela bel i

save tekova laip bilong em. Em traim long kilim Jonatan, pikinini bilong em yet. Na em i traim long kilim Devit tu.

Yes, i tru tumas, ol dispela i soim piksa olsem. God I bin tok pinis dispela olupela bel mas dai. [Rom 6, na 7, na 8] Man ken kontrolim wel dok, bea, laion, pis, na pisin, tasol man i no gat strong inap kontrolim dispela ol pela bel. Wapela samting tasol, em mas i dai.

Efesas 4: 22yupela i mas rausim....dispela olupela man

I no gat helpim bilong em, i no gat trening bilong em, i no gat kalabus bilong em, i no gat pikisim bilong em, em samting i nogut, na i nogut olgeta. I no inap mekim wapela gutpela wok. Na i no gat spes bilong en long heven, olsem na i mas dai, olsem God I bin tok long dispela lain Amalek, na king bilong ol Egak. Tru tumas, bainat bilong sampela pasta i slip i stap long let. Tasol husat pasta i bihainim tok olgeta, [100%] em bai yusim bainat olsem Samyuel long dispela Egak i stap insait long ol kongrigesin.

Yu husat ? Na yu holim dispela bainat long han bilong yu ? Yu bai mekim wanem ? Yu tu mas autim strong pela tok agens dispela olupela bel i save stap yet long ol Kristen i no gat namba tu wok.

Laip bilong king Sol i pinis olsem wanem? Long taim bilong dai, BIKPELA i no save harim prea bilong em. Sori tru long em, na sori tu long wanem Kristen i no goan long kisim namba tu wok.

Sapta 9 - Rausim Ismal

Painim dispela stori long Jenesis 21, na Galesia 4: 21 - 31 Tupela Ebrahim na Sara i stap. Tasol Sara i kisim wanpela meri bilong Isip, i wok slev bilong en. Nem bilong em Hega. Nau, Ebrahim wantaim Sara i lapun, na God I pasim bel bilong Sara i no inap karim pikinini, na i gat pes sem tru. Em gat tingting long Hega ken karim pikinini long Ebrahim, na em bai kolim pikinini bilong en yet. Tru tumas, ol mekim na Hega i karim pikinini Ismal. Tasol bihain gen Sara yet i gat bel na karim Aisak. Aisak em spesol bikos em pikinini God I bin promisim long tupela. Em pikinini bilong promis. Na Ismal em pikinini i kam long laik bilong man tasol. Long Galesia, Ismal i save makim O.T., na Aisak i makim N.T. Ismal i save hetim Aisak because em spesol pininini bilong promis. [Dispela tupela lain i save pait kam inap yet tude.]

Na God i tokim Ebrahim na Sara:

Galesia 4: 30 Rausim dispela slev meri wantaim pikinini bilong en.

Stori i go moa yet, tupela pikinini i no save ple gut wantaim. Na oltaim Ismal i mekim nogut long semim Aisak. Tasol wanpela de Sara i lukim Ismal mekim olsem, na em kirap nogut tru. Em tokim Ebrahim long Hega, wantaim Ismael, tupela mas lus. Tasol Ebrahim em les na em i no mekim. Tasol nau, BIKPELA yet i tokim Ebrahim long tupela i mas lus, olsem na Ebrahim em save mekim wantu, nau tasol.

Ebrahim i dai, orait Ismal, namba wan pikinini em bilong kisim ol samting bilong papa. Tasol em i no pikinini bilong promis. Pikinini bilong promis em mas gat namba i winim pikinini i kam long laik bilong man. Ismal i mekim planti trabel insait long famil, na God I tok i mas aut. Em i wankain as bilong sin i mas aut olgeta pinis. Gutpela, em nau famili inap sindaun bel isi gen.

Hega em slev meri wantaim pikinini bilong en. Sara em fri-meri wantaim pikinini bilong em. Hega i karim Ismal wankain pasin bilong ol manmeri, tasol bel bilong Sara i drai, na em karim pikinini long promis bilong God. Hega i save makim O.T. kontrak bilong mountin Sainai. Hega i save makim tu, Jerusalem i stap nau long dispela graun. Tasol Sara, em fri, na i save makim Jerusalem i stap antap long heven.

As bilong sin i no laik stap ananit long Holi Spirit. Olsem God I tok As bilong sin i mas aut olsem Ebrahim i mekim long Ismal.

Sapta 10 - Kisim Bokis Kontrak

Stori i save kam long 1 Samyuel Sapta 4 - 7; 2 Samyuel 6; Stori 13 - 15. Nau yumi ken lukim ol wanwan ples ol karim dispela bokis kontrak long en.

1. Sailo.

Long hia Ilai, na boi Samyuel tu-pela save lukautim Bokis Kontrak

2. Eben-isar.

Nau ol Isrel i pait wantim ol Filistin long E-ben-isar. Na ol Filistin i stilim Bokis Kontrak i go long as ples bilong ol yet.

3. Asdot.

Em hia siti bilong ol Filistin. Na ol putim long tempel lotu bilong Degon, em god gaiman bilong ol. Orait long moning taim, Degon em pundaun long pes bilong en, klostu long bokis kontrak. Na ol sanapim Degon gen, tasol long nekis de het wantaim tu-pela han i bruk bruk. Poin mipela laik mekim hia, dispela bokis kontrak em makim holines bilong BIKPELA. Na dispela strong bilong Seten em mas pundaun ananit long pawa bilong BIKPELA. Tude tu i wankain olsem. Holines bai win oltaim oltaim. Nau bikpela sik i kamap long dispela siti, na planti ol dai. Na ol salim dispela bokis kontrak long nekis siti bilong ol Filistin, em Gat.

4. Gat.

Nau ol man long Gat tu i kisim dispela bikpela sik i kamap long ol. Na ol kibung na tok “salim long Ekron. Dispela Holines em strong tumas, Nogut mipela olgeta dai.”

5. Ekron.

Na wankain samting i save kamap long Ekron. Ol kisim dispela sik, na ol pret long ol bai dai. Tasol long hia ol saveman bilong dispela god Degon i bungim tingting bilong ol. Na ol i tok, “yumi salim dispela Bokis Kontrak i go bak long ol Isrel.” Na ol tok “no ken salim nating.” Orait ol salim sampela presen gol i go wantaim, bilong litimapim God bilong ol Isrel. Na ol kisim 2-pela bulmakau meri i save givim susu yet long pikinini, na pasim 2-pela long wanpela wegon. Ol putim bokis kontrak antap long en wantaim dispela presen gol, na salim i go bek long Isrel. Na sapos tu-pela bulmakau i go bek long Isrel, orait ol bai save dispela trabel i bin kam long God bilong Isrel. Nau tu-pela pininini bulmakau ol krai krai sori tru long susu bilong mama. Tasol tu-pela mama i go stret yet long Isrel na ol no tanim bek long pikinini. Poin hia i olsem, long taim yumi stat long go stret long we bilong holines, orait planti lain bilong yumi bai krai sori long “kambek, kambek.” Tasol yumi mas putim pes strong long go long Jisas.

6. Bet-semes.

Nekis, tu-pela bulmakau kamap long Bet-semes bilong Isrel. Dispela Bokis Kontrak em holi olgeta, na God I putim planti lo long en. Ol mas karamapim long laplap na ai bilong ol pipol no ken lukim. Na ol mas karim long pos, inap han bilong wanpela man no ken holim. Ol man nating i no bilong karim, em wok bilong ol pris tasol. Nau ol dispela lain bilong Bet-semes i opim bokis na lukluk insait. Orait wan tu tasol ol dai long han bilong BIKPELA. Dispela em bilong soim BIKPELA EM I HOLI, BIKPELA EM I HOLI, BIKPELA EM I HOLI. “Husat inap sanap long pes bilong Em ?” Na ol salim tok i go long Kiriati-jerim, long kam kisim dispela Bokis Holi bilong BIKPELA.

7. Kiriati-jerim.

Hia ol putim long haus bilong wanpela pris Abinadap, na ol makim [sanktifaim] pikinini bilong en, Eliesa ken lukautim. Em wok bilong ol pris tasol long lukautim bokis kontrak. Em i no bilong man nating long mekim dispela wok. Lo bilong Moses i tok “Pris husat i bin sanktifaed [makim bilong God], tasol ken lukautim Bokis Kontrak.” Na Eliesa em lukautim i go inap 20-pela yia. Tru, ol makim Eliesa long dispela wok, em namba wan mining bilong sanktifaikesin. Em i no kisim namba tu mining, bel klin. Tasol Eliesa em i klia piksa long man i gat namba tu wok.

Nau king Devit i krai sori long painim bokis kontrak i stap we. Na em i laik kisim i kam long Jerusalem. Tasol em i no askim BIKPELA pastaim. Em askim ol pipol ol ting wanem. Ol pipol i tok “yes, em gutpela, yumi go kisim.” Tingting bilong ol pipol i no wankain tingting bilong God. Orait ol i go askim Abinadap bilong go kisim. Na ol wokim wanpela wegon i gat wil, semkain olsem ol Filistin i bin wokim. Na long dispela ol paul tru, bikos em i no we BIKPELA I bin tok long karim long tu-pela pos. Taim Sios i laik kopi long pasin bilong ol haiden, orait Seten bai win. King Devit em mekim olsem, na ol i tokim 2-pela pikinini bilong Abinadap, Usa na Ahio, bilong stiam wegon. Tasol ol i no bin makim [sanktifaim] olsem brata bilong ol, Eliesa. Na nau, Devit em mekim bikpela singsing bilong litimapim nem bilong BIKPELA. Tasol nogat, BIKPELA Em I no amamas long dispela singsing. Man husat em amamasim God, em i mas bihainim tok bilong Em wantaim.

Long rot ol kamap long wanpela ples ol wokim wit, bilong wanpela man, Nekon. Nau long hia, lek bilong bulmakau paul, na wegon seksek. Na dispela man Usa [nem mining ol-pela bel] em putim han long bokis holi bilong stretim, na wan tu tasol BIKPELA I paitim dispela man i dai. Em bikos BIKPELA EM I HOLI, Bokis Kontrak bilong Em i holi, na sapos man nating i holim long han em bai dai. Nau king Devit em kros long BIKPELA, tasol em rong bilong Devit yet, i no bihainim tok bilong Bikpela. King Devit em tingting planti “mi bai kisim bokis kontrak i kam long Jerusalem olsem wanem ?” Em pret long karim i go moa, na ol putim long haus bilong wanpela man Obet-idom.

8. Haus bilong Obet-idom.

Obet-idom em wanpela Filistin husat em save pret long BIKPELA. Ol bringim i kam na Obet ting “Yes, putim hia long bikpela rum insait long haus bilong mi.” Dispela man em amamas tru long kisim Bokis Holi i kam long famili bilong em. Na BIKPELA I stat long blesim dispela man. Em blesim haus bilong em, meri bilong em, pikinini bilong em, gaden bilong em, bulmakau bilong em, sipsiip bilong em..... Brata, em wankain long yu tu, God bai kapsaitim blesing long yui gen, na gen, na gen. Holines em bilong ol lain pipol.

Joel 2: 28 Bikpela i tok moa olsem, “Bihain bai mi kapsaitim spirit bilong mi long olgeta manmeri.... 29 Na long dispela taim bai mi kapsaitim spirit bilong mi tu long ol wokboi na ol wokmeri nating.”

Aisaia 35:8 Rot bilong Holines....krankiman bai i no popia long dispela rot. [KJV]

9. Jerusalem.

Nau king Devit i harim nius long BIKPELA I bin kapsaitim bikpela blesing long Obet-idom. Na em i laik traim gen long kisim Bokis Holi namba tu taim, tasol nau em i laik bihainim ol wanwan poin BIKPELA I bin tok long Moses. Nau em mekim ofa long 7 pela bulmakau, na 7-pela sipsip man. Em i tok moa “ol lain Livai husat bin sanktifaid tasol ken mekim wok bilong lukautim bokis kontrak.” Ol i save putim 2-pela pos long 4-pela ring, na karim antap long sol bilong ol. Na taim yumi bihainim ol wanwan poin BIKPELA I save soim long yumi, orait dispela blesing bai kam daun. King Devit em danis wanpela danis holi long ai bilong BIKPELA. Na BIKPELA I amamas. Em bringim insait long Jerusalem, tasol Maikol, meri bilong king Devit em i no laik dispela danis bilong Devit, na em hetim king Devit. I olsem, taim yu kisim holines bilong BIKPELA, yu no ken ting olgeta bai amamas long testify bilong yu. Sampela man i bin traim, traim, traim, long kisim namba tu wok, tasol ol no kisim bikos ol no save step bai step God I save soim long en. Paia bai kam daun long taim pul ofa i stap antap long alta.

Sapta 11 - Haus Sel Moses I Wokim

Eksodas 25: 40 Na lukluk long yu wokim ol long bihainim piksa bilong ol, Mi bin soim yu dispela long maunten.

Yesa, Moses mas wokim haus sel olsem piksa BIKPELA I bin soim em long Maunten Sainai. Yumi tu mas kopi tru ol kain piksa God I bin soim long yumi.

God I makim 3-pela lain bilong Livai long lukautim wok bilong Haus Sel.
Ol Namba 3: 17ol pikinini man bilong Livai, Gerson, V. 19 Kohat, V. 20 Merari.

Ol lain Gerson i mas kem long sait bilong Wes long Haus Sel.
Na em wok bilong ol long lukautim ol sel, ol laplap, na ol rop. Ol yusim 2-pela wegon, na 4 pela bulmakau bilong karim ol dispela.

Ol lain Kohat i mas kem long sait bilong Saut long Haus Sel. Ol i gat wok long lukautim 6-pela fanisa bilong haus sel. Bokis Kontrak, tebol gol, lam gol, alta gol, alta bras, na tang bras.

Taim ol go long rot, ol putim pos long 4-pela ring na karim fanisa long sol bilong ol.

Ol lain Merari i mas kem long sait bilong Nort long haus Sel. Ol i gat wok long lukautim ol plang, pos, pin, na ring.

Em wok bilong famili bilong Eron, brata bilong Moses, long lukautim dispela 3-pela lain i wok long haus sel.

Eksodas 6: 23 Na Eron, brata bilong Moses, i kisim Eliseba i kamap meri bilong em,Na em i karim Nedap, na Abaihu, na Eleasar, na Itamar long em.

I gat 4-pela laplap i save karamapim haus sel.

1. Insait tru i gat naispela laplap ol wokim long linin, na i gat 4-pela kola long en.
Ret -kala i makim blut bilong ofa
Blu -kala i makim heven
Papoi -Em ret na blu mikis, kala bilong King
2. Namba tu laplap ol wokim long gras bilong meme, na em waitpela.
3. Namba tri laplap ol wokim long skin bilong meme, ol penim ret-pela. Olsem i gat sampela animal mas dai bilong sanapim dispela haus lotu.
4. Namba foa, na ausait tru i gat skin bilong wanpela abus "ba-sa." I gat kain kain tingting long em wanem kain animal.

Ol dispela poin wan wan i save makim stori bilong Jisas, Pikinini bilong God. Na namba tu, ol dispela i save makim ol samting bilong Kristen laip.. Tingim, sapos wangepela man i wokim, em bai putim ol naispela kala long ausait, long ai bilong ol pipol ken lukim. Tasol God I save putim bilas insait long bel bilong man.

1 Timoti 2: 9 Mi laik bai ol meri tu ol i putin gutpela klos samting, inap tasol long ol. Ol i no ken hambak long bilasim gras na skin long kain kain bis na bilas gol na klos i dia tumas. Nogat

1 Pita 3: 3, 4 Yupela i no ken bilasim skin ausait tasol, long pasin bilong bilasim gras na putin bilas gol na kain kain naispela klos. Nogat. Mobeta yupela i bilasim insait bilong bel

Aisea 53: 2Em i no gat bodi i strongpela tumas o i gat planti bilas, na taim yumi lukim em, em i no luk naispela tumas, bai yumi mas laikim em.

Dispela em tok save long namba wan taim Jisas I bin kam. Tasol long namba tu kambek bilong em yu ken painim long buk Revelesen 1, na 19.

Dispela 4-pela laplap i save mekim tu-pela wok.

I pasim lait bilong san, mun, na ol sta. Em bikos haus
Sel i gat lait bilong en yet insait.

Na i pasim ol nois bilong wok ausait long haus sel.

Long ausait ol meme na bulmakau i wel nogut tru, na blut i ran olsem wara. Tasol long insait, ananit long dispela 4-pela sel, ol samting i stap isi isi, olsem long bel bilong Kristen i gat lait, na Namba tu wok.

Taim ol Livai i save putim fanisa nabaut nabaut long ples bilong en, em piksa long diwai kros.

Alta Gol

Lam Gol	Tebol Gol
---------	-----------

Tang Bras

Alta Bras

Alta Bras

Ol samting insait long haus sel em gol, tasol ol samting ausait em bras. Long Baibel bras i gat mining long God Em stretpela, na Em mas jasim sin. Bihain tu Moses i sanapim snek bras i save makim Kraist i karim sin bilong yumi. Kraist I no save mekim sin bipo, nau, na bihain, tasol sampela we Papa God i putim sin bilong yumi long bodi bilong Em. Na Papa Yet I lusim Pikinini bilong Em inap long 3-pela aua.

I gat 5-pela kain ofa ol save mekim long dispela alta bras. Na olgeta i save poin long Kraist

1. Kukim olgeta long paia - 100% konsikresen Kraist I mekim long Getsemani
2. Plaua -Kraist Em I Bret bilong laip
3. Bel Isi -Kraist Em i givim bel isi
4. As Bilong Sin -Blut bilong Kraist inap klinim
5. Ofa bilong brukim Lo -Kraist i save fogivim sin

Ol tuls bilong dispela alta i bras tu wantaim. Savol, Sospen, dis, huk, santing.

BIKPELA Yet I save wokim paia holi long dispela alta bras. Em I tok paia bilong yu yet holim long haus bilong yu yet. Tasol paia bilong dispela alta bras em paia holi bikos God Yet I kirapim. Tupela pikinini bilong Eron i dai long dispela trabel long kirapim

paia bilong ol yet long haus lotu. Yumi save wetim paia bilong God I kam daun long taim bilong lotu, tasol sampela i asua long traim long kirapim paia bilong ol yet. BIKPELA I tok moa-

Livai 6: 13 Dispela paia i mas kuk olgeta taim antap long alta, em i no ken i dai.

Dispela paia holi, BIKPELA Yet I kirapim. Em wok bilong BIKPELA, na i no gat man inap kopi. Tasol BIKPELA I no inap go long bus, katim katim, na bringim i kam, brukim na putim antap long alta. Dispela wok BIKPELA I givim long man yet mas mekim bilong dispela paia holi i no ken i dai. BIKPELA I save baptaisim yumi wantaim Holi Spirit na wantaim paia. Na nogut yumi larim dispela paia i daiaut long Kristen laip bilong yumi. Yu mas bringim hap diwai bilong prea, ritim Baibel, na wetim Birkpela.

Dispela alta bras i no naispela piksa. Haumas tausen tausen sipsip, meme, bulmakau ol katim nek long hia, na kukim long paia ? Ol animal pundaun na tan tanim long blut bilong ol yet. BIKPELA I tok ol mas mekim. Ol dispela blut i no gat pawa inap wasim sin, tasol i save poin long bihain blut bilong Kraist i gat pawa bilong fogim sin bilong man. Dispela alta bras i piksa long namba wan wok, fogivnes.

God I no save fogivim taim ol kapsaitim blut, Em fogivim taim ol bilip. [Heb 11].

Hibru 10:4 Blut bilong ol bulmakau man na bilong meme em i no inap tru long tekewe sin.

Habakkuk 2: 4 Ol man i bihainim tru pasin bilong God, ol bai stap laip long bilip bilong ol. [Lukim KJV].

Hibru 11 i save givim lista long O.T. bilip man.

God I save kisim bek ol lain Niniva, tasol ol no gat tempol, alta, o blut bilong abus.

Jon 1: 17 God i givim lo long yumi long han bilong Moses, tasol marimari wantaim pasin i tru em i bin kamap long Jisas Kraist.

Na dispela marimari em save go ←OT na NT→

Tang Bras

Ating Alta Bras em inap pinisim olgeta samting bilong sin. Nogat. Alta bras i gat tok long man i bin mekim sin, tasol Tang Bras i gat tok long as bilong sin i stap insait long bel bilong Kristen.

BIKPELA I tok

Wokim Tang long ol miro ol bin kisim long Isip

Putim namel long Alta Bras na dua bilong haus sel

Putim wara insait

Ol pris i no inap go insait haus sel nating. Ol mas mekim ofa long alta bras na nekis ol mas waswas pastaim long go insait long haus sel.

Dispela tang i lait tru, olsem glas lukluk. Long ol long-we maunten ol bai lukim dispela tang i lait tru olsem miro i lait long san. Na taim ol pris i laik go insait long haus lotu, ol mas kam long dispela tang na lukim pes, han, lek bilong ol yet. Nau ol save klia tru

long sampela doti i stap yet ol nit long waswas. Dispela doti i stap yet i soim as bilong sin i stap yet long kristen laip. Ol mas namba wan wok long alta bras, na namba tu wok, pastaim ol ken go insait long haus lotu. I wankain olsem long yumi. Yumi nitim namba wan wok, na namba tu wok bilong go insait long heven. Long mekim wok long alta bras, ol no save long dispela nit, tasol taim ol kam long tang bras, nau ol kisim save gut tru long doti long as bilong sinl. Nogut wanpela pris em ting long arere long tang bras na go insait long haus sel. Holines bilong BIKPELA bai kilim em i dai. Na nogut man i ting long arere long holines miro na go insait long get bilong heven.

Hibru 12:14 Man i no gat pasin holi, [KJV Holiness] bai em i no lukim Bikpela.

Efesas 5: 26 Em i mekim olsem bilong wasim sios na i kamap klin.....

Lam Gol

Bras i gat tok long kot. Na insait long haus sel i no gat tok long Jas, na sin, na kot. Olgeta fanisa insait long hia em gol. Ol tok long sin i pinis ausait. Ol dispela fanisa ol wokim long plang diwai pastaim, na bihain karamapim long gol. Kraist tu Em tupela: man tru, na Em I God tru. Diwai i makim em man tru, na gol i makim Em i God tru. Taim yu go insait na dispela, lam gol i stap long han kais long hap Saut. Kraist Yet I tok-

Jon 9: 5 Mi lait bilong dispela graun.

Matyu 5: 14 Yupela i olsem lait bilong graun.

Em olgeta lain Kohat [pikinini bilong Livai] i gat wok long olgeta de long lukautim dispela lam gol. Ol stretim gen long 2-pala taim long de, long moning taim, na long apinun. Dispela lam i no inap wok nating, ol pris i mas lukautim. Tingim ol save meri i wetim man bilong marit i kam. I gat wok long stretim wik, na putim nupela wel oltaim. Les man i no inap lukim heven. I gat wok ol wan wan de bilong ritim Baibel, prea, na go klostu long God. Baptais long Holi Spirit i save rausim as bilong sin, em wanpela, tasol pulimapim wel na lukautim lam, man i mas mekim gen, na gen, na gen.

Ol save kisim dispela klin pela wel i kam long diwai oliv. Oltaim wel long Baibel i save makim Holi Spirit. Na ol dispela gol long haus sel i no save kam nating. Pastaim em mikis wantaim kainkain arapela kain graun wantaim. Ol save kukim long hatpela paia inap gol i ran olsem wara, na rausim ol kain rabis nating nating. Bihain dispela gol i kamap klin olsem glas, na i no mikis wantaim narapela kain graun.

Jop 23: 10 Em i bin traim mi, mi bai kam ausait olsem gol.

Revelesen 3: 18 Gol bilong mi, em paia i bin kukim na i kamap klinpela.

Taim bel i klin olgeta, orait i no mikis wantaim sin moa. Rom 6 em stori long man i ken i stap fri long sin. Dispela lam gol i gat 7-pela lam, 3-pela long han kais, 3-pela long han sut, na wanpel namel. Long Baibel, ol namba i gat mining beksait long en, na dispela namba 7 i gat mining long pafet, kompli, o inap pinis. I olsem long Kristen i gat namba tu wok, bel bilong man i kamap inap tru, pafek, namba 7. Jisas i soim dispela 7-pela lam gol i makim 7-pela kongrigesin long Liklik Esia.

Revelesen 2: 5tanim bel....O sapos nogat, Mi bai kam long yu hariap, na Mi bai rausim stik kandel bilong yu ausait long ples bilong en.

Revelesen 1: 20 Dispela 7-pela lam, em ol 7-pela sios....

I gat 7-pela kongrigesen long Esia, tu-pela inap orait, tasol 5-pela i gat nit long stretim laip bilong ol. Kraist I save wokabaut namel long 7-pela lam [sios]. Tasol 5-pela i gat nit bikos Kristen laip em sot. Lam bilong ol i lait, na ol stik kandel i stap yet long ples bilong en. Tasol ol gat nit long tanim bel, na sapos nogat, orait Jisas bai rausim stik kandel bilong ol, na ol bai lus long paia bilong hel. I tru, sampela taim i gat kain kain samting hait i save kamap long Kristen laip i no stret. Orait God I save givim man taim na spes long, tanim bel, na stretim, sapos nogat, orait em bai bakslaid na lus long hel.

Tebol Gol

Lam Gol i gol olgeta, tasol tebol gol ol wokim long diwai “a-kas” pastaim, na bihain karamapim long gol. Dispela tebol i gat 4-pela ring long ol kona, em bilong putim pos na karim. Nogut wanpela i putim han long dispela tebol holi na em bai dai. Diwai i makim Jisas em I man 100%, na gol i makim Jisas em i God 100%. Jisas em man kain olsem yumi. I les long haiwe, Em nitim helpim bilong karim diwai kros. Mama bilong em Maria. Seten i traim em. Na em i dai long kros diwai.

God Em Trinit. 1. Papa God, 2. Pikinini God, 3. Holi Spirit God. Olsem yumi ken tok “God I dai long kros diwai.” Tasol yumi no ken tok Trinit i dai long diwali kros. Na yumi mas klia: Seten i no inap traim God, na Maria em i no mama bilong God. Olsem Jisas em I God-man.

BIKPELA I save soim Moses ol wan wan poin, long we bilong wokim dispela tebol. Na ol pris mas putim bret i bruk 12-pela hap antap long tebol long olgeta Sabat, bilong i ken stap long pes bilong BIKPELA ken lukim, na bihain ol pris ken kaikai. Na nogut sampela i sting namel long wik. Ol taim, ol taim, ol mas putim nupela bret. Kristen laip bilong yumi tu mas stap nupela oltaim oltaim olsem nupela bret. Sapos nogat, orait Kristen laip bai sting, na smel nogut bai kamap.

Dispela bret i makim wanem samting? Em i makim laip Kristen i save givim long God. Liklik boi hia, i save givim olgeta bret bilong em long Jisas. Na tu, em i save makim bodi bilong Jisas Em I save givim long kros diwai.

Jon 6: 51 Mi dispela bret i gat laip na i lusim heven na i kam daun.

Orait, Jisas, I no toktok hia long ka-myun-yan tebol. Dispela Bret bilong Jisas em kaikai bilong tewel bilong Kristen. Na dispela Bret em save givim laip long man.

Alta Gol Bilong Smok Smel

Moses i no ken wokim long tingting bilong em yet. God Yet I givim poin bai poin plan em kopi long alta i stap long heven. Dispela alta ol i wokim wankain olsem tebol gol. I gat plang diwai ol karamapim long gol, 4-pela ring, na 2-pela pos bilong karim i go. Dispela alta i gat 4-pela kom long em, na pris i mas karim blut, na putim long alta pastaim long go insait long rum Holi af Holis. Alta i sanap klostu long laplap i hangamap olsem dua bilong go long nekis rum ol kolim “Holi af Holis.” Hai Pris Eron wanpela tasol ken go insait. Em kisim ston i paia, wantaim smel i kam long alta gol, na putim long wanpela kain lam bilong go insait long rum Holi af Holis.

Aisea 6: 6serap i flai i kam long mi. Em i gat wanpela ston i paia long han bilong em. Em i bin kisim dispela ston long alta

Sakaraia long N.T. em i gat dispela wok tu.

Luk 2: 9 Ol i makim em long pasin bilong ol pris, bilong em i go insait long rum holi bilong bikpela, bilong mekim smok smel.

Taim ol pris i putim paura i gat gutpela smel long alta, orait dispela swit pela smel i pulimapim 2-pela rum insait long haus sel. Dispela swit smel Eron i save karim insait long Holi af Holis, long pes bilong BIKPELA, na inapim Em tru. Dispela smel swit i save makim prea bilong Jisas taim Em I beten long ol Kristen long kisim sanktifaikesen. [Jon 17]. Tude ol Katolik i save mekim smok smel bilong ol yet, tasol smok smel bilong yumi em makim prea yumi save mekim, em swit long Bikpela.

Revelesen 8: 4 Na smok bilong dispela paura bilong smok smel, na prea bilong ol manmeri bilong God, em olgeta wantaim i lusim han bilong ensel nai go antap na i kamap long ai bilong God.

Revelesen 5: 8 Paura bilong smok smel em i pulap long olgeta dis. Dispela em i makim beten bilong ol manmeri bilong God.

Na BIKPELA I save givim 2-pela strong pela lo long dispela paura i swit.

1. Sapos wanpela i kisim dispela paura holi i gat smel, i go long haus bilong ol yet, ol bai dai tasol.
2. Sapos wanpela i mikisim wanpela paura nating long haus bilong ol, na bringim long haus bilong Mi, ol bai dai tasol.

Samting bilong man em bilong man, na samting bilong God em bilong God, na tupela samting no ken mikis. I olsem, nogut sios i traim long kopi ol kain pasin bilong haiden, na bringim i kam insait long haus lotu. Dispela tupela kain pasin i no ken mikis. Planti i laik kisim blesing bilong Seten, na blesing bilong God wantaim. “Bringim kwaia bilong sios, ol ken singim song pastaim mipela singsing.” Narapela. “Pasta mas kam na beten long God I ken blesim dispela singsing.” Dispela kain pasin i mas sting long pes bilong God. Sampela politiks i laik yusim pasta long kisim vot bilong ol Kristen.

Taim ol lukautim lam gol, sem taim ol got wok tu long wokim paia long alta gol tupela taim long ol wande wande. Nogut dispela smel smok i dai na beten bilong yumi i no ken i dai.

1 Tesalonaika 5: 17 Yupela i no ken makim i dai paia bilong Holi Spirit.

Yes, yumi gat taim bilong prea, na pinisim long nem bilong Jisas. Tasol bel bilong yumi mas op long God 24 aua long olgeta de. Em taim bilong wok, taim bilong ple, taim bilong slip, bel bilong yumi mas litimapim long pes bilong God olsem dispela smok i swit tumas.

Bokis Kontrak

Bokis Holi, Bokis Testimoni, i gat narapela narapela nem long buk Baibel. Ol wokim gen wankain olsem tebol gol, na alta gol, na wantaim plang diwai ol karamapim long gol. Antap ai bilong bokis kontrak em gol 100% tasol, i no gat plang diwai long en. Em tu i gat 4-pela ring bilong putim 2-pela pos bilong karim i go. Ol karim dispela i go paslain long Ples Nating na bilong brukim Wara Jordan, na raunim siti Jeriko. Ol save kolim dispela ai bilong bokis “Sia Marimari.” Em sia sindaun bilong God.

BIKPELA I tokim Moses “putim dispela 10-pela lo, long namba tu ston i no bruk insait long en.” Namba wan ston, Moses i bel hat na brukim, tasol dispela namba tu ston i no bruk, ol putim insait. Het Pris, Eron, wanpela tasol inap go insait long dispela rum Holi af Holis. Narapela pris nogat. Na Eron, em i no ken i go long laik bilong en yet. Em i mas wetim De af Atonmen, bilong go insait. [Lukim 7-pela Bik De]. Dispela rum, Holi af Holis, i copi long Boklis i stap long heven. Long dispela rum, Eron i no inap go nating, Em i mas karim blut i kisim long alta bras wantaim, na putim antap long ai [sia] bilong bokis holi.

2 Samyuel 6:6 Usa i putin han i go na holim Bokis Kontrak,Na God i kilim em.

Long dispela, God i bin tok pinis long karamapim, na putim pos long ring bilong karim. Olsem wanem God i tok no ken putin han long Mauntin Sainai, na no ken holim ol tebol, samting bilong Haus Sel ? Em bikos God i brukim tupela lain: Samting bilong God em holi, na ol samting bilong man em bilong man tasol. Ol fanisa long Haus Sel bilong Moses em kopi long fanisa i stap long heven. God I soim antap long Sainai.

Hibru 9: 24 Krai i no bin i go insait long haus holi ol man i wokim long han na em i piksa tasol bilong haus tru bilong God. Nogat, Em i go insait long heven stret.

Foa-pela laplap i save karamapim dispela rum olgeta. Yu no inap harim wanpela nois ausait long dispela rum. Em kain olsem Jisas I tokim Galili Si “Stap isi.” Dispela Holi af Holis i makim bel bilong man i gat namba tu wok. Paiap, paiap i pinis. Na i no gat man long graun inap rausim dispela bel isi Holi Spirit I save givim.

Insait long dispela Holi af Holis, em ples hait. Em ples hait bilong bik san, win, na ren. God yet I ples hait bilong mipela. Ol kain wok bilong Seten i wok long bagarapim yumi, tasol i gat ples hait we ol i no inap kam painim yumi. Yumi no gat ansa long ol kain trabel i save kamap long graun, tasol yumi ken ran hait insait long BIKPELA Yet.

Dispela rum i no gat lait bilong san, mun, lam, kandel, no bombom. Tasol wanpela kain lait bilong heven i stap antap long ai bilong dispela Bokis Kontrak. BIKPELA Yet I lait bilong dispela rum.

Jon 8: 12 Mi lait bilong graun. Man i bihainim mi, bai em i no wokabaut long tudak.

Dispela Bokis Holi i piksa tru long Kristen husat bel bilong ol i klin, long namba tu wok. Ol lain bilong Eron i save mekim wok long rum namba wan. Dispela save makim ol Kristen. Na Eron tasol i ken go insait long rum namba tu, dispela i save makim ol husat i gat namba tu wok. Em i save makim bel klin.

1 Samyuel 16: 7 BIKPELA i no lukim samting olsem man i lukim, long wanem, man i save lukluk long ausait, BIKPELA i save lukluk long bel.

Rom 8: 27 Na Papa i save lukim tru bel bilong man.....

Wanem Kristen i paul long mekim mistek long tingting o wokabaut, God I save lukluk daun insait tru long mining bilong bel, i gat wanem tingting, na skelim man. Na Em I lukim dispela Kristen i no bin brukim wanpela lo insait long bel bilong en.

Bihain gen BIKPELA I tokim Moses long putim stik bilong Eron insait long Bokis Holi. Na insait long dispela Bokis Holi, dispela stik i karim plaua wantaim prut. Na dispela prut i no save sting, tasol i save stap gut oltaim. Em i mas wankain long ol Kristen i gat namba tu wok. Holi Spirit i givim 9 pela prut i kamaut long en. Dispela prut oltaim em swit moa. Sting wantaim smel nogut i no save kamaut long laip bilong dispela Kristen.

Bihain gen BIKPELA I tokim Moses putim sampela kaikai mana insait long wanpela dis gol, na putim insait long Bokis Holi. Na dispela tu, wankain olsem prut bilong stik Eron, i no save sting, tasol em i stap inap oltaim. Ol Isrel i bilong kisim dispela mana ol wande wande, tasol nogat ol traim long bungim planti tumas inap planti de. Orait na dispela i save sting. Samting bilong tude, i no inap bilong tumora. Mipela i mas wokabaut wantaim Jisas long olgeta wande wande. Stori bilong kaikai mana i stap long Eksodas 16 na Ol Namba 11.

Eron i dai, tasol yumi got Het Pris i save winim Eron, na Em I winim dai na stap Laip. Yes, ol samting bilong haus sel i pinis nau. Tasol ol dispela i piksa long Krai I inapim na pinisim.

Matyu 27:51 Bikpela laplap i hangamap long tempel em i bruk long antap inap daunbilo

Dispela rum, Holi af Holis i op olgeta. Nau ol lain Kristen inap long i go inasit dispela laip i em ples hait, ples isi isi, ples malolo, ples i gat lait, ples i gat kaikai bilong soul. O.T. sikret nau i op long ai bilong ol pipol. Ol Jentail tu ken go insait. God Yet I opim long olgeta lain Kristen bilong olgeta hap graun.

Hibru 10: 19 Olsem na, ol brata, long blut bilong Jisas yumi inap i go insait long rum holi bilong God na yumi no ken pret.....

Sapta 12 - 7 Spesol De Moses I Givim Long Isrel

Pasova [Eksodas 12]

Bret I No Gat Yis [Wok Pris 23: 5; Namba 28: 16]

Namba Wan Kaikai Mau Long Gadin [Wok Pris 23: 9]

Pentikos [Wok Pris 23: 15; Namba 28: 26]

Winim Biugel [Wok Pris 23: 23; Namba 29: 1]

A-ton-min [Wok Pris 23: 26; Namba 29:7]

Haus Win [Wok Pris 23: 33; Namba 29: 12]

Pasova: Taim Skel: Isrel lusim wok slev long Isip

Em Bikpela De bilong tingim gen Ensel i abrusim ol haus we ol putin blut long pos bilong dua. Em long Trinde, De 14. Dispela i save makim Salvesin bilong God. Ensel i no wari long lukluk insait long haus. Em laik lukim i gat blut long pos long dua o nogat.

Bret I No Gat Yis [Holines]: Taim Skel: Isrel i lusim Isip

Em stat long taim Pasova De i pinis 6:00 PM, na i go 7pela de moa: Fonde 15 - Trinde 21. Yis em save makim as bilong sin. Na ol Isrel i mas klinim haus long olgeta yis.

Namba Wan Kaikai Mau Long Gadin: Taim Skel: Isrel i sindaun insait long Kenan

Dipela kaikai em wanpela kain gras “Ba-li,” na em save makim Jisas, Em Namba Wan bilong kirap long matmat long nupela spirit bodi. Lukim 1 Korin 15.

Pentekos: Taim Skel: Holi Spirit I kamsait long ol Isrel

Ol save kaunim 7-pela wik [7 X 7 = 49 de] bihain long kisim Bali. Na De 50 em Pentekos [De Jisas i kirap bek]. Em i De ol kisim Wit i mau long gadin. Long dispela de em de bilong tingim gen Moses i save kisim 10 pela Lo long Mauntin Sainai. Em long dispela de Holi Spirit i kapsait long disaipol long Jerusalem.

Winim Biugel: Taim Skel: Rapsa bilong Sios

Dispela ken makim rapsa [1 Tesalonaika 4:16]

Na em ken makim tu, God I singautim ol Isrel long kambek long as ples.[Levitikas 25:9]

Atonmen: Taim Skel: Jisas i kambek long Mt. Oliv na ol Isrel Tanim Bel

Dispela de i save makim taim Jisas i kam bek long Mauntin Oliv na ol Isrel bai tanim bel, na amamas long Mesaia bilong ol.

Haus Win” Taim Skel: 1,000 yia Miliniam

Ol Isrel i save kisim han diwai na wokim liklik haus win bilong sindaun long en na tingim gen ol tumbuna i bin stap long haus sel long ples nating. Na tu em save makim 1,000 yia Ma-lin-i-am. Kingdom Bilong Bikpela i kam daun long dispela graun. Long dispela taim Seten i pas long Hul i no gat As. Na ol gavman bai sapotim “Holines long Bikpela.”1,000 yia pinis, orait ol bai lusim Seten gen inap sot pela taim tasol.

Sapta 13 - Las Sans

Planti pasta na ivanselis i no bilip long God inap givim las sans long man i tanim bel. Tasol yumi mas glasim gut Baibel long dispela sabsek.

Jisas i givim Judas las sans long pasova kaikai.

God I givim las sans long Belsasa, na han bilong em i raitim long banis. Danyel 5
Herod i katim nek bilong Jon, na Jisas i no gat toktok moa wantaim en. Luk 23:9
Ekan tanim bel na konfesim sin, tasol em no kisim fogivnes. Josua 7

Isau tanim bel na krai sori tru, tasol tu let long kisim blesing bilong papa. HIBRU 12:17
Ol lain wara tais i paitim dua bilong sip, tasol i no gat wanpela inap go insait. Jen 7:16
King Sau i laik kisim ansa long God, tasol God i no gat tok moa long en. 1 Sam 28:15
I no gat rot long stretim sin bilong Isrel, na ol go long Babylon. 2 Kronikel 36:16
Rom 1 i stori long lain God i save givap long ol lain i semim bodi bilong ol.
Tupela pikinini bilong Ilai em tu let long tanim bel. 1 Samyuel 3:14
Faiv-pela yangpela meri i save paitim dua bilong marit, tasol dua pas. Matyu 25
Husat i save kisim mak 666 i no gat rot bilong tanim bel. Revelesin 14: 9,10
Tru tumas olgeta lain i stap pinis long hel, ol bin kisim las sans bilong ol.
Husat i tok bilas long Holi Spirit, Jisas tok klia i no gat fogivnes. Matyu 12: 32
Long HIBRU 6 i stori long Kristen husat i no laik stap Kristen moa
Isaiah 55:6 Painim Bikpela long taim yu gat sans
Sam 32:6 Ol husat i gat pasin bilong God, ol bai beten insait long taim ol ken painim
Em.

Maika 3: 4 Bihain ol bai singaut long Bikpela, tasol God I no inap harim prea bilong ol.
Ves 7 Ol lain profet, na ol lain i wokim kain marikel, God I no inap bekim ansa long ol.

Rev 2:21 God I save givim ol lain Jesebel taim [KJV space] bilong tanim bel.

Ol dispela man i bin krosim lain i no gat rot inap go bek na krosim gen. Mi yet bin harim sampela man ol givim testimoni olsem: "God I tokim mi 'dispela em las san long yu long tanim bel." Sapos sampela ivanselis i kam long PNG na mikisim Tok bilong God wantaim wara na tok, "dispela 'las sans' prising em giaman," orait yu yet mas skelim na tingim ol dispela ves i save kam long Baibel.

A Line Unseen

There is a time, we know not when,
A point we know not where,
That marks the destiny of men
To glory or despair.

There is a line by us unseen,
That crosses every path;
The hidden boundary between
God's patience and his wrath.

To pass that limit is to die—
To die as if by stealth;
It does not quench the beaming eye
Or pale the glow of health.

The conscience may be still at ease,
The spirit lithe and gay;
That which pleases still may please,
And care be thrust away

But on that forehead God has set,
Indelibly a mark
Unseen by men, for men as yet
Are blind and in the dark

And yet doomed man's path below
May bloom as Eden bloomed;
He did not, does not, will not know,
Or feel that he is doomed

He knows, he feels that all is well,
And every fear is calmed;
He lives, he dies, he wakes in hell,
Not only doomed, but damned.

Oh, where is this mysterious bourn
By which our path is crossed;
Beyond which God himself hath sworn,
That he who goes is lost.

How far may we go on in sin?
How long will God forbear?
Where does hope end, and where begin
The confines of despair?

An answer from the skies is sent,
"Ye that from God depart,
While it is called today, repent,
And harden not your heart."

- Joseph Addison Alexander i raitim

Tok Bilong Pinisim

Olanan ! Pres God ! Haleluya ! Dispela marimari bilong God ! Husat inap pasim yu long go insait? I no gat wanpela. Laplap i bruk pinis. God Yet I brukim bilong yu ken go insait. Nau yumi olgeta Kristen ken i go stret insait long dispela rum Holi af Holis. Husat tok "Nogat?" O brata, susa, traim tasol, yu mas bilip wantaim bel, na wokabaut i go insait. Goan ! Nau tasol yu ken save ol samting bipo hait. Holi Spirit Yet I makim dispela de bilong go insait. Yu no mas pinisim Baibel Skul pastaim i go insait. Ol vilis

pipol tu, i no bin skul, ol ken i go insait. Nau yu mas kisim dispela pulap bilong Holi Spirit insait long bel bilong yu. Kaman ! Maski long harim tok bilong wanem wanem man. I gat strong bilong winim olgeta sin long blut bilong Jisas (.)

Robert M. Brock